

S P E A K E R : Ngai teh u, Van te Van leh lei leh a chhunga awm zawng zawng hi Lalpa in Pathian ta vek a ni. (Deut. 10:14)

Tunah chuan zawhna leh chhanna hun kan lo hmang ang a. Starred Question No.13-na hi Pu Lalduhawma, Member zahawm takin han zawt sela.

Pu LALDUHAWMA, (ZNP) : Pu Speaker, Home Minister zahawm tak chhan atan Police Department in Fencing materials etc. an lei chungchang chhui tura Commission din khan engchen nge hna an thawh tawh ? a result min hrilh thei em ? tih a ni.

S P E A K E R : A chhang turin a enkawltu Minister zahawm tak Pu R. Lalzirliana i lo sawm ang.

Pu R. LALZIRLIANA MINISTER, (INC) : Pu Speaker, Aizawl West - I bialtu zahawm tak Pu Lalduhawma zawhna kha a chhanna chu hei hi a ni e.

(a)-na Police Department in Fencing materials etc. an lei chungchang chhui tura Commission an din hian April leh May 2009 chhung khan an thil hriat duh ang an khawm tawh a ni.

(b)-na A chungsa sawi tawh ang hian a result puan theih a la awm rih lo, tih chhanna a ni e.

S P E A K E R : Zawhbelhna Pu Lalduhawma.

Pu LALDUHAWMA, (ZNP) : Pu Speaker, hriat theih a nih hunah kan la hre tlang turah beisei ila, thil hriat chakawm tak a ni bawk a. Kan zawh belh duh chu hemi Modernisation Scheme hi a la kal zel em ? A kal zel chuan a tlangpuia kan Police Department thuan thatna tura hmalak tur tlangpui deuh te min hrilh thei em ? Hmanniah kan thianpa'n harsatna a tawka, Aizawl Police Station ah Motor pakhat chauh an lo nei a. "Ka Motor ka thawh ta ringawt a, chu chu kan hmang" a ti a. Modernisation Scheme a kan sen tam tawh teh reng nen, tiang khawpa kan Police te, a dang chu sawi loh, Aizawl Police Station ngei pawh chutianga Crime man chhuahna chungchangah te chak hlei thei lova an la awm chu a pawh hlein ka hria a. Khang kawngahte khan hmasawna a awm thei dawn em ?

Tin, a dawt lehah chuan House a Resolution kan passed Home Guard chungchang kha engchen nge thlen pui a nih tawh? Skill-I dinhmunah te hian hlawkpui an ni thei ang em?

A dawt lehah chuan Police Department a Grade IV ho hi 24 hours duty ve tho an ni a. Roll Call ah an tel bawk a, Training an pe bawk silova, khawikipah, Chattisgarh thlenga an kal ve a ngai a. Chuti chung chuan Compensatory Allowance an la lova, Ration te an la lo bawk a, an duty dan a inang reng tho si a, Compensatory Allowance leh Station Money te hi an dawng ve thei lawm ni?

Tin, Thosilen te, Kamawlte hi Ministerial Staff dangte hian an dawng tho si a, anni pawh field a chhuak a, puanthuah tela chhuak ve tho an ni a, an mamawh ve ngawih ngawih a, an dawng ve thei em? Ministerial Staff te pawhin an dawn theih tho chuan anni hian an thei ve dawn em? tih kan zawt duh bawk a.

Tin, G.P.F. chungchangah hian Department dangah chuan awlsam takin an la a, Police Department ah hian a harsa bik hle niin an sawi a, an pek pawhin Rs.30,000/- chauh te niin a lang a. Department dang ang bawk hian he an G.P.F. hi sorkar ta pawh a ni lova, sorkarin a pek apiang khan a leiba a rul a ni mai a. Police Department a nih avanga a harsat em em bikna tur enge awm? A awlsam theih dan a awm em? tih kan zawt bawk a.

A tawp berah chuan Chattisgarh a kal te kha a hotu deuh te chuan T.A. an la zo tawh an ti a, a hnuailam pangten an la la lo niin sawi a ni a. Hotuten an lak hmasak zel te pawh hi a Mizo tawh lo deuhin ka hria a, Constable leh khatiang ho khan T.A. engtikah nge an lak ve theih ang tih ka zawt e.

S P E A K E R : Zawhbelhna, Pu R. Lalrinawma.

Pu R. LALRINAWMA, (INC) : Pu Speaker, ka zawhbelhna... Police Department in Fencing Material leh a dangte an lei dik lo nasa taka a awmnia hriat, Commission din meuha chhui ngai hi engtik hun laia lei nge? tih ka zawt e.

S P E A K E R : A chhang turin Home Minister.

Pu R. LALZIRLIANA MINISTER (INC): Pu Speaker, Aizawl East - I bialtu zahawm tak Pu R. Lalrinawma zawhna kha kan chhang hmasa ang a. Tuna Commission dinna chhan hi steel wine rope leh chainsaw machine te leh thil dangte a ni a, khatih lai DGP, 2004 a ni tawh a. Khatih lai DGP khanin cheng lakhs (nuai) 356 man State Purchase Advisory Board hriatpui lohinheng materials

ho hi a lo lei a, order a lo pe a. Chu chu bill a lo kal khan State Purchase Board ah expost facto sanction a dil a, mahse SPAB khanin an thil lei kha dik lo taka lei a awm a ni tih an hriat avangin an phalsak lova. Khatianga bill helaia order an pekte khanin a thlenna turah te an tih thlen loh si avang leh sorkar ah bill anrawn pek tawh si avangin pawisa pe lo kha court ah an khing a. Tichuan tunah hian chhui a ngai ta a ni. Hei hi kum 2004 lam thil kha a ni tawh e, tih kha ka chhanna nise langin.

Tin, zawhna neitu Member zahawm tak Pu Lalduhawma han zawh kha MPF hi engtik thlengin nge a kal zel dawn ? tih a ni a. Hei hi kum 2 (hnih) bawr vel chu kal tur anga ngaih a ni a. Hmannia Internal Security Meeting kan zu neihah khan, kum 10 tal chu extend turin kan dil hlawm a, State Chief Minister leh Home Minister te kha, chuvang chuan tunah hian engchen chiah nge a kal dawn tih hi hriat a ni lova, a dan pangngai chuan kum 2 emaw chauh hun a awm tawh ni awm a ni. Tichuan hemi MPF lam atanga sanction lo kal reng reng hi a tlangpui chuan equipment leina atan, silai leh motor te pawh a ni a. Tin, In saknate pawh a ni a, chutiang atana hman thin chu a ni. Tuna motor tha lo kan neihte pawh hi nakinah chuan proposal helai atanga hotutena an siam ang angin a la kal chho turah kan beisei a ni.

Tin, Compensatory Allowance tih te leh puanthuah, Kawmawl tih vel te fourth grade ho tan han tih kha a lakna zia kha chu a inang lo khawp mai a. Fourth grade kha chuan thawh tur kha an nei a, helaia an puten an thawh ang leh an hlawh lak ang leh an dawn ang vek dawn tum kha chu a har deuh mai thei a. Amaherawhchu, heng anga an chhuahnaah hi chuan, Chattisgarh ah te leh vawiinnia chhuak mek turah te pawh hian an hlawh te chu a tam ve a. Tiang khan buatsaih sak an ni tih kha kan sawi duh a.

Tin, GPF hi Police ah harsatna bikna tur awm hranpain ka ring lova. Kan Finance lam atanga LOC min pek dan azir a ni ang a. Police Department ah pawh hian a inang lo deuh nge ni ? Thenkhatten an dil ang ang an han hmuh khan tunhma anga dil ang ang hmuh theih loh emaw an ti a, nuai lai te an han dil a, ngah silo khan, a then chu an pe ta mai si a, an buai leh zawk mah a, hman ngaihna an hre vak lova. Khatiang ang kha a nih lain harsatna tawkte chu nachinah pawh thenkhat chuan min han hrih tho a. Tawng mawi lo deuh a, nangni lam hi in tih te a awm thin niin an sawi a, a tha lo viau a ni. Engpawh niselangin, a rualkhai thei ang bera sem chu a ni. Tawngthuchhelo, kan tam em mai a, an duh ang hi chuan an hmu zung zung a nih loh pawhin hei hi chu min hriatthiapui ka beisei khawp mai.

Tin, Chhattisgarh a kal T.A. la hmu lote, ka ngaihtuahnaah a lo tel lova, ka beng a la thleng lova. Chuvangin hengte hi kan lo en ang a, hei a pangngaiin budget kan han pass dawn a ni a. Heng atangte hian tih theih a ni em ? Leh khalam pang kan zu kalna State te khanin an TA/DA te engkim kha an tum tur a nih avangin re-imburement kha kan la ti thei lo a ni mai thei a. Chu chu kan lo enfel ang e.

Home Guard kha in zawhnaah tho hian nakinah a lo la chhuak dawn a. Engpawhnise, Home Guard ah hian helaia kan passed ang khan tha taka tih sak kan tum a. Anni pawh hi an lawm thawkhat viauin kan hria e tih chin kha ni mai se a tha ang a, helaiah i champion a ni deuh ber e.

S P E A K E R : Starred Question No-14-na ah kan kal ang a, a zawt turin Pu Lalthansanga i lo sawm ang.

Pu LALTHANSANGA, (MPC) : Pu Speaker, ka lawm e. Starred Question 14-na ka zawhna- Sangha note chi hi engzata sem tur nge ? tih ka zawt e.

S P E A K E R : A chhang turin Pu H. Liansailova, Minister, Fisheries Department i lo sawm ang.

Pu H. LIANSILOVA MINISTER (INC): Pu Speaker, Member zahawm tak Pu Lalthansanga zawhna, Sangha note chi hi engzata sem tur nge ? tih chhanna chu – Fisheries Department in Sangha note a sem hi Sangha dil tui area hectare khatah (chu chu 10,000 Sq.m. a ni a) hectare khata zauvah Sangha chi 10,000 pek tur a ni a. Chumi awmzia chu Sq.m. khat zelah Sangha chi pakhat zel pek tur a ni.

Pu LALTHANSANGA (MPC) : Pu Speaker, Sq.m. 10,000 tlinglo ah khan engzat nge pek tur a nih tih kha kan zawt duh nghal bawk a. Tin, District wise hian eng angin nge hei hi tun 2008-2009 ah hian supply hi in pek ? Chu chu min han hrilh thei bawk em ?.

S P E A K E R : Chhang turin Pu H. Liansailova i lo sawm ang.

Pu H. LIANSILOVA MINISTER, (INC) : Pu Speaker, Sangha dil hi a chiah chiah vek chuan chhut chhuah chu a har deuh mai thei a. Amaherawhchu, apek dan chhutna chu Sq.m. khatah pakhat ang zel hisap a ni a. A lui leh dil azir te pawh a ni bawk a. Kha kha kan pekna atana pek tur zat siamna a ni.

Tin, District wise-a sem zat a chu hetiang hian a ni – Aizawl District ah a dawngtu 308, Mamit ah 382, Kolasib ah 301, Lunglei leh Saiha ah 274, Lawngtlai ah 374, a vaiin 1639 a ni e.

Pu LALTHANSANGA (MPC) : Pu Speaker, Aizawl District ah hian nuai 31 leh sawmnga Fisheries hi cheng nuai 18.27-a supply tur niin a lang a. Tin, Serchhip District ah hian nuai 13, chu chu cheng nuai sawm leh 92 pawisa a ni a. Champhai ah nuai 18, chu chu cheng nuai 16.28, Kolasib ah nuai 65 cheng nuai 40.13, Mamit ah nuai 50, chu chu cheng nuai 29.25, Lunglei ah 78 cheng nuai 89.70 a ni a; Lawngtlai ah nuai 27 cheng nuai 33.08, Saiha ah nuai 18 cheng nuai 24.30 a ni ta a. Hei Lunglei ah hian supply order an pek hi a tam hle mai a, Lunglei hi a potential area em em ni pawh hian a lang lova, hetah pawh hian 274 in emaw an la a ni a. Chutih lain Mamit leh Kolasib te chu potential area a ni a, khatiangah khan supply order pek kha a tlem ta tlat mai a.

Tin, chutiang ang zel chuan Serlui 'B'- A kan Sangha chhuahte pawh first stage ah hian nuai 11 vel chhuah an ti a, second stage ah nuai 14 tur te, khutilaia han chhiar kauh kauh mai phei chuan nuai 2 leh sing 4 vel emaw ni bawrah khan a tawp ta a. A hnua an dah belhte han ngaihtuah kha chuan nuai 5 pawh a tling emaw tih tur kha a ni a, nuai 14 la tih turah te. Tin, ka bial khaw thenkhatah khan lo chhiar tur hian kan ti a, a thenah an chhiar hman a, a thenah an chhiar hman mang lova. Sq.m. khatah pakhat zel tur ang kha nita sela, tuikhuah len dan ang pawh khan an ti lem lova. East Lungdara a dawngtutena an han sawiah phei chuan Dil pakhatah khan an pek kha 128 a ni a, 8 (pariat) a thi a, 120 a nung a ni an ti a. Chuan..... link turte hi a nia te reuh te te, a lubawk te hi a ni lehngal tlangpui thin a. Hetiang hi sorkar hian a hriatpui em ? Chuvang chuan khitalaiah Sq.m. anga tih phei chuan dawng teuh teuh turte pawh an awm tur niin a hriat a. Chutiang chu tunah hian, hei a monsoon lai a ni leh ta mai bawk a, la pek leh theih a ni ang em ? Tin, hei Zo fish fed te pawh hian Thenzawlah sawn an nei a, chumi ah chuan Sangha note an nei teuh a, chutiang amite pawh chu pek theih dan a awm ang em ? A bikin khitalai Hrangturzo bialah khian farmer te ingnghahna tak tak a ni si a, tih kha kan zawhbelh nghal bawk a ni.

Pu T.T. ZOTHANSANGA (INC) : Pu Spekaer, Champhai District kan lan ve loh dan kha min hrilhfiah thei em aw ?

Pu H. LIANSALOVA, MINISTER (INC): Pu Speaker, Champhai kha ka lo sawi hmaih palh a ni mai thei e. Min lohrethiam selangin. District wise-aallotment an siam hi district atanga demand awm leh nichina kan sawi ang khan a tui area, Department-a District Officer ten an rawn buatsaih behchhana tih a nih avangin Lunglei kha a sang angin a lang a, amaherawhchu, demand behchhana tih a ni a. Tin, heng Kolasib te leh hmun thenkhat, a chi anmahnia inngaihtuah duh zawk awmnaah hian a potential leh a dil zau nei pawh awm mahse langin Fishery ami la lem lova mahnia lo inngaihtuah te an tam avang a nih ka ring a. Chuvang chuan tuna kan han sawi ang chi a hi chu a District atanga demand lo awm, tin, chu demand pawh chu nichina a water area behchhan deuha tih a nih

avangin kan Department hotute hian chutianga an siam chu a ni a. Chu aia sawi chianna tur chu tunah hian ka hre mai lova.

Tin, Sangha chi sem chungchangah hian harsatna tam tak a awm a, hetia kan ngaih ngawt ai hian. A semna hmun leh a ram pek chhuahna dil atang khan kan semna tur hmun hi nikhat kal aia hla mah te a lo ni a, oxygen in a daih lova. Chuvang chuan Vai Sangha zuarin belpuia an ben ang hian an kalpui lo thei lova, chutianga chuan tam tak a lo sil awng a. Chuvang chuan a survival rate a kha a tha lo, a mortality rate a kha a sang viau mai a. Chuvang chuan an pack chhung ami pawh kha a semna hmun tur an han thlen khan a kim biai khan a tih hleih theih lova. Chumi harsatna chu Department ho nen pawh ngun takin kan sawiho a.

Tuna Lungdara thil thleng pawh kha a dik ang tih ka ring a. Tin, S. Vanlaiphaiah pawh keimah ngei ka va kal khan an lo sawi a, February thlaah. Nikum lama an rawn supply ah khan sangkhat dawng tur khan za te kan dawng thei chauh a ni, an ti a. Chu pawh chu kan zawt chiang a, hetah Kolasib lam atangin a lo kal ngar ngar a, nikhat aia tam te an thang kha chuan a supply a kha a nung tha deuh pawh nise, reilotea thi te a no ni a. Chuvang chuan a nung tha a an dawn a hi a tam thei lo a ni.

Tin, a supply tute hian a dawngtu tur te hnenah emaw khawlaiah emaw an va pe ngawt a, tuma hriatpui loh te pawh a awm niin hriat a nih avangin kuminah hi chuan za ah za kan ti dik thei lo a nih pawhin za ah 70 tal hi chu dik deuh hlekin a supply, a number ah pawh hian tan i la teh ang u, kan hotuten an ti a. Chuvang chuan, an va pekna tura V.C. te leh Fisheries Association hotute hriatpui ngeiin an lo dawngsawng a. Tin, a zat hi a number han chhiar tur chuan a sang tel / a sing tel te a lo ni a, Sangha te tak te te han chhiar kha kan khawih hlum zo ang tih pawh kha a hlauhawm avangin a tehna 200 leng emaw 500 leng emaw No khan an suak a, chutianga tih chu a ni a. Chuvang chuan a number kim biai leh dik chiah hi chuan a tih theih lova, tin, chutianga tih tumnaah pawh chuan kan Sangha chi phurhna hi a hla em mai a, kawng laka thi leh a hmun a thlen hnuah pawh kan chhiar zing ami a kha thi a lo awm ta thin a, chung chu kan harsatna tawh a ni.

Amaherawhchu, hemi tihbona tur atan hian a theih chen chenah District tinah hian Fishery Nursery siam turin kumthar atang hi chuan hma la tan ila kan ti a. Kan Department in Fishery Pond Nursery atana hman tur hmun li laiah a nei a. Hengah hian Nursery nana siam 20 chuang a awm a ni. Amaherawhchu, enkawl that leh sum leh pai hman tur te awm deuha enkawl a nih loh avangin kuminah pawh hian a chi 10,000,00 emaw chauh heng atan hian kan pe chhuak thei a. Nakum lamah hi chuan sum te kan neih remchan zel chuan tuna kan mamawh a zatve tal hi chu thar chhuah i tum ang u hmiang tiin kan Department in hmalak an tum a, phur pawh an phur hle.

Tin, a chi sem thua hian a fingerling aia lian deuh pek chhuah theih chu duhthusam a ni a. Amaherawhchu, nichina kan sawi ang khan khatiang kha a man a lo to deuh si a, chuvang chuan a fingerling hian kan sem a, Sangha dil neituten uluk taka an enkawl chuan hei hi tha ve thawkhata ngaih a ni.

Tin, Champhai kha nichina kan han chhiarah khan a tel lova, ani hi common curb pek tur zing ami a ni a. Amaherawhchu, vanduaithlak takin a pe tur Motor kal kha a accident ta hlauh a, Sangha an han pek tura kha a thleng zo ta lova, chuvang chuan a nia. Tunah hian February thlaa common curb pek tur hi buatsaih mek a ni a, February leh March ah hian, heng sem leh hunah hian anni lam mamawhna chu kan hotuten an lo hre zui tur niin a lang a. Chutiang chu ka chhan theih dan ni mai sela, chhan hmaih ka nei ang emaw.

Pu P.P. THAWLA (MDF) : Pu Speaker, kan zawhbelh ve duh a chu, kum 2008-2009 project kal zela fish-farmer te tana phurawm leh lawmawm tak thil a ni a. Saiha District chhungah pawh Sangha dil laih thawm te kan hria a, a lawmawm kan ti a. Nichina kan ngaihthlakah khan Lunglei leh Saiha District kha sawi pawlh deuh a nih avang khan a aia chiang leh zuala hriat duhna ka nei a. Chuvangin Saiha District bikah hian ponds engzat nge, eng anga zaute nge tih leh chungte chu tha takin an zo fel tawh em, a sum senso a vaiin engzat nge ni ? Tin, Sangha chi pek an ni tawh em ? tih te chipchiara kan lo hriat ve theih nan a changtu Minister zahawm tak khanin a aia chiang zawkin lehkhain emaw House ah inhrilhfhiah in emaw min tih sak thei em ? tih ka han zawh belh e.

Pu H. LIANSILOVA, MINISTER (INC): Pu Speaker, Saiha District ah hian ka hriat sual loh chuan dil, Fishery Pond Department in a hriatpui chu 514 a awm a, kuminah hian Sangha chi nuai 18 pek an ni. Senso zat erawh kha chu ka lo in ring lova ka hrilh thei lova, min lo ngaidam mai sela.

Pu K. LIANTLINGA (ZNP) : Pu Speaker, ka lawm e. Tuna a sawi chhuahah khan a District hrang hrang kha a pek tur zat leh a sum sen zatkha a rawn tar chhuahah khan, a then kha chu Sangha chi pakhat duli (50p) hisap ang te niin a lang a. A then chu Rs.1.25p ang hisap te niin a lang a, heti laiah hian District wise in quotation an ko nge ni a, a State level in ? tih ka zawt duh a. Tin, heti laiah hian a supplier hi tunge ni ang aw, tih hi min hrilh thei em ? tih kha kan zawt duh a ni.

Pu H. LIANSILOVA, MINISTER (INC): Pu Speaker, Supplier tur lam kha ka lo interest loh lam tak a ni a, ka lo hre mang hauh lo mai a, a chi supply a awm phawt chuan ka lo ti a ka pe mai thei lova, mahse an hriat duh chuan Member te khanin kan la pe thei mai tho ang a, a harsa lova. Tin, a chi man zat kha nichina ka sawi ang khan pakhat kha Re.1 a ni.

S P E A K E R : Awle, a lawmawm e. Tunah Starred Question No.15-naah kan kal ang a, a zawttu tur Pu B. Lalthlengliana hi Awmvel a vei hlauh mai a, a lo kal thei lo a min rawn hrilh a. Tin, a zawhna lo zawt turin Pu C. Ramhluna kha a rawn ti a, kei pawn ka lo phalsak a, tunah Pu C. Ramhluna Starred Question No.15-na zawt turin lo sawm ang.

Pu C. RAMHLUNA (MNF) : Pu Speaker, Pu B. Lalthlengliana Starred Question No.15-na Urban Development and Poverty Alleviation Department changtu Minister zahawm tak chhan atan a zawhna chu hei hi a ni. Aizawl khawpui chhung atanga ek paih tam tak an awm ta a, hengho ek paihna hmun tur hi sorkar hian ruahmanna fel tak a nei em ? tih a ni.

Pu ZODINTLUANGA, MINISTER (INC): Pu Speaker, Starred Question No.15-na chhanna chu Urban Development and Poverty Alleviation Department hnuaiah ek paihna hmun tur ruahman mek a ni a. Tuirial bul dumping ground ah temporary in buatsaih phawt a ni a. System changtlung zawk ADB leh JNNURM hnuaiah ruahman mek a ni bawk a, a puitlinna turin hmun a la duh deuh dawn avangin tun maiah chuan temporary hian buatsaih a ni. Ka lawm e.

S P E A K E R : Zawhbelhna, Pu Lalduhawma i sawm ang.

Pu LALDUHAWMA (ZNP) : Pu Speaker, ek hi Aizawl kawtchhuah hrang hrangah hun hei chen hi paih a ni tawh a, lui tuite a bawlhhlawh zo tawh a, vawiin thlenga “Tah chuan paih loh tur, chutah chuan paih ta che u”, ti a paihna tur hmun pakhat eih pawh nei lova kan awm hi kan ram lo hruai tawh tute zawng zawng mualphona a tlingin ka hria a. Tuna kan Minister thar ina hun rei vak lo chhunga helai thil a rawn ruahman nghal hi lawmawm ka ti riau mai. A puitlin vat vat pawh a tha a. Pu Speaker, kawtchhuah pali – Chhim, Hmar, Chhak leh Thlangah hian awm diat diat thei selangin, bawlhhlawh paihna hrim hrim pawh hi a tha hlein ka ring a.

Ka zawh duh chu hei, Lengpui nena kan inkar hi a Zo, a Vai, Foreigners te thlenga mi lo kalna a ni a, kalkawng dungah khuan tharlam tak tak ek paih hmuh tur a awm reng a, bawlhhlawh paihna khu kawng tuan khuan a ni ta ringawt tawh mai a. Kawngsir remchang lai apiang khu a vum phei thluah a, a vum khah hunah a dangah an sawn leh a, bawlhhlawh laiho khuan an hal khu chur chur a; fur lai pawhin a khu hi a mit thei lo hial a ni. Keini Chawlhmun – Lungmual area chho zawng zawngte khu a khu hian min bawh a, hrisel nan pawh a pawl tham viau tawh a ni. Khung zawng zawng khu paihna hmun sorkarin a nei si a, a kenkawh lamah hian engangin nge hma an lak theih ang ? Khutia a awm reng chuan paih leh a awl dawn em em a, a vai khuan JCB in emaw han clear vek sela, a bul hnai YMA / VCP te emaw lo duty sela, chungte

chu lawman an pe thei ang em ? A Department ngawt chu an in daih dawn der silova, hmun dang chu sawi kep seng ta lo ila. Airport road hi chu kan ram hmel lanna a nih avangin a pawimawh bik a, helai na na na hi chu Special Attention kan Minister hian min pek sak thei ang em tih ka zawt e.

S P E A K E R : Zawhbelhna, Pu P.P. Thawla.

Pu P.P. THAWLA (MDF) : Pu Speaker, Department lamin, ek paihtute hi engzat chiah nge kan neih tawh ? tih record an nei em ? An paihna rate hi a trip in nge an chhiar a, a khur len leh tet in, engzatin nge rate an siam sak tih ka zawt belh e.

Pu K. LALRINTHANGA (INC) : Pu Speaker, helai atanga chhuk thlak hian Tuikual 'D' mual tawntirh kham chungah khuan, bawlhhlawh leh hnim kalkawng chungah khuan a in chhek khawm a, hnim thenkhat chu kawng chungah hian a in zar nasa hle a. Vawiinah ruah a la sur lova, nimahse kawng chung atang khuan ek thli nge, zun thli nge, thlengsilna thli nge tih hriat loh a rawn far tluk tluk mai a, Motor kawngka hawn pheii chuan mi a rawn far thei ang tih hlauhawm khawpin a awm a ni. Khu khu enfiah theih a ni ang em ? Ek thli a nih chuan Office kal te tan pheii chuan kan rim a chhe vek ang tih a hlauhawm a. Chu chu ka zawhbelh ve a ni e.

S P E A K E R : Pu Joseph Lalhimpuia i lo sawm ang.

Pu JOSEPH LALHIMPUA (INC): Din zeuh zeuh a ngai a ni, kan in theihngihl ang tih te pawh a hlauhawm riau mai a. Engpawhnisela, Pu Speaker, kan Minister zahawm takin Aizawl khawpuia harsatna kan tawh mek hma a lak dan a sawi a. Ka Members pui zahawm takte sawi ang khan kum tam tak chhunga ruahmanna awm lo, hun reiloteah Minister chak tak ina hma an la kha a lawmawm in ka hria a, kan Minister hnenah lawmthu ka sawi a. Chumi ruala kan sawi tel duh chu Aizawl khawpui kan mangang a, hma kan la a. Khawpui dang hi kan mangan hunah nge hma kan lak ve ang, kan mangan hma hian nakin atan kan in buatsaih ang ? Chutiang ruahmanna chu Department in a nei em ? tih ka zawt e.

S P E A K E R : Zawhbelhna, Pu Lalrobiaka. Faina hi kan tuipui leh mek a ni.

Pu LALROBIAKA (INC) : Pu Speaker, ka zawh ve duh chu- Hei khawpui chhungah Tractor-a hnuh tura ruahman niin a lang a. Hun hmasaah khan dah chuk mai a ni a, kan Minister zahawm tak hovin laksawn a ni a, amaherawhchu, kan laksawna hmunah khan an la paih tho mai si a. Hei hi enzui a ni em tih ka zawt duh a. Tin, hei hi kan enzui loh chuan a hma aia tawp khan kan awm mai dawn a nih avangin hei hi nasa zawka enzui a, engtia tih tur nge ruahmanna a nei em tih kha kan zawt belh duh a ni e.

S P E A K E R : Chhang turin Pu Zodintluanga, Minister i lo sawm ang.

Pu ZODINTLUANGA, MINISTER (INC): Pu Speaker, kan ram kan en chuan kalna apiangah bawlhhlawh te, tawphnawkte kan paih a. Aizawl West-I bialtu zahawm tak Pu Lalduhawma rawn sawi ang khan Rangvamual kawng te, Aizawl khawpui rawn pantu hmun dang ram dang atanga rawn kal tena khawpui an rawn hmuh tan tirhna hi a tawp em em a. Chutih rualin bawlhhlawh mai a ni lova, kan ek paih dan hi Pu Speaker, hriselna atan pawh a tha lo em em mai a. Septic tank kan siam dan hi a dik lo nge ni, kan Department leh mithiamte kan han zawt a. Ek paih hi kum 2001 atang khanin a tam leh zual em em mai a, 2001 chho vel khan ek paih ngai, mithiamte kan han rawn chuan septic tank nilovin septic-lo tank deuh vek mai hi Mizoramah hian kan hmang niin kan hria a. A awmzia chu septic tank pangngai a soak pit te kan dah chuan ek bawlhhlawha (bacteria) te hi 80% chuan a thianghlim a ni, tiin mithiamten an zir chhuahnaah chuan an sawi a. Chutiang ang chu a tam zawk hian kan hman loh avang hian kan ek hi khami soak pit kan siam loh vang khan, a khat a nih chuan ek hlang kha a rawn chhuak tawh a, a hrisel lo em em mai a. Chutiang ang deuh vek chu kan dinhmun a nih avangin wawiinniah pawh khawpui chhunga ek paih ngai chanchinbuah pawha lar em em, advertisement ah pheih chuan ek paih tur nei, septic tank tihfai tur nei tih hian hmun hi a luah tam em em a ni.

Chuvang chuan kan sorkar thar a lo pian khan a ngaihtuah hmasak ber chu kan hriselna te leh kan ramin faina lamah hma kan sawn theihna atan chuan, kan hriselna atana pawimawh ber chu kan ramah hian faina a awm hi a ni tiin kan hotuten an sawi a; chutah chuan a hmasa bera kan ngaihtuah chu faina hi a ni. A duh duh ina zanah te, kawngsir khawi laiah emaw ek leh bawlhhlawh an paih hi engtin nge kan tih ang tiin ngaihtuahna kan seng a. Chutah chuan wawiinniah hian Tuirial tana bawlhhlawh kan paihna dumping ground ah khuan oxidation pond kan ti a, thenkhatah chuan sterilization pond te an ti a, hei hi liquid waste treatment ah chuan lar tak a ni a. Germany ramah te chuan kum 80 chuangte an lo hmang tawh a, India ramah pawh kum 60 chuang hetiang hi kan lo hmang tawh a. Hei a system hi a simple a, electric thil te leh thil dang khawl te a hman loh avangin a lar em em a.

Tin, mipui awmna, residential area atanga 500 metres velah hian hetiang oxidation pond kan tih hi siam phal a ni nghe nghe a ni. Chutiang tur chuan tunah Tuirialah kan siam a, chung avang chuan kan member zahawm tak Pu Lalduhawma'n a rawn sawi, kawngpui sira an paih mai mai te hi vawiiniah chuan sorkarin a paihna hmun tur a siam a, an paih loh chuan khang paihtute kha dan hmangin kan hrem tawh dawn a. Tunhma kha chuan sorkarin a paihna tur a nei loh avangin tih ngaihna kan hre lem lova, Septic tank Service Association te nen pawh vawi tam tak kan sawiho thin a. Chuvangin tunah chuan a paihna tur mumal tak, thianghlim baw k si kan siam theih dawn avangin, duh duhna hmuna ek paih thin a kha chu kan solve thei tawhin ka ring a.

Tin, Rangvamual kawng bul sir mai nilo Aizawl khawpui chhungah te, motor atanga cigarette bung, kuhva eina, chil chhak mai mai te hi kan dan Sanitation Rules ah hian khap a ni a. Chungah te chuan chawi theih a ni tih hi kan Member zahawm tak tak te leh Zoram mipuite hriata han sawi a tulin ka hria a. Khawlaia bawlhhlawh paih te, electric banah te, office banga kuhva eina chinai var kan tah te hian dan kan palzut a, dan lo angin thil kan ti a ni tih hi kan hriat a tul a. Chung angte chu hrem theihna dan kan rawn lekkawh dawn a ni. Rangvamual kawng pawh kha kan Member zahawm takin a rawn ngaih pawimawh ang khan sorkar pawn a ngai pawimawh a ni. Tunah hian sorkain a hmalak mek chu khulaia bawlhhlawh kawngsira awm khu JCB leh Bulldozer te hmangin kan nawr liam thla vek dawn a. Chumiah chuan sorkarin, miin an paih theih tawh lohna tur atan hungna kan siam dawn baw k a, chumi hungna chu Rangvamual YMA te pawh Department ten lo berawn tawhin, anmahni puihna hnuaiah leh sorkarin khulai bika duty tur ruahmanna kan dah theih dawn baw k avangin khulai khu chu kan solve thei in ka ring a. Bawlhhlawh paihna hi Sakawrhmuithuaiah leh Tuirial dumping ground khu sorkar anga bawlhhlawh paih phalna a ni a. Chumi piah lamah chuan tumahin khawiah mah paih hi phal a ni lo tih kha, kan sawi duh a.

Tin, sorkar angin kan rawn sawi tawh ang khan sewerage system hi tunah phase-I kan tih ADB lampang atangin Aizawl hmarlam, East lampang hi vaibelchhe 85.58 seng tura ruahmanna DPR siam mek a ni a. Chu seweage system ah chuan mipuite pawhin septic tank kan nei tawh lo ang a, kan In bulah pipe a rawn kal ang a, kan ek leh kan tuichhia te, khang zawng zawng kha pipe ah kalin connection kan la ang a. Chung chu Chite luiah emaw, tihthianghlim turin dan mumal tak hmangin kan lo ti thianghlim tawh dawn a ni. Tin, Aizawl West lam, tlak lamah hian JNNURM hnuaiah sewerage system hi chutiang baw k chuan mimal ina septic tank te buaipui ngai tawh lovin, kan tuichhiate paihna tur kha ruahman mek a ni tih kha kan sawi lang tel duh baw k a.

Tin, kan Member zahawm tak Pu P.P. Thawla zawhna kha vawiiniah hian Septic tank Service Association hian Member 22 an nei a, Member nilo hi mi 15 an awm baw k a. Hetiang septic tank khat paih thin an awm a, tih kha ka chhan theihna nisela.

Kan Member zahawm tak Pu K. Lalrinthanga rawn zawhna Tuikual, Dinthar chung tih kha kan lo chhinchhiah ang a, kan Department hotute nena lo enfiah leh turin ka rawn ti ang.

Tin, kan Member zahawm tak Pu Joseph Lalhimpuia'n District dangah hetiang bawlhhlawh paihna hmalakna tur a awm em a tih kha, Pu Speaker, tunah rih hi chuan Aizawl khawpui hi a tawtin bawlhhlawh leh tui luankawr te, sewerage system te hi hmalak phawt a ni a. Chumi piah lamah chuan District dangte hi kan kai chho leh dawn a ni tih kha kan sawi duh a.

Kan Member zahawm tak Pu V.L. Robiaka zawhna kha mobile garbage trailer kan hnuh sawn hi Pu Speaker, thil l thar deuh han ti deuh thut kan nih avang hian, kan tihpui, kan V/C Member te pawhin harsatna eng eng emaw sutkian tur te kan la nei a, veng khat Dawrpui deuh chauh saw niin kan hria a tunah rih chuan. Khatiang a paih huna la paih lo, veng dangah hi chuan motor in zingah hunbi neiin a rawn khawn khawm tawh a. Chungah pawh chuan kan Traffic S.P. te chungah pawh lawmthu kan sawi nghal ang a. Khami huna motor dinna tur hi zingah hmunte min lo pe a, chutah chuan hunbi dik takah mipuiten bawhhlawh an paihna turin ruahmanna siam a ni. Hmun thenkhatah bawlhhlawh la paih lui talh an awm te kha a problem solve dan tur kan V.C. te leh Department te nen tunah hian kan buaipui mek a. Tin, a paih lui talh la awmte chu dan angin hrem an ni ang tih kha ka sawi duh a. Heng kan sawi tel duhna chhan chu Rangvamual kawnga bawlhhlawh an paih thin a khu kan mangan pui em em tawh a, an paih hun hi zanah te a ni thin a. Kan officers ten an sawi dan chuan bawlhhlawh hi thil dang ang a ni lova, thil dang hi chu han man sak ila, a tukah hian a rang a rang hian a neituten an rawn lam mai thin a. Bawlhhlawh hi chu han man sak ila, a neituten an rawn lam duh der mai silova, an ti a. Chutiang deuh a nih avang chuan Rangvamual te pawh khu zanah karkhat chhung chu tlaivar thakin video camera nen kan duty tir a, chutah chuan mi pahnih/pathumte pawh case kan siam sak tawh a ni, tih kha kan report tel duh a ni e. Ka lawm e.

Pu LAL THANHAWLA, CHIEF MINISTER : Sawi belh duh ka nei a, kan Minister zahawm tak khan a sawifiah tha hle nain. Nichinah khan chawhmeh tuihnai tak kan buaipui a, tunah hian ek leh bawlhhlawh kan buaipui a, a inhmeh hlein ka hria a, kan eina hmun hi a thianghlim tur a ni a.

Tunhma deuh khan khumi Venghluu lamah khuan mifel tak a awm a. A huanah Bethlehem daiah khuan heng ek hi paih a phal thin a. Ani khan manure ah a lo siam a, a tha hle a ni. Sorkar nena an indawr danah khan a tha hle a ni. Tunlai ami hi a dal ta lutuk a, a phal tawh lo a ni. Manure-a siam chhuah tlak a awm ta lova, a chhan chu tuna hetiang ek paih kan buaipui em emna chhan hi kan thuawih loh vang a ni a. Sorkar specification angin hemi septic tank hi siam duh a ram kan awm lo a, tlemte chauhin an siam a ni. Chuvang chuan a khat zung zung a ni. A specification dik taka siam loh chuan a khat awl bik a ni. Chu chu a paihtuten an paih dawn hian an lak chhuah ilo velah te

khan an pawlh dal hle loh chuan a tih hleih theih tawh lo a ni. Tichuan, tui khan an leih dal a, chu chu paihna hmun kha a awm ta lova, chutatang chuan harsatna kan tawh ta a ni. Chuvangin septic tank siam chungchangah pawh hian a dik lo hi sorkarin veh turin a ruahman a ni a, an ti dik tur a ni.

Tin, ruahpui vanawn sur laia thenawm luikawra chhuah ching mai mai hi an la awm nual a ni. Chungte pawh chu an tih fo lohna tura man an ngai a, khang ang hunah khan insawipui loh hi a tha. Insawipui hnam kan ni a, insawipui luai luai hi chuan justice hi a ding tha hlei thei thin lova, chu chu kan sawi belh duh zawk a. Hun hmasa tawp lamah khan, 1997-1998 ah khan solid waste disposal scheme kan nei a, ka tih palh, integrated scheme kan nei a. Greater water supply phase-II leh solid waste disposal leh stone sewerage system, Greater Aizawl water phase-II kha kan la hmasa a, a dang kha tih tur a ni a. Amaherawhchu, tunah hian zawm a awm mumal lo niin a lang a ni. Solid waste disposal kha a englo hi kan mamawh a, tin, stone sewerage kan mamawh a. Tuna Minister in an hmalakna thar hi a lawmawm hle a ni. Khatih lai hun khan oxidization te, incinerator te, bawlhhlawhte hi manage tumna a awm tawh thin a. Amaherawhchu, kan tipuitling hman ta lova. A bul kan han tan, Greater Aizawl water supply phase-II pawh hi tiang hi a ni chho ta a ni tih kha kan hotute hriatah kan sawi ve duh hrim hrim a.

Tin, Lengpui atanga khawpui panna inkar kawng Member zahawm takin a rawn ngaimawh a, a tih that dan tur an ngai pawimawh kha a lawmawm ka ti khawp mai a, a ngaimawhawm a ni. Khulalah khuan mi tinreng, ram changkang tak tak atangin mi changkang tak takte an lo kal a, kawngtluan maia bawlhhlawh awm khu ngaimawhawmna a rei tawh a. Chuvangin tuna an han ngaihawh leh sorkar pawhin hmalak dan tur a lo ruahman tawh kha a tha a ni. Kan sawibelh duh zawk a chu a bawlhhlawh rual rual khan mi awm duhdah, kawngsira zung mai mai, zung chung motor thlir vung vung te, tin, hmeichhia ruak deuh teng tung, an awmpawng khul nana naute lukhum chauh hmanga vak vakte khu an tam khawp mai a. Khungte pawh khu YMA leh MHIP te pawh hian ngaihawh nei turin kan lo inrawn tawh thin a. Tin, Kohhran hmeichhe lampangte pawhin ngaimawh tlang ila, a siamthat dan tur te pawh ngaihtuah tlang ila a tha in ka hria a, civilized hnam entirna a ni hranpa lem lo a ni. Chuvangin khangte pawh kha ngaihawh pawimawh nghal atan kan nei tur a ni.

Tin, Member zahawm tak Pu Lalrinthanga rawn sawi kha Civil Hospital kan neihna hmun hi a dik lova, khawpui lailiah tlangchhipah bawlhhlawhbawm lianpui kan hung a, chuvangin eng ang pawhin a waste a kha han manage mahsela manage theih loh chin hi a awm fo dawn a ni. Chungte avang chuan helampang Western part – Aizawl khawthlang lampang mite complaint na avang pawhin sawn dan te leh siamthat dan te kan lo ngaihtuah tawh thin a. Chungte pawh chu mipui vantlang thatna tur a ni a, kan Member ten tha an tih chuan ngaihtuah tlan theih zel a ni e, tih kan sawibelh duh mai a ni e. Ka lawm e.

S P E A K E R : A lawmawm e. Pu John Rotluangliana i zawt ve dawn em ni ?

Pu JOHN ROTLUANGLIANA, DEPUTY SPEAKER: Pu Speaker, ka'n zawt ve lawk teh ang. New market ah sawn market area chhungah sawn mimalin ekin man chawia ek theihna an siam a. Chu chu a septic tank kha a tha silova, ruah sur laia an chhuah chuan ziaawm tak a ni a; nisat vawl vawl laitein an han chhuah a, a tum tumin a lo thlawk chhuak mai a, khami a nih tawh kha chuan tukverh khar ru tih sap sap a ngai a. Sawngte saw kan Department lam hian minrawn enpui thei em ? Engtia tih tur nge ? Man chawia ek kha a ni a, ek an lei tih kha a ni deuh ber a, saw saw thenawm khawveng tan a hnawk sak khawp mai.

S P E A K E R : A chhang thei em Minister zahawm takin ?

Pu ZODINTLUANGA, MINISTERS (INC): Pu Speaker, kan lo hria ang a Deputy peaker zahawm tak sawi kha. New market area saw Trade & Commerce Department lam ta a ni a, bawlhhlawh paih thleng sawn Trade & Commerce hian a enkawl bik a ni. Sawlai market bik saw kan Minister zahawm tak pawh hian a ngai pawimawh a, vawi 5 ngawt mai a lo va tlawh tawh a. Amaherawhchu, keimahni lam UD & PA hnuai ami a nih avangin kan lo en ang e.

S P E A K E R : A lawmawm e. Hei Affrica ram changkang lo takah ka zu kal ve a, ka thurawn hawn ber chu – khung ram changkang lo tak pawh an lo fai khawp mai a. Mumbai ah, Delhi ah, Kolkata ah kanrawn tum a, a tawp hle vek a ni, kan ram khawpuite pawh hi mi ram changkang lo taka kan ngaih ai hian. Mizoram, Aizawl leh Mizo fate hrim hrim hian tan lak kan la mamawh khawp mai, tih hi ka thurawn hawn lian ve tak a ni.

Tunah Starred Question No.16-na zawt turin Pu R.L. Pianmawia i lo sawm ang.

Pu R.L. PIANMAWIA (INC) : Pu Speaker, ka lawm e. Starred Question No.16-na –

- (a) Bawngkawn Police Station building hi Home Department hian a lei tawh em ?
- (b) Lei a nih chuan engzatin nge ?
- (c) Police Modernisation sum atanga lei a ni em ?

(d) Building leina lehkha ziah fel a ni tawh em ?

(e) He sum denchhen hian Rs.15 lakh dawng an awm em ? tih ka zawt e.

S P E A K E R : A chhang turin Pu R. Lalzirliana, Home Minister i lo sawm ang.

Pu R. LALZIRLIANA, MINISTER (INC): Pu Piana zawhna chhanna pakhatna Bawngkawn Police Station building hi Home Department hian a lei tawh.

(b) Rs. Nuai 100 in a lei.

(c) Police Modernisation sum atanga lei a ni a. Kum 2001-2002 dawn atanga lei a ni.

(d) Building leina lehkha ziah fel a ni tawh.

(e) He sum denchhen hian lakh 15 dawng an awm leh awm loh Department in hriat a nei lo.

Pu R.L. PIANMAWIA (INC) : Pu Speaker, ka lawm e. He Modernisation Scheme atanga lei tihah hian Police Quarter 57 man atanga lei a ni em ? He building an lei hi Police Quarter 57 sakna tur bill-a an lei a ni em ? tih ka zawh belh e.

Pu K. LIANTLINGA (ZNP) : Pu Speaker, ka lawm e. Hei Police Modernisation sumin lei a ni a. Tin, helaia kan zawh duh chu Vairengte Police Station kha Police Modernisation suma hnathawh tum niin a lang deuhin ka hria a. Kha kha engvanga sawn mai nge an nih tih leh hetiang Police Modernisation Scheme hi tunah hian la kal tlang chho zel a ni em ? Kum 2008-2009 ah te, 2009-2010 ah te khan engzat nge hmuh a nih ? Leh engvanga Vairengte ami kha sawn a nih ? tih kha kan zawh belh duh a ni e. Ka lawm e.

S P E A K E R : A chhang turin Pu R. Lalzirliana, Home Minister i lo sawm ang.

Pu R. LALZIRLIANA, MINISTER (INC): Question neitu Pu R.L. Pianmawia zawhna kha - helaia Bawngkawn Police Station hi kum 1993 khanin police station puitlingah upgrade a ni tawh a. Tichuan, a han zawhna ber hi Quarter 57 sakna atana lei a ni em ? tihna a ni a. A zawhbelhna hi – hei hi Quarter 57 nilovin

Police Station building 1 leh Type-III building Quarter 24 bill ti ila, a sakna atanga lei a ni, tih kha kan sawi duh a ni.

Tin, Pu Liantlinga, MLA zahawmTakina a zawhna – Vairengte Police Station hi engvanga sawn nge ? tih kha a ni a. Hei hi a sawnna chhan chu : Pakhatnaah chuan Vairengte Police Station khu kum 2003-a sak a ni a. Saitual khi U.T. hun lai 1975 leh 1976 laia sak kha a ni tawh a, chuvangin tunhma pawhin sak that tura tih fo kha a ni a. Amaherawhchu, an la sa tha thei rih lova, chuvangin Vairengte khu building tha concrete-a sak a ni tawh a, a la that avangin vuak chhiat theih a ni lova. Tin, khulai hmunah khuan a dang zu sa dawn ila, khumi vaw thiat lo khuan a leng lo bawk a, chuvangin hmun tha zawk dangte zawn chhungin Saitual atan sawn a ni.

Tin, a pahnihnaah chuan, khulaia Vairengte unauten an lo ui pawh kha, khatianga sanction a lo awm tawh si chuan han vuak chhiat hrama han sak leh kha an duh a, an la ui pawh kha a awm a, an demawm lova, a demawm bera chu Justice a awm lova ni.

S P E A K E R : Ngawi ru aw lawk, kan question hour a tawp a, kan chhan zawh tir dawn em niang ? Chhan zawh tir mai ang aw.

Pu R. LALZIRLIANA, MINISTER (INC): Kan sorkar hmasaah khan Saitual hi Congress MLA bial Opposition bial a ni a, Police Station kha ngaihsak a ni lova ni. A aia tha zawk vuak chhiat a, khatianga sak mai mai pawh kha an duh zawkna thinsung kha a tha lo ka ti a. Chuvangin Vairengte mipui emaw midang hi dem tur an awm lo. Kha laia a thalai reng, sak zawh hlim si zu vuak thiat leh a, a dang sak tumna rilru a kha a demawm ber a ni. Chuvang chuan tunah hian thudik leh a pawimawhte tih that zel kan tum avangin kan kalpui chho a ni, tih kha kan sawi duh a ni. Chu chu a sawnna chhan dik tak a ni mai.

S P E A K E R : Awle, zawhna 4 kan la hman a, tunah chuan thupuan nichina kan sawi rik tawh ang khan kan Member zahawm tak Pu B. Lalthlengliana Awmvel natnain a vei ve a, a lo kal thei lova, chu chu min rawn hriattir a, House ka'n hrilh a ni. Tunah chuan Paper Lay a ni ang a, Pu Lal Thanhawla, Chief Minister zahawm takin “The Contingency fund of the State of Mizoram Rules, 2009” hi House dawhkanah rawn lay sela.

Pu LAL THANHAWLA, CHIEF MINISTER (INC) : Mr. Speaker sir, with your permission I beg to lay in this august House a copy of the contingency fund of the State of Mizoram Rules, 2009. Thank you.

S P E A K E R : A copy kha sem ni sela. Tunah la sem zawh hma khan thil han puan lawk duh ka nei a, ka'n sawi lawk ang a. Kan Member zahawm takte kha hemi Session Hall chungah hi chuan tui kha lam loh hram nisela, in loh hram ni sela, tuihal deuh pawn recess room lamah va in ni selangin. Engemaw thil rei duh chi wind-up hunah te Minister in-charge te emaw House Leader te emaw thurei an sawi erawh chuan chungah chuan thudang ni selangin a tha awm e.

Dr. R. LALTHANGLIANA (MNF) : Pu Speaker, hemi an lehkha semah hian ka hriatthiam loh deuh hlek chu C. Lalsawta, Principal to the Government of Mizoram tih hi enge ni a awmzia ?

S P E A K E R : An chhu dik lo a ni maw, Principal Secretary tih tur a ni, Secretary an hmaih hlauh a nih hi. House Leader in ngaihdam a dil hmian chair atangin kan dil mai ang e. Principal Secretary angin Member zahawm tak ten i dawngsawng ang u, 'Secretary' kha chhut hmaih palh hlauh a ni e.

Tunah chuan Presentation of Report a ni a. Pu K. Liantlinga, Member zahawm tak leh Chairman in "Second Report of Committee on Government Assurances (2009-2010)" hi House ahrawn present sela, present turin i lo sawm ang.

Pu K. LIANTLINGA (ZNP) : Pu Speaker, ka lawm e. I phalna leh he House zahawm tak remtihain "The Sixth Mizoram Legislative Assembly Committee on Government Assurances Report" 2-na chu he House zahawm takah hian ka rawn present e.

S P E A K E R : A copy kha han sem ula. Hei Report 2-na in theh lut hman reng mai a, a lawmawm hle mai. In thawk chak a ni.

Thil dangah kan kal leh ang a. Official Resolution a ni a, Official Resolution kan hmu a, Parliament lam atangin. Tin, heti laiah Minister a changtu hnen atangin kan lo hmu bawk a. Tunah Official Resolution kan hmuh move turin Minister zahawm tak Pu R. Lalzirliana i lo sawm ang.

Pu R. LALZIRLIANA, MINISTER (INC): Pu Speaker, he Resolution hi he House zahawm takah hian kan move ang e, i phalnain. “That this House rectifies the amendment to the constitution of India falling within the purview of clause (d) of the proviso to clause (2) of article 368 proposed to be made by the constitution (One Hundred and Ninth Amendment) Bill, 2009 as passed by both the Houses of Parliament” Thank you.

S P E A K E R : Awle, a copy kha kan nei vek tawhin ka hria a, Parliament in hnihin an pass tawh a ni a. Dan angin State MLA tena kan lo ratify ve tur kha a ni a, hei a ti thei zingah Mizoram State min rawn thlang ve a. Chu chu tuna mi kha a ni a, a awmzia kan hrethiam vek a, keimahni Tribal te leh Anglo-Indian te hamthatna tur lam chi kha a ni a. Han sawi duhte kan awm a nih pawhin minute 5 aia reilo sawi niselangin, han sawi duh nei kan awm em? Hemi kan Resolution chungchangah hian, hun i lo hawng ang. A move tu khan han sawifiah hmasa phawt sela.

Pu R. LALZIRLIANA, MINISTER (INC): Aw Pu Speaker, tuna kan Speaker zahawm tak khan a rawn sawifiah vek tawh a. Chi dang han sawifiah teh chiam pawh a tul lova. Kum 10 atana han tih belh lehna tur a ni a, hei hi State zawng zawngina an neih a ni. Chuvang chuan keini pawhin kan lo tih ve kha a ngai a, Parliament dan siam a ni tawh a, keini'n kan lo hriatpuia kan lo pass ve a ngai a; chumi pass pui tur chuan ka han sawm che u a ni.

Pu LALDUHAWMA (ZNP) : Pu Speaker, kan hriat vawikhatna a ni a, a copy pawh kan la dawng lova. (Speaker... Engati nge Hon'ble Member te kha inlamah kan sem vek khan ka hria a) A move tuin an move khan enge a move kha kan hre chuang reng reng lova. Kum 10 atana tih a ni e, a ti mai a. A eng chu nge kum 10 atan a tih pawh chu kan hre chuang ta lova, kan va bangbo deuh ve mawle. Constitution Amendment ni turah kan ngai ringawt a. A har deuh chi State 2/3 in an pawmpui ngai chi kha a ni awm mange! (Speaker... Aw ni e.) A nih chuan kan hamthatna tur te a nih pheih chuan kan pawmpui mai tur a ni a. Ama'rawhchu, State te khan kan pawmpui dawn leh dawn loh te, pawmpui tlak a nih leh nih loh te, enge a nih te kha chianguang deuh hleka hriat hi chu kan right chu niin ka van hre em ve aw!

S P E A K E R : Bulletin lamah khan kan rawn ti tawh a. Article 334-na Scheduled Tribe leh Anglo-Indian te reservation kum 10-a an tih that leh thin kha a ni a. Hei, kum 10 atan India Constitution siamtuten an han ti a. Chutah amendment an siam chho zel a, 1959-ah te, 1969-ah te, 1980-ah te, 1989-ah te, 1999-ah te kum 10 lek lek in an extend zel a ni a. Tunah Minister in han sawifiah rawh se. I moved dan a la chiang lo a ni ang.

Pu R. LALZIRLIANA, MINISTER (INC) : A chiang vak lo a ni, chiang tur ang deuha kan lo ngaih a ni a. Pu Speaker, kan sawifiah leh deuh hlek ang a. Hei hi Seat Reservation chungchang a ni a. Kum 50 kan lo hman tawh a ni, chumi kum 50 hman tawh chhung chuan Scheduled Caste leh Scheduled Tribe te, Anglo-Indian tena helaiah hian Seat Reservation atana an lo hman tawh thin a ni a. Chutah chuan a hun a lo tawp ta a, a hun a lo tawp chuan kum 10 zela extend thin a ni a. Chuvangin keini Scheduled Tribe te, Scheduled Caste te leh Anglo-Indian tena India ram ami aia tlema hnufual deuha kan lo awmna Seat Reservation te kan la neih chhoh ve zel theihna tur atan Parliament hian extend leh turin a rawn ti a. Chu chu keini State pawh hian kan extend ve a ngai a, kan lo pawmpui ve a ngai a, chuta tan chuan tuna Bill hi kan han move a ni ber e.

Pu JOHN SIAMKUNGA (INC) : Pu Speaker, ka lawm e. Awle, hei tuna kan Home Minister zahawm takina Official Resolution a rawn putluh hi kum 10 dan zelah scheduled caste te tana reservation siam chungchang a ni a. Tribal te hian 7.5% kan chang ve thin a, public enterprise a ni emaw, sorkar thil chi hrangah, sorkarina sum a thawhah te, khang institution hrang hrangah te khan. Chutih lain scheduled caste ten 15% an chang thung a, chumi reservation extend na tur a ni tun ami hi. Hei hi general category a nih pheih chuan an duh lo thin hle a. 1989-ah pheih kha chuan Mandal Commission dona avangin mi engemaw zat an inhal hlum phah ta a ni.

Tribal te hi scheduled caste nen spoon feeding hi kan ti reng dawn a ni, tih issue a lo chhuahna kha a ni. Chu chu reservation dang, other backward class te kha siam a lo ni ve leh ta a. Supreme Court ruling khan 50% hi a pel tur a ni lo, reservation hian a tih avangin tunah hian 27% angin an chang thung a. Keini tribal leh scheduled caste te hian 22.5% kan chang thung a ni.

Chumi chu extend leh ila tribal ho hamthatna tur leh scheduled caste ho hamthatna tur hi kum 10 dang i belh leh ang u, an rawn tihna resolution a ni e, ka lawm e.

Pu LALDUHAWMA (ZNP) : Pu Speaker, Member zahawm takin a sawi kha he resolution tum hi a ni em? tih te kha min han hrilhfiyah sela, a buk thelhin kan thelh palh ang e. Keini tribal ten political reservation kan neihna, parliament leh State legislature ten reserved seat kan neihna hi a ni zawk lawm ni kan pass tur a hi? Sorkar hna reservation nilovin. A nih chuan a tha mai a, kan chiang ta a. Ama'rawhchu, kan han sawi zel khan a eng ber nge kan pass tih te pawh kha a chiang leh zual dawnin ka hria a, min hrilhfiyah leh zel sela, tichuan pass ila a ni mai.

S P E A K E R : Ngawi lawk rawh, a phut a kha Minister a ni a, Parliamentary Affairs Minister hi ka'n ko daih teh ang.

Pu LALSAWTA, MINISTER (INC): Pu Speaker, ka lawm e. Keini tribal, scheduled caste te, hengho hi Indian Constitution 1949 November khan peih a lo ni a, 1950-a Republic Day kan neih atanga hman tan a lo nih kha. Kum 10 (sawm) chhung atana nung zelin hemi reservation a hi tihnun chhoh a ni a. Kan ngaihthlak tak, Member zahawm tak Pu John Siamkunga'n a sawi ang khan, khatianga tih kha hemi Vai tam zawk hi chuan an ngaitheilo viau a, spoon feeding angah ngaiin tribal te, scheduled caste te hi engah nge hetiang a duhsakna bik kan neih ang? Keini pawh IAS Central Service ah te an tlin fo bik lem ang? tih ang te.

Tin, education ah institution tha tak takah te an kal theih loh naah te, kan kal theihna te a lo awm thin a. Mahse India ram hi a enkawltu hnam, hnama chiang tak, dinhmun hniam zawkte pawh hrethiam tak an nih chhoh zel avangin kum 10 dan zelah tihpun chhoh a lo ni a. Kum 60 hi a lo ral tep ta mai a, kum 10 dang, kum 70 ni leh turin tun Article 334-a reservation awm a hi India Dan Article 368 hmangin tih danglam theih danah khan hetia han sawi mai chuan a harsa chi i ti mai ang, State tinina, State engemawzatina an ratify, an pawmpui ngai chi khan tih a lo ngai a. Chuvang chuan India rama State zawng zawngte hian kan ti thei lo a nih pawhin hmun thuma thena hmun hnih emaw tal khan a lo ngai a. Keini pheih chu phur taka ti tur kan ni hrim hrim a. Vawiina kan motion lo lut hi keimahni hmalakna leh keimahni ang ve bawh hnam mawlte chawikanna leh dinhmun pangngaia han in dintirna atana hmun pawimawh tak a ni. Khalai kha ka sawifiah thiam dan a ni mai awm e. Ka lawm e.

S P E A K E R : Member zahawm takin a rawn tihna kha chu scheduled tribe te, scheduled caste te reservation dang ang nilovin hei chu Parliament leh Legislative Assembly-a aiawh an neihna reserved na kha Article 334 hi chuan a tum a ni lawm ni?

Tuna kan passed a hi, heti laia IAS quota emaw khati laia quota dang nilo kha MLA Hon'ble Member te, Hon'ble M.P te, chumi atana quota lam kha a ni lawm ni, a rawn tih kha ka duh angin i la chhang lo, sorkar lamten.

Pu R. LALRINAWMA (INC) : Pu Speaker, ka lawm e. Kan Speaker zahawm takin a rawn sawifiahna kha a dik a, kan Member te kha a copy resolution pawh inlama pekte an ni a, an lo hmu hlawm lova. Chuvanga a motion pawh kha han chawhpawlh te a ni mai thei a, a hriatthiam awm thova. He resolution tribal te, scheduled caste leh scheduled tribe te kan tih, tun ami hi chu Parliament leh State Legislature seat reservation chungchang Article 334 ina a

sawi chungchang a ni. Pu Speaker, i sawifiah ang chiah khan khatianga a hun kum 10 zela a lo tawp leh tak avangin kum 10 danga pawh sein tur Parliament, both Houses in an passed tawh a, chu chu constitution ah hian amendment siam harsa bik State tam zawkin a ratify lova, amend theih loh, tihdanglam theih loh tam tak a awm a. Chung zinga mi a nih avang chuan Parliament In hnihin an passed tawh hnuah State ina kan lo ratify ngai ve a ni a. Keini State tan phei chuan Minister zahawm takin a sawi ang khan lawmawm tak a ni. Keini'n kan nawr ngai lovin Parliament In hnihin an lo passed tawh a ni a. Tunah pawh State tam zawk chuan an ratify tawh a, chuvang chuan keini pawh hian lo ratify ve ila, lo pawmpui ve ila, tih chu ka sawi duh a ni. Ka lawm e.

Dr. R. LALTHANGLIANA, (MNF): Tawitein, kan buaina ber a kha chu kan hmuh tur ang hmua min ngaih kan hmu lo kha a ni mai a. Kha kha chu hmu tlang ila chu hriat loh tur a awm vakin ka hre lova, kan Member te pawh kan chiang lo tlat mai a. Amaherawhchu, House chhunga kan sawifiah kha kan pawmnaah khan ngai lui dawn ta mai ila. Ka sawi duh lai tak chu tun hnuah chuan kan rorelna sang berah hian kan chian fek fawk theih nan tunhmaa kan tih ang khan han hmu kim thei ila chu a tha viau mai a, engemaw hmu lo kan ni deuh vek mai a helampang amiho hi, ruling bench lam kha ka hre lova. Chuvang chuan thil pawimawh tak mai a ni a pass loh theih loh tur ang chi niin ka hria a, ama'rawhchu, tun hnu zelah erawh chuan helaia House-a Agenda awmzia sawifiah vak ngai tawh lova awlsam tea hun la rei lo zawnga tih mai theih chi niin ka hria a. Hei hi chu awm tawh lo sela, khatiang kha tun tumah erawh chuan inhrethiam tlangin kan fiah tlangah ngai ta ila, pass mai kha a tha lawm ni, kan ti a ni.

S P E A K E R : Ngawi rawh lawk, Hon'ble member te pawh hi mi tul tak kan ni a, kan Assembly Secretariat atanga Bulletin kan rawn thawn che u hi lo en hman lo in awm thin a nih a rinawm a, a tul a nih chuan zanlaiah pawh intirh rawk rawk zel a ni session lai hi chuan. Chuvang chuan lo indap chiang leh ulangin, khawiah emaw chuan kan rawn thawn vek tawh a ni heng pawh hi keini Secretariat lam hi chuan. Ama'rawhchu, wawiin sawiho dawn niah ber hian niminah te min rawn pe lova in tih chuan thudang nise langin, kan rawn thawn vek ni chuan kan hria a ni keini office lam chuan.

Tunah Pu R. Lalzirliana, Minister zahawm tak lo sawm ilangin, pass rawn dil nghal mai se a tha ang, kan chiang tawh e. Kan chian rengte pawh hi chiang lo anga han tih te pawh hi kan ching ve bawk a nia.

Pu R. LALZIRLIANA, MINISTER: Pu Speaker, ka lawm e. Helamah hian rei kan la thu lova, zirtiri bawl deuh taka thil tih te hi a ngai ve a. Tin, hei hi kei a tih tur em ni ang aw tih te kha ka rilruah chuan ngaihtuahana a awm a.

Parliamentary Affairs Minister tih awm tak tih te pawh rilruah a awm a. Engpawhnise, thil dangte nena han ngaihtuah pawlhte pawh a awm thei a, kan lo hriat fuh lohna lai deuhthe a awm chuan ngaihdam ka han dil a. House zahawm takah hian inthlahdah vang erawh chu a ni lo a, ka la chiang chiah lo a. He kan han ratify tur a hi chiang deuh hlekin kan sawi ang a, hemi Constitution of India Article 334-naah chuan scheduled caste leh scheduled tribe te tan Parliament leh State Legislative Assembly seat hauh sakna leh Anglo-Indian te tan Parliament leh State Assembly ah te aiawh neih theihna tura nomination siam theihna chu hei hi tuna kan han sawi taka kha a ni ber a.

A chungka kan han sawi tak nomination leh reservation nomination te hi pawhsei a nih loh chuan January ni 25, 2010-a tawp mai tur a ni. Kum 60 liam ta chung hian scheduled caste/tribe te hian kawng tam takah hmasawna leh changkanna nei mahse, India Danpui duangtu Constituent Assembly in he Reservation leh Nomination neih theihna dan a siam chhan dinhmun hi a la danglam lo hle a. Chuvangin Parliament In hnih chuan lungrual takin he Dan kum 10 dang hman zawm lehna tur hi amendment hetiang hian a lo pass ta a. A lo pass danah chuan, “This Act may be called the Constituent Act, 2009, it shall come into force on the 25th day of January, 2010”. Pahnihnaah chuan, “In Article 334 of the constitution for the word sixty years, the word seventy years shall be substituted”, tih a ni a. He Amendment hi Rajya Sabha in 3rd August, 2009 khan a pass tawh a, Lok Sabha in 4th August, 2009 ah khan a pass ve leh a ni. Hetiangin Parliament In hnihin pass tawh mahse Constitution Article 368 clause (d) of the proviso to clause (2) in Danpui siamthat (amend) dan tur a sawi angin State Legislature zawng zawng zatve aia tamin an remtihpui a ngai a. Chutiang a nih chauhin President remtihpuina a thawn theih si a, chuvangin he Amendment hi keini scheduled tribe te tan kan hamthatna tur leh kan hmakhua min thlir puina a nih avangin he Resolution hi lungrual taka min pass pui turin Member zahawm takte ka sawm che u a ni.

S P E A K E R : Awle, Minister zahawm tak Resolutin neituin House pass pui turin min rawn dil ta a. He Official Resolution hi pass remti apiangin remti ti ang ule, remtilo kan awm lova.

Awle, House in lungrual takin he Resolution – ‘That this House ratifies the amendment to the constitution of India falling within the purview of clause (d) of the proviso to clause (2) of Article 368 proposed to be made by the constitution (One Hundred and Ninth Amendment) Bill, 2009 as passed by both the Houses of Parliament’, chu House in lungrual takin a passed ta a ni.

Pu R. LALZIRLIANA, MINISTER: Pu Speaker, ka lawm e.

S P E A K E R : Tunah chuan kan business dangah kan kal tawh ang a. Annual budget 2009-2010 House-a rawn present tawh kha general discussion kan nei dawn ang a. Member tinin minute 15 or 20 kan tih dawn ? Kan hun neih duh dan kha 15/20 a tlem duh pawh pawilo lam turah ngai ila. A chhan chu Demand kha kan la sawi zel dawn a, khangah khan vawiina general discussion-a kan sawi takte pawh kha sawina chance kan nei dawn a, minute 15 nge 20 le ! Eng nge ni House duh dan.

Dr. R. LALTHANGLIANA (MNF): Pu Speaker, tunhma atang khan tihdan phung kha kan nei deuh a, ka hriat sual loh chuan minute 15 kha niin ka hria a. A sawi velo lampang chi deuh hlek kan awm a, ama'rawhchu, Minister demand sawinaah chuan minute 10 kha a ni thinin ka hria a. Chuvang chuan 15 kha chu ni 2 kan sawi dawn a, naktuk a la awm nileng bawk a, a tha leh mai lawm ni.

S P E A K E R : He House-a sawi tura mipuiin zalenna an pek kan ni bawk a, min phuar lutuk lo minute 15 i ti ang aw. Minute 15 chu hman zawh kher tur a ni lo a nia.

Pu R. LALZIRLIANA, MINISTER: Pu Speaker, kha kha lo ni ta se, kan lo rilruk dan deuhah chuan minute 10 te a tlangpuia kan lo sawi thin dan a ni a. Group leader te minute 15 te han ti ta ila, kha kha a tawk tiuteu viau lo maw te lo ti ta ila, ama'rawhchu, i thu thu nisela.

S P E A K E R : Chu pawh chu a tha leh angreng viau mai. Group leader minute 15, Member pangngai minute 10 niselangin. Nakinah a wind-up tu lam erawh kha chu naktuk lam turte a ni a, in la sawi chawp ang a. Vawiin atan chuan Member te kha minute 10 in pe ila, amaherawhchu, hetilai chair atang chuan minute 10 kha fet lutuk lo tur deuhah te pawh in ngai ila a tha awm e.

Tin, nichin ami ah khan kan kir leh lawk ang a, kan Home Minister Resolution kha ni 13 kan session tan hma nihnihah khan bulletin ah kan rawn thil tel vek a nia. Kha kha lo keng chhuak leh ulangin, a lawmawm ang.

Awle, tunah chuan general discussion kan lo tan dawn tawh ang a. Tunge sawi hmasa dawn le ? General discussion i lo tan ang ule. In sawi duh dawn nange, kan wind-up tir mai dawn em ni ? Leader kan ko mai dawn em ni ? E.. Pu P.P. Thawla.

Pu P.P. THAWLA (MDF) : Pu Speaker, beisei loh takin general discussion ah kan ding hmasa ber ve ringawt mai ang a. A hmasain hei keini ang constituency kilkhawr tak atanga lo thu lut ve tan chuan, House zahawm takah hian mahni chanchin hi han inhriat chiantir leh thin pawh hi a tul ka ti a, chu chu kan sawi hmasa duh a. Ka hming hi ka han sermon teh ang.

Ka hming hi Mizo tawnga phuah a ni lova, Mara tawng pawh a ni lo. A phuahu rilrua awm puanchhuah tawp a nih avangin lam dik te, sawi dik te, koh dikte pawh a harsa ve a. Chuvang chuan House zahawm tak ka'n hrilhfiah duh a. 'Thola' tia ziah chuan tho rawh tih lam a kawc duh viau a, tho la han tih lampanga lamrik hi awlte a ni. Tin, a thenah chuan 'Thalla' tia ziak mai an awm bawc a, double 'L' lo kha a tha zawkin ka hria a. Tin, a then chuanin Thawla han tih hi, han dah thawl ta viau te pawh kha thil awlte a ni ve a, chu pawh chu tumah dem tur chu an awm chuang lova. Amaherawhchu, tihdan tlangpui chu 'Thawla' tia koh hi a lamrik dan a ni tih kha ka'n sawi duh a. Khatia han lamrik khan chuan a eihu tan pawh a nuam deuh zawkin ka hria a, chu chu House zahawm tak ka han hrilh hmasa duh a ni.

A dawt leha kan sawi duh chu Pu Speaker, he House zahawm takah hian kan hrilhfiah duh chu kan party hming hi a ni a. Pathian zarah hei regional party te takte aiawhin tum hnih ka tlinna a lo ni tawh a. Chanchinbuah te leh mi tam tak tawngkamah hian kan party hming hi Mara Democratic Front tih mai thin hi a ni a. Amaherawhchu, House ina min hriat sak atana ka duh chu Mara Democratic mai nilovin Maraland Democratic a ni a, Maraland tih kher kha kan ngai pawimawh hle a. Chuvang chuan Maraland Democratic Front han tih hram ni sela, tih hi House zahawm takah ka sawi ve leh duh a.

Kum 2003-a kan Assembly lamina Who's Who an chhuahah khan P.P. Thawla Independent tih a ni a. MDF kan han chuan ve tehlul nen, kumina an chhuah leha pawh khan P.P. Thawla, Mara Democratic Front tih tho a ni. Chuvangin hei hi ka sawifiah tam lo a ni ang a, tih rilru puin waviinah kan discussion ah hian hun hmasa ber ka han chan takah chuan introduction chiangkung tak mai ka han tarlang duh leh a ni.

A dawt leha ka han sawi duh chu –hei MLA zahawm tak 40 zingah keini Saiha District atang hian pahnih kan thu ve a. Pakhat zawc chu National Party aiawha thu a ni a, kei hi Mara Hnam Party aiawha helai House-a thu ka ni tih kha ka han sawifiah duh a ni. Maraland Democratic Front aiawha mipuiten duh tak, tum bik tak neia an thlan ngat kha ka thu ve a ni, tih kha ka han sawi duh a. Chuvangin Pu Speaker, pakhat zawc kha Mara mipui thlan ve tho a ni a, ani Mara mipui thlan ve ve kha engnge a danglamna? Chuvangin hmana ka ngen tawh ang che khan, harsa tak kara kan han dinchhuah a, ka han sawi hi chu min ngaih pawimawh sak hram hram turin leh ai ka awhte duhsakna avang pawhin rilruah min hriat sak kha ka duh a. Chu chu ka sawi lang hmasa duh a ni.

Awle, a dawt leha ka han tarlan duh chu Pu Speaker, hei Pathian Hnamthlan, Mizoram mipuite kum 2009-2010 inkara ka chawfun tur thu, kan budget thu kan sawiho dawn a ni a, a lawmawm hle a. Tin, budget kan tih vawikhatna a ni bawk a, kan House leader zahawm tak pawh khan thahnemngai takin darkar 1:20 lai a han sawifiah a. Chuvangin tun tuma kan budget hi mipuiten kan nghakhlel em em a ni, tih kha ka han tarlang duh bawk a. Kan budget hi nikum aain a tam zawk hle a ni. Tin, sorkarna kalpuitute in policy tum bik tak, mipuitena an vei tel a nih avangin tuna kan budget hi han kal chhoh zel, han hman chhoh zel hi thil chakawm tak a nihna lai kha ka'n sawi duh a ni.

Tin, a dawt leha kan sawi duh chu – hei term kal taah khan a hmingin sorkarna lamah khan ka tel ve a. Soil Department te, PHE Division te leh Forest Division te, Saiha District Headquarter ah hian a lo awm lova. Kum 1979 term-a sorkarna lo kalpui tute khanin Lawngtlai khawpui lamah, District Headquarter lam lovah an lo dah ta si a. Chuvangin Soil Department Minister ka han nih veleh khan thahnemngai takin hma ka han la tan a. Hemi Department pathum Soil Department, PHE Department leh Forest Department hi Saiha District Headquarter Division dah ve ngei turin thuneitute ka ngen char char a. Tichuan Soil Department kha tihhlawhtlin hmasak ber a ni a, Office tur te, Division Officer Quarter tur te leh IV Grade Quarter tur te sak zawh a ni tawh a, building sawm bawr vel sak leh tur awm angin hriat a ni. Amaherawhchu, vawiin thleng hian office lampang peih a nih tawh hnuah pawh a function lampang kha sorkarin hma an la hman lova, tuna sorkar tharah hian a hma lama kan hotuten he division ah hian office leh staff quarter pahnih a awm bawk chuan staff hi a hranpaa han lak belh vak vak pawh a ngaiin ka ring chuang lova. Head of Department a awm a, tanpuitu pali/panga a awm chuan hna hi bul a tan theih thovin ka hria a. Chuvang chuan he sorkar chak tak lo piang hian Soil Division, Saiha-a function nghak renga inpeih tawh khi, a hma thei ang bera min function sak ka duh em em a. Chu chu ka han tarlang duh a ni.

Tin, PHE Division pawh hi chutiang bawkin election hma khan Division hawn tur thu puan a ni tawh a, hei phe chu vanneihthlak takin E.E. te pawh dah a ni tawh a. Kan hnung maiah khan a changtu Minister zahawm tak pawhin official inauguration a han nei tawh nghe nghe a. Hei hi changtlung zawka a office pawh a hran tea a lo nih chhoh zel theih nan kan budget thar atang hian hmalak theih hram nise, tih thahnemngaih thu kan han tarlang duh a ni. Forest Division erawh chu tun sorkar tharah hian beiseina sang tak nen kan lo um chhunzawm leh turah ka ngai a. Kan budget thar neih chhoh zel turah hian hei pawh hi hma min lak sak ngei ka beisei a ni.

Pu Speaker, kan budget han en han en hian, kan ram leilung hausakna atanga haichhuah sum nilo mahse, Pathian zawn chhuah ram leh hnam kan ni a. “Hnampuite hausakna in la tawm dawn a ni” tih a, kan share tur leh kan chan tur ang kha kan dawng tam thawkhat hlein ka hria a. Chutilaia thil hriatthiam har ka tih em em thin chu, kan budget a pung chho zel a, tunah phe chuan kan budget pangngai piah lamah central sum Non-Lapsable pool fund lam atang pawh

hian, hnampui hausakna zem ami pawh kha nasa takin project chi hrang hrang nen haichhuah theiha a awm tawh hnuah, kan ram hmasawn dan han ngaihtuah hian duhthu a la sam lo fo hian ka hria a. U.T. hun laia Mizoram kilkhawr lampang, district kil lampang deuha Department dah tawh te, staff dah tawh te, building dah sak tawh hote hi tunah hian building tha hmuh tur pawh a awm tawh lo. Staff pawh an indaih tawh lo tiin ruak reng hi a tam tawh khawp mai a. Zawhna te kan han siam bawk thin a, chungachte pawh chuan a tangkai lo a ni ringawt zel mai a. Chuvang chuan hei hi tun sorkar thar chak tak hian enfiah leh ni hram sela, building kan lo neih tawh tha taka bul tan tawh hi a maintain lampangah hian uluk ta ila. Staff awmsa, a awm leh ta lo tih angte hi tha takin dah leh ila. He Zoram hi mawi taka kalpui a nih theih hi ka duh em em a ni.

Awle, Pu Speaker, a dang lehah chuan vanneihna riau kan neih kan tarlang leh duh a. Kum 1994- tuna kan House leader zahawm takina sorkarna a kalpui lai khan, District Council pathum ho hian enhancement of power, thuneihna lian zawk kan lo dawng tawh a, kan lawm hle a, ropui takin kan lawm a. Tun term ah hian he sorkarna Leader ngai bawk hruainaah hian beiseina sang tak kan nei a ni, tih kha House ah hian ka han tarlang duh a. District Council ho tan pawh hamthatna lo lang tur, ri ret ret angte pawh awm ni pawhin ka hria a, chuvang chuan beiseina ka nei sang hle a ni, tih kha ram mipui aiawhin ka han sawi duh a. Kan State budget pawisa mai bakah central sum lo kal thin te pawh hi a kalkawng thui hle thin mahsela, kang lakah hian far chhuak ral lo sela, a hmun leh a tum ramte hi chiang kek kawh hian kim deuhin thleng thei zel sela, a tum tihlawhtling thei ni zel sela tih hi ka sawi duh a ni. Nikumah khan central Minister zahawm takin Saihaah Election Campaign a rawn bei a. 1995 ah Chhimtuipuiin chhiatna rapthlak tak kan tawh laia sum central lamin min rawn tanpuina nuai 475 lai kan pe che u a, nuai 60 vel chauh in hmang a, tiin min hauhrep mai lehngal a Saiha bazarah, khatiangte kha kan ramah hian awm tawh lo hram sela. Politic ka la luhchilh hma te a la ni bawk a, ka hrechiang lova, chutiangte chu kan experience atangin hriat tur a awm a. Chuvangin khatiang ni tawh lo turin tun sorkar tharah hian keini constituency kil leh district council lam atanga Member lo ni vete hian beiseina he sorkar tharah hian kan nei a ni, tih kha kan sawi duh a ni. Pu Speaker, ka lawm e.

S P E A K E R : Member te ka'n ngen duh che u chu, he House ah hian Hon'ble Member te hi Mizoram mipuite aiawh kan ni a, chi bing emaw, hnam bing emaw, a hmeichheho bik emaw, nula, tlangval bik emaw; chutiang aiawh kan nilo a ni, tih kha i hrereng tlang ila tih kha ka'n ngen duh che u a ni.

Tunge sawi leh dawn? Sawi tur kan awm lo em ni? Kan wind-up tir mai dawn em ni? E.. Pu Chawngtinthanga.

Pu CHAWNGTINTHANGA (INC): Pu Speaker, hun min pek avangin ka lawm e. Vawiin hi Budget Session-a ka din ve vawikhatna a ni a, a sawi dan pawh ka thiam lovang tih pawh ka hlau hle a. Kei chuan kan budget tlangpui kha a fleeting comment han pek ve hrim hrim ka duh a, ka lo ding chhuak a ni. Explanatory memorandum on the budget 2009-2010 te, micro-economic frame works statement leh annual financial statement 2009-2010 te atang khan a lan dan chuan kan GSDP 2006-2007 te, 2008-2009 te a growth rate hi duhthu a la sam lo hle a. Kan per capital income 2006-2007, 2007-2008 leh 2008-2009 pawh hi National level per Capital Income nena khaikhin chuan a la beitham deuh hle a. Mahse economic resources kan neih ang angin economic develop ah kan ziaawm ve tan hle niin a hmuh theih a, a lawmawm hlein ka hria.

Kan Annual plan out-lay pawh hi 2009-2010 ah hian crore 100 atangin crore 1250 ah a chho dawrh mai a, hei pawh hi a hnuah hei aia tama la tih chhoh nghe nghe niin a lang a, kan Report atang hian, a lawmawm hle a, a thlamuanthlak ka ti a. Kan sorkar chak tak hian Social Economic lama hma la tura thil tul makmawh infrastructure nghet tak siam tura ngawrh taka hma lam a tumna te kan han hmu a, a lawmawm ka ti a. Heng development infrastructure siam nan hian Public Private Partnership hman tangkai tumna te pawh kan Chief Minister khan a rawn sawi chhuak a.

Tuivai Hydel Project pawh P.P.P mode-a funding hi ngaihtuah a nih tur thu te pawh kan hria a. Chutianga Centre Sector Scheme leh Foreign investment te pawh a tul anga hmang tangkai tura tan lak tumna hi a remhriatthlak hlein ka hria a, lawmthu kan sawi tur niin ka ring a. Ram mipuiten dinhmun siamthat an mamawh a, a bik takin mirethei chhumchhiate chawikanna atana Mizoram sorkarin NLUP Programme a taka bawhzui tura hma lak a tum te kan han hmu a, a ropuiin a lawmawm hlein ka hria a.

Kawlphepha thar chhuah chungchangah pawh theih tawpa hmalak tumin kum 7, kum 8 chungang chuan mahni intodelh chang pawh nilovin, a surplus pawh thar chhuak thei hial tura tan lak tumna te kan han hmu hi a ropuiin ka hria. Tin, land reforms chungchang te, ramngaw siamthat leh leilung hausakna dapchhuah chungchang te, human development hrim hrim te, nasa thei ang ber leh a chak thei ang bera kal tura sorkar inpuahchahna kan budget ah a hmuh theih a. A lawmawm tak zetin ka hria a, a thlamuan thlak a ni.

Tun kan dinhmunah chuan State economy hi duhthusam a ni rih lo deuh. Mahse kum 2009-2010 atan kan annual plan outlay crore 1250 a han pung chho thut mai te, hemi rawn tuihnih turin Central Special Schemes hrang hrang NEGS te, NLCRR te, CSS leh CPS leh a dangte nena tangkawpin, puitham takin kan sorkar hian hmalak a tum a ni tih a hmuh theih a, a lawmawm takzetin ka hria. 2009-2010 budget ah hian sorkarin a tum pui ber nia lang chu ram leh mipuite economic dinhmun chawikan a ni chiang hle a. Mipui tinzawn leh a bikin mirethei chhumchhiate chawikanna atana ruahmanna budget, mipui tana budget

mipui thleng phak budget niin a lang a, a lawmawm ka ti takzet a, chu chu ka rawn din chhuahpui a ni e. Pu Speaker ka lawm e.

S P E A K E R : Tunge sawi leh dawn ? In awm tawh meuh nange ? In sawi peih meuh lo a ni maw ? Kan bial pawh kan vei meuh lo a ni maw ? Pu R.L. Pianmawia.

Pu R.L. PIANMAWIA (INC) : Kan Finance Minister zahawm takin tun tuma budget a pharh hi lawmthu sawina tur hlir mai a nih avangin, lehlama thu hote pawh hian lawmthu han sawi kha an hreh mai niin an lang a, an tawng chhuak duh lo mai niin an lang a. Chuvang chuan lawmthu sawina tur kan neihte hi sawi kim lo mah ila, sawi duh an awm si loh chuan a then tal tarlang ila ka'n ti a. Chuvangin a lawmawm em em a ni tih kha Member te hian tawng loha kan puanchhuah niin ka hria a, a lawmawm hle in ka hria. Ka hma ami'n a sawi ang khan, Power chungchangah te, Hydel Project, Public Private Partnership hmanga thawh tur a nih chungchangah te leh Sixth Pay Revision hmang thei tura budget-a sum kan han dah thei te hi a lawmawm ka ti em em a. Tin, zirtirtu harsa tak takte chhawknna tura VRS ruahmanna awm te, tin, tihhnawk thian chungah sum leh pai tam tak budget-a kan han nei thei te, hmalam pana ke kan han pen thei te hi a ropuiin ka hria a.

Tin, mirethei te, chhumchhiate thleng phak tura NLUP nghahhlelawm tak mai changtlung taka ruahmanna lo lang thei te kha a ropui ka ti a. Tin, ILP kan tih thin kan duh tawk loh, chimral kan hlauhna te pawh kan sawi thin a. Chumi laka min veng theitu tur Comprehensive Land Reforms kalpui dan tur ruahmanna fel tak an han ruahman te hi a ropuiin ka hria a. Tin, Oil and Natural gas policy mumal tak an han duang chhuak a, hei hian kan ram tana hmasawna a thlen dan tur chu hmanniah khan kan ngaithla tawh a, kan hriain ka ring a. Tin, thalaite hmakhua atan Catch them Young buatsaih te, Youth Commission dina IAS coaching a ruahman chho ta te, Sport Promotion Centre District Headquarters tina dah tura ruahmanna awm te, kan la neih ngai loh HRD hnuaiah, Indian Institute of Information Technology te, National Institute of Technology tih te, Institute of Medical Science tih te leh Agriculture University tih te kan nei thar thei tur hi a ropuiin a lawmawm ka ti em em a.

Tin, kan khawpui tawp kan duh tawk lohna lai kan sawi kan sawi ang chite pawh ADB Loan hmanga ruahmanna thui tak kal chho an awm te leh hmachhawp an awmte hi lawmawm ka ti a. Tin, MLA local area development atana sum kan neih thin beitham takte, tun tumah nuai 25 sum harsa tak chungah hlan chhoha an awm ta te hi a lawmawm ka ti a. Tin, Dan leh Dun lamah te, zirna lamah te kan dinhmun tha zawka kal theihna tur atana ruahmanna Mizoram Law Commission din thar te, Mizoram Education Reforms Commission dinte hi he budget pharhnaah hian a rawn lang a. Hei hi kan ram leh hnam veina tak tak thinlung pua ruahmanna kal a nih avang hian a lawmawm ka ti em em a. Tin,

miretheite ngai pawimawha dah pawimawhtu a nih zia lantirna atan he budget ah hian chhiah thar lakna engmah lang a awm lova, a lawmawm tak meuhin ka hria. Chuvang chuan vawiinniah he House hian he budget lawmawm tak pharh an ni hi lawmthu sawia pass nghal mai te pawh kha a duhawmin ka hria a. Tin, kan sorkar hmalakna mipuite leh mi hrang hrangtena kan han thlawpnaah hian lawmawm ka ti a, Two-wheeler, Taxi, Maxi-cab leh Bus neituten sorkar ina mipui, mirethei zawkte dinhmun hriaa ruahmanna siamte lungrual taka an han zawm a; two-wheeler bikte phei chu side-glass vuah vek tur an han tih khan dawra an zawrh zawng zawng pawn a daih loh khawp a ni a, an lei zo nghal vek a ni. Chuvangin hetiangam ram leh hnam veina tak tak thinlung pua he budget ruahman a ni ta hi lawmawm ka ti tak meuh meuh a. Vawiinniah Member zawng zawngte pawh hian lawmthu sawi mai hi kan hmabak a ni lawm ni, tih kha Pu Speaker ka sawi duh a ni e. Ka lawm e.

S P E A K E R : A lawmawm e, hun i hmang reilo thiam khawp mai. Tunge sawi leh dawn le. E... Pu Selthuama.

Pu R. SELTHUAMA (INC) : Pu Speaker, ka lawm e. Member zahawm tak Pu Chawnga sawi ang khan ka thusawi ve vawikhatna a ni a, ka lawm khawp mai. (Speaker... Chuti chu minute 3 ka pek belh thei ang che).

A hmasain hei budget session hun pangngai ni tawh lo, thla engemawzata tlai ah budget session kan han nei chauh a, kan nghakhlel hle a. Amaherawhchu, kan duh angin a hma thei lova, chutichung chuan kan hotuten tunah hian budget tha tak mai kan Finance Minister zahawm takin a rawn pharh chho hi a lawmawm ka ti a. Hei Annual Plan final theih loh avanga he budget session pawh hi nei thei lo reng kan ni a. Amaherawhchu, tlai pawh hi manhla hlein ka hria a. Dan naranin Annual Plan hi za-a sawmin tihpun thin a ni a, Department ah plan kan siam pawhin 10% aia tam hian siam min phalsak ngai lo a ni, planning hovin. Tichuan keini bikah chuan central in nikum budget atanga a punna chu 25% in a han pung ta a, hei ringawt pawh hi a lawmawm hlein ka hria. Hei hi kan Chief Minister zahawm tak hmalakna zar a ni tih hi he House hmaah hian ka sawi duh a ni.

Hei, nikum lamah khan sorkar hmasa khan Annual Plan ah khan 16% point tlemte khan a pung a, chu pawh chu kan Chief Minister hlui khanin a lawmawm zia kha a sawi a; hei hi kan tawngtai chhanna a ni ti hial khan a sawi a, a lawmawm reng a. Amaherawhchu, khami 16% pung pawh khati khawpa a lawmawm chuan 25%-a a han pungte phei chu a lawmawm zia kha chu a zual leh zualin a hriat a. Chuvang chuan vawiinniah budget session kan han nei tlai pawh hi tlai manhla a ni tih hi kan sawi duh a ni. Kan budget ah hian lawmna tur tam tak a awmin ka hria a.

Pakhatnaah chuan pawisa a pung phawt mai a, chumi bakah chuan kan budget reng reng hi miretheite tan leh anmahni dawmchhuahna tur tura priority a pe hi lawmawm ka ti a. Chumiah chuan a bik takin Mizoram pumpui mipuitena harsatna tam tak kan tawh, miretheite chhanchhuahna tura NLUP atana sum thahnem tawk tak mai crore 100 lai mai an han dah thei hi a lawmawm ka ti leh zual a. Hei hi a lawmawm mai bakah nakinah a dawngtute pawhin tangkai taka anmahni an in tundinna tura tangkai taka hmang thei turin ka han ngen tel bawk a.

Tin, chubakah NLUP hi hmanah 1990 atangin kum 10 chhung lo tih tawh a ni a, chutah chuan a hmasa berah khan crore 12 1991 ah khan dah theih a ni a. Chutihlai chuan tun sorkar chuan crore 100 a han dah thei ta a, a let kua dawn laia tam a han dah thei ta hi a lawmawm em em in ka hria a; hei hi mirethei leh harsa tena kan hman tangkai a pawimawh a. Tin, a tanpuina assistant pawh hmanah Rs.30,000/- theuha chhungkaw khat tanpui tura ruahman a nih lain tunah hian Rs.1,00,000/- veka tanpuina pawh pek tur a lo ni ta hi a ropui a. Amaherawhchu NLUP project te han duan chhin hian duthusam anga tam chu vawikhatah hian kan cover thei dawn lova, kan duh danah hi chuan kumkhat chhung hian a tam thei ang bera tanpui hi kan duh a ni. Amaherawhchu, thil to dan te leh plan han awmdan atanga Project Report siamtu kan mithiamten an han siamah hian, a tlangpuiah kum hnih te kum thumtea zawh tur plan siam a lo nih takah hian, a tira kan beisei chhungkua 29000 emaw 27000 emaw lai cover thei tur anga ngaih pawh kha kan cover zo lo deuh mai awm hian a lang a. Chutichung chuan kan hotuten NLUP an ngaipawimawh hi a lawmawm ka ti.

Tin, pahnihnaah chuan hei kan budget han en hian sorkar hnathawk zawng zawngina an ngaipawimawh ber chu Sixth Pay Commission ina a Report-a hi engtikah nge kan hman ve dawn ? He Pay hi engtikah nge kan hman ve dawn an ti a. Kan Finance Minister in chipchiar takin tuna hlawh kal lai zawng zawnga an hlawh tur zat, hlawh thara pek tur zat nen chhutchhuak thlapin heti hian a rawn englo a. Hlawh tharte hi kan la ve thei ang em ? tia sorkar hnathawktena an beisei thin, engtikah nge kan lak theih ang ? tia an sawi an sawi thin a hi tun sorkarina a han tihlawhtling mai turte hi a ropuiin a lawmawm a. Tin, chubakah keinite ang hi chu pension kan ni a, helai Member zingah pawh hian pension engemawzat an awm hlawm a. Chuvang chuan kan pension te pawh hi pung ve thei tura kan hotuten ruahmanna an han siam te hi a lawmawm hle a, lawmna tur hlir a niin kan hria a, tilai chhunga mite tan pawh.

Tin, chumai bakah lawmawm kan tih leh chu kan hotutena/ramina hmasawna a tum tak tak chuan ramhnuk chu Power & Electricity hi a ni a, hemi tello hi chuan ramn hma a sawn tak tak thei lo tih hi kan hria a ni. Chuvang chuan hemi lama hmasawna tura theihtawp chhuaha sum an han dah te leh central-a an zuk kala an han nawr dan atangte hian vawiinniah hian lawmna tur hlir a niin ka hria a. Kum 5 he kan sorkar hi a lo ding thei a, kum 5 chhunga theihtawp a chhuah chuan Hydel Project ropui tak a peih hman lo a nih pawhin, a hnunga sorkar lo ding leh tur tena hawn hman turin eng Hydel Project emaw

hi chu a awm ngei ngei ang tih ka beisei a. Chu beiseina nen chuan tunah hian kan thlir a, chumi ang tur chuan tunah hian kan Finance Minister zahawm takin hma a han la hi Pu Speaker, a lawmawm hlein ka hria a, a ropui ka ti a. Hei hi Mizoram mipuiten kan nghahfak a ni.

Tin, chu aia hnaivai teah Local Area Development Fund tih ang te Pu Speaker, nangpawh bial nei i ni a, i bial ten MLA Fund atangin eng eng emaw siamna tur an dil ve ngei tawh ang che tih ka ring a. Tichuan kumin engemaw laiah khan nu 5 min han pe chhin a, nuai 5 hian lo siam teh u, an han ti a, nuai 5 lek hi chuan a tih theih ka ring lova, chuvang chuan siam pawh ka la siam tir lova. Mahse tunah chuan hei, budget ah kan hmu ta a, nuai 5 mai nilovin keimahni area ah nuai 25 theuh kan han hmang thei turte hi a lawmawm ka ti a; ka bialte pawh an lawm ngawtin ka ring a ni. Duhthusam te phe chu nisela, hmanna W. Bengal MLA ho kan kawm tum khan, anni chuan nuai 150 zet kha an nei bik a, awhawm kha chu kan ti a. Amaherawhchu, kan sum dinhmunin a zir silova, mahse nikum lam aia tam nuai 25 min han pe hrim hrim pawh hi a ropui a. Kuminah nuai 25 a nih chuan nakum lamah chuan a aia tam deuhte pawh kan la beisei thei ang. Hei hian kan bialte mamawh zual, Department dangin min han tih sak baka mamawh zualte pawh kan han tih sak ve thei turte hi a ropui ka tiin a lawmawm ka ti a.

Tichuan hun tam tak ka hmang lo ang a, mi pek belh hial i phal na a. A vai thua ka han sawi duh a chu, hetiang budget tha, a hun tlai deuh hlekah kan hotupain min han present a, he budget hi a chhuanawm a ni. Chuvang chuan Mizo mipuite tan leh a bik takin he House tan hian he budget hi a chhuanawm a, a ropui a ni. Tupawhin he budget chungchangah hian lawmthu sawi mai loh hi chu tih tur kan nei love, tih hi ka sawi duh a ni e. Ka lawm e.

Pu LALTHANSANGA (MPC) : Pu Speaker, ka lawm e. Hei General Discussion te hi kan sawi ang tih pawh kan rin ngai loh, miten min rinpui vak tawh loh hnuah, hei Pathian leh ka bial mipuite min duhsakna azarah helaiah ka rawn ding ve hlawl mai a ni a. Tling tur pawha inngai meuh lo kha ka rawn tling ve a ni a. (Speaker... Pu Lalthansanga pawh budget sawihonaa i vawikhat dinna a nih avangin minute 2 ka pek belh ang che) Pu Speaker, ka lawm e. Hei kan budget speech hi han en ila, kan House leader zahawm tak mai khanin, “Kan sorkar veleha kan ti ang kan tih tam takte kan tih lohna chhan te pawh hi kan hmuh lawk loh, kan hmaah Parliament inthlan te a lo awm avang tea budget pawh kan tih theih loh avangin Vote on Account in wawi 2 ngawt kan han kal a, chuvang chuan kan ti thei lova. Amaherawhchu, budget puitling kan tih hunah erawh chuan kan kal chak tawh ang”, tiin a sawi a, helai hi a lawmawm hlein ka hria a.

Chuvang chuan hei kan sorkar tukah NLUP kan sem ang tih te pawh kha an campaign hla a ni tih te kan hria a. Kan han campaign laite pawh hian kan fimkhur hle te hi a thain ka hria a. A chhan chu hmanah kan inthlan khanin a

thenin “Ka pawisa in Bank ka rawn hawng ang”, te an ti a. Tun thleng khian an la hawng lo chu a ni a. Chutiang atanga han ngaihtuah chuan khatiangte kha a lo ni a. Amaherawhchu, hetilaiah khatiang thil avanga hma a lak theih loh thu a rawn sawi kha a pawmawmin ka hria a, hei hi chu pawmpui tlak tak niin ka hria. A tlangpui han en hian hetia budget an pharh an rawn chhawp hi chu a tha em em mai a, ama’rawhchu, Mizoram hian hrivei kan nei a, chu kan hriveiah chuan a tha em em a, lawmthu kan sawi huai huai a. Hetilam Treasury bench lam hian lawmthu an sawi sasa thei viau mai a, sorkar hmasa atang khan. Mahse a takah hian budget performance kan ti a niang chu, hetah hian mipui hi kan lungawi lo hle emaw ni ! Money circulation te hi a zim lutuk e, tih hi mipuiina kan beiseina sang tak mai lo thlakhniam leh thinna pawh niin a hriat a. Amaherawhchu, tun sorkar thar hi chu a second come back ti ila a ni tawh a, churang chuan mipui pawhin rinna leh beiseina sang tak neiin kan thlang tling a; MLA pawh tam tak kan pe a ni Zoram mipuiin. Chumi rual chuan kan hmanhmawh zawng angah te hi chuan an inhuamin kan hmanhmawh hle mai a, Motor thar leina te pawh kha kan seng hnem hle mai a. Hei Pu B. Thlenga, Member pui zahawm takin a zawhna atanga enin Motor kan lo lei fe tawh mai a, SAD atang khan 17 kan lei a, two wheeler (Bike) te pawh 4 lai kan lei a lo ni a. Chutiang tak chuan kan hmanhmawhna lampangah hian kan hmanhmawh a, Zoram mipui hi kan dinhmun han en hian kan retheihna a nasa em em tawh a ni. Zoram mipui pachhia leh retheite khaihhuah hi kan programme a nih ang ngei hian, a theih theihnaa bul tan tura ka ngaih lai khan helaiiah hian tlem chuan a lungchhiatthlak deuh a. He kan budget tha takte pawh hian lehlamah chuan rilruah zawhna tam tak a rawn ti piang a.

Hei, NLUP ah hian an duan dan hi a fing hle mai a. Department hrang hrang engemaw zahah khan NLUP programme hi dah a ni ta a; Department hrang hranga an han dah takah hi chuan NLUP hi hlawhtling tura ngaihna a lian hle mai a. Mahse Mizoramina kan hrivei lian tak chu Department in an performance that loh thin avang zawkin a hlawhtling lo ni hian a hriat a, House ah pawh hian chu chu kan in debate na lian tak a ni a. Churang chuan ngaihtuahna min pe nasa hle mai a. Department te performance a that tawh loh vanga he budget pawh hi hlawhtling lo a ni tih kha kan hrivei lian tak mai a ni a. Chulai tak chu kan chhuah hi a ngai a, chumi tur chuan vawiiniah hian Pu Speaker, kan House leader zahawm tak hian a thusawia mi hnehtu deuh mai a awm a. Tunhma ang khan pressure group han thawi dam ngai ang chi hi an awm tawh dawn lova, kan duh danin tunah chuan ka kal ve thei tawh ang chu, helai hian rilru min hneh hlein ka hria. Churang chuan tunhmain pocket resistant te kha a lo awm emaw ni, khatiang ang kha awm tawh lova min kaihruai tur a ni tih an sawi hian rilru a hneh deuh hlek a, chu chuan beiseina te pawh min han pe chho deuh a ni. Department hrang hranga NLUP mawhphurhna an han pe te pawh hi a hlawhtling chho turah ngai ta ila, hlawhtling tur pawh hian kan sorkar hnathawkte pawh hi nasa taka kan fuih chhoh a ngai dawn a. Chutianga kan tih loh chuan Zoram mipuite rilru hi kan tibeidawng lutuk ang a, kan ramah hian harsatna lian tak a rawn awm ang tih te a hlauhawm a.

Tin, Land Reforms chungchang te pawh kan ti chho dawn a ni a, land reform te pawh hi han en hian uluk hle ngaiin ka hria a. Naxalite hote pawh an lo chhuak a, tunah India ram State 17 velah inzarpharhin hetiang hian helna te a lo awm a. Chutiangah te chuan mihring kan kuta kan nihna te leh neitu kan nihna thinlungte zuk paih bo silova, chumi nena hetiangte pawh hi kan kalpui a ngai a. Nichina kan sawi tak ang deuh khan Garbage trailer chu hnuhsawn an ni ta a, an hnuk sawn tawp mai a. Luikawr hi a balh phah nasa viau mai a, bawlhhlawh tam tak khatah khan an paih ta a. Lehlampang a that rualin lehlampang (dark side) hi a lo awm leh zel thin a, thil kan tih dawn hian kan uluk hle ngaiin ka hria a ni.

Tin, Power lampangah pawh hian thinlung kan nei nasa hle mai a. Keini pheii chuan kan lo sawi thin, Bairabi Hydel Project, Delaisuri Project kan ti a niang chu, chutiangte pawh chu kan ti nual thin a. Heti laiah hian Tuivai hi a lo lang a. Tin, mega watt 25 chunglam pheii chu PPP mode hian kan kal ang tih te, hei hi a lawmawm ang reng hle mai a. Tin, kan budget han enin tunah pawh hian sorkar hnathawk tan hian a lawmawm ber ni hian a hriat a. Non-plan hi a sang em em mai a. Tin, chumi rual chuan central atanga Central Taxes kan zu hmuh ve tur a hi a lo tlahniam zel dawn ni hian a hriat ta a. A chhan chu hemi Global recession avang hian Mizoram State te pawh min rawn nghawng ta a, tunah pawh hian kan central share ve atangin 34.41 crores vel hian tlahniam tur te a ni a, hei hian kan revenue surplus te pawh hi a tihniaim dawn niin ka hria a. Chutiang taka central lam atanga kan share te a lo tlahniam a nih chuan kan pawisa hmanna turah pawh khan, a nihna taka kan zuk hmanna a taka kan chantir hi a ngai hle dawn niin a lang a. Chutianga kan tih dawn loh pheii chuan hei, inbum kan tum rei tawh a, central lam atangin rawn endiktu kan hriat mang lohin an lo kal a, kan nih dan tawh hi min hre hle tawh niin ka hria a; chu chuan harsatna min rawn thlen nasa hlein ka hria.

Tin, Education Reform Policy te kan han nei a, Law Commission te pawh kan han din a. Education Reform Commission kan neih tum khan kan Member khan hetah hian a rawn ziaik vek mai a, ka rilru a khawih ang reng khawp mai a. Telegraph Calcutta Tuesday, ni 9 June 2009 ah khan, hetah hian Education Reform-a kan Member ni ngei mai kha – Professor Vet Prakash habitly appointed the UGC Vice Chairman as accused of the Caste discrimination of by the colleague during the earliest in as a Secretary of the Apex Higher Education regulator, tih ang deuh khan a rawn ti a. Hetiang hian ani hmang kha a lo lang a June 19 khan. Chuvang chuan thla khat chauh a awm tawhin a hriat a, hemiah pawh hian hriat a chakawm a. Ani hi Discrimination ah khatiang deuh hleka puhchhiatna a thawhpuite atangin an awm a, beiseina a tam rualin thahnemngaihnaim tiang hian kan han sawi leh ta mai thin a, chuvang chuan hetiangte pawh hi kan Minister zahawm tak changtute pawh khan min han hriat sakim hmata pawh min lo laksak sela. Tin, MLA Fund, Area Development Fund te hi nuai 25 ah a hmangaihtuah chuan. Mahse Pu Speaker, kan House Leader zahawm tak khan “Midang State te pawhin an ngah viau lawm mawle”, a ti a. Dy Speaker kan thlan tum khan, chumi size deuh te chuan kan lo sawi nual

tawh a, mahse tlemin kan hniam leh ta deuh a. Chuvang chuan Pu Speaker, hetiangte pawh hi min la tih belh thei lawm ni? A lawmawm rual khan tiin kan sawi duh tak meuh meuh a; min revise saka min tih belh sak turin kan ngen che u a.

Hei tun kan budget hi a lawmawm em em rual hian hemi hian a tak a chang em? tih hi keini heti lampang, i veilama thute hian kan lo en dawn a nia. Chumiah chuan fakna tak takte hi chu nakin kum tawpah kan la sawi turah ka ngai a, a lawmawm thawkhat e. Tunah a taka a chan pheih chuan Zoram mipuiin nasa takin hma kan sawn ang tih hi ka ring a. Tin, a hmasawmna tur kan han ziah lan hi Chiang lo deuhin ka hria a. Hmasawmna tur a hi central atanga pawisa lo lut kan per capita income te pawh hi kan teh niin a hria a. District ah chuan Aizawl a sang ber a, kan per capita income ah Champhai a hniam ber a, tih an zia a, Serchhip te khi eng kha nge tih hria a chakawm a. Chu kan per capita income sanna hi kan thawhchhuah atangin nge ni a, central atanga sum kan hmuhna atanga lo sang tihte pawh hian ngaihtuahna chu min pe nasa hle a. Chuvang chuan kan per capita income sanna te pawh hi kan thawhchhuah atanga sang ni thin se. Vawiiiniah chumi ni tura kan House Leader zahawm takin a budget speech a rawn pharh hi a hlawhtlin theih nan kan support em em a ni, tih ka'n sawi duh a ni e. Ka lawm e.

Pu NIRUPAM CHAKMA (INC) : Pu Speaker, tawng lamah ka harsa si a, minute 5 min pek belh a ngai a ni.

S P E A K E R : Han sawi phawt la, sawi a hmaa in dil ringawt te chu.

Pu NIRUPAM CHAKMA (INC) : Pu Speaker, a hmasa berin kan Chief Minister zahawm tak Finance Minister ni bawh chungah lawmthu ka sawi duh a ni.

Kum engemaw zat House ah kan thu a, budget te kan sawi thin a, kumin anga budget felfai document nei tha hi kan la dawng ngai lo a ni. Hei hi chu MLA zahawm takte pawn min hnial ka ring lo.

Tin, budget hi strategy neia siam a ni a, policy neia siam a ni a, target neia siam a ni. Hetiang budget hi kum kalta zawng zawngah a la awm ngai lo niin ka hre tlat mai. Chuvang chuan tun tuma budget general discussion hi siam teuh ka chak a, mahse minute 10 chauh a nih dawn avangin tam tak ka sawi hman dawn lo a ni. Pu Speaker, a hmasa berin budget chungchanga ka sawi duh leh kan budget figure hrang hrang atanga ka ngaimawh chu salary component hi a tam lutuk a, Non-plan account ah one thousand thirty four crore seventy seven

lapsed a ni. Tin, Plan ah khan 205 crore point 39 lakh, a vaia belhkhawmin 1240 crore, 16 lakh budget figure ah a lang a, chuang chuan salary component hi a tam em em mai a ni. Chutih rualin ka sawi duh chu kan sorkar hnathawktute hi Mizoram development turah khan public aiin nasa takin tan lak a ngai. Pawisa tam zawk chu major share public aiin mi tlemtein an nei tam dawn a, chuang chuan an contribution pawh a sang tur a ni. Tin, an responsibility pawh a sang tur a ni ka ti, chuang chuan hei budget kan pass ang a, Department hrang hrang Officer te nen he budget hi kan hman dawn a ni a. Chuang chuan fimkhur takin Austerity Measure nein he budget chu hman ila, mipui tam zawkten tlemte kan ruahman chu an thleng phak ang a. Chutilo chuan kan sorkar hnathawk tam zawkte hian an hlawh aia tuna ruahman sa hi an ei duh a nih chuan mipui tan beiseina a vang viau ang. Chu chu ka sawi hmasa duh a.

Tin, budget hian 6th Pay Commission vangin a tuar dawn a, amaherawhchu, sorkar hnathawkte pawh ngaihpaawimawh tur a ni a, sorkar hian an hamthatna tur pawh kan ensak tur a ni. Chuang chuan 6th Pay Commission pek tura pawisa ruahman te pawh Chief Minister zahawm tak chungah pawh lawmthu ka sawi duh a. Pu Speaker chubakah hei buhfat subsidy chungchangah khan 2006-07 leh 2007-08 atang tawh khan buhfaiah pawisa tam tak a kal a, chuang chuan kumin, nakum, a kum leha budget siam turah pawh tam tak kan ruahman sak a ngai dawn a. A chhan chu India ram hi kumin bikah chuan hei drought te, flood te kan tuar a; Mizoramah pawh Mautam kan tuar nasa a, kan production hi a hniam tawh a. Chuang chuan buhfai tam tak economic cost-a lei loh chuan mipuite chu an tam dawn si a, kan pawisa tam tak budget pawisa hi buhfaiah kan hman dawn a ni.

Ka request duh chu NLUP kan hman dawn a, kuminah, nakumah, a kum leha WRC terrace bikah khan uar ila, buhfai production a tam dawn a ni. Chutihrualin, kan budget hi a hek lovang a, chutiang chuan purchase of food-grain chungchangah pawisa tam tak hman a ngai dawn lo a ni. Chu strategy chu hman turin kan Chief Minister hnenah ngenna ka siam duh a ni.

Tin, pakhat leha chuan, kan thawhchhuah hi a tam lova, budget figure enin. Tax kan hmuh dan tur te, Tax revenue leh Non-tax revenue kan hmuh dan tur te hi chiang takin tarlan a ni a. Chuang chuan kan trategy turah chuan sorkar laipui atangin kan hmuh tur te, keimahni own resources atang chuan budget hi kan meet thei dawn silova. Chuangin heta budget paper-a a landan chuan Asian Development Bank atangin pawisa puk tur chungchangah khan agreement pawh siam daih tawh a ni a. Kan Chief Minister zahawm tak speech ah- phak 13-ah a lang a. 'North Eastern Region Capital Cities Development Investment Programme' chumi hnuaiyah Dollar 68 million puk tur a ni a. Tin, 17th September, 2009 ah ADB nen Agreement siamin Mizoram Public Resource management Programme (MPRMP) in the form of Structural Adjustment Loan khan 100 million dollar kan puk dawn a ni. Hei hi Finance Department web-site ah a tarlang a ni. Project report te, final report te leh agreement thlengin a tarlang tawh a, duhna apiangah a chhiar theih a ni.

Mizoram mipui hnenah ka sawi duh a, I want to advise the people of Mizoram, we want money that's why we are borrowing from Asian development bank. But the Asian development bank terms and condition neia pawisa puk tur a ni. Chu terms and condition hmang chuan Mizoram in a puk dawn a. Chu terms and condition hmang tur chuan engemaw chu sawipui a ngai a ni. In the form of paying tax, land revenue tax te pawh a phut dawn a, tax hrang hrang engemaw chu an proposed a ni. This is not a secret. The report is already in the Department website. Nakinah House ah engatinge land revenue sorkarin imposed tia sawi ngai lovin a fact chu pawm tur a ni. Chuvang chuan this scheme is initiated from the previous Government, we all know. The report also came. Now the money is coming. We are taking the loan, but we have to make some sacrifices in the form of contributing to the proper of the Government. Chumi atan chuan kan in ready a ngai, nakinah sorkarin sawisel a hlawh loh nan, mi tam tak hriat lohin ka sawi duh a ni, Pu Speaker. Amaherawhchu, Mizoram Fiscal responsibility and budget management Act, 2006 anga tuna budget statement hi kan kalpui zel dawn chuan 3% GADP in a kal chhoh theih zel dawn chuan a tha lutuk ang. Finance Department lamin tan la ila.

S P E A K E R : Kan hun a tawp deuhva, minute khat lek han sawi leh selangin, minute khatah rawn thlak zawh tum la aw, kan lo nghak hram hram ang che.

Pu NIRUPAM CHAKMA (INC) : Pu Speaker, Mizoram public resource management programme ka chhiar ka chhiar a, a tha ka ti lutuk a, nizanah pawh zan reife ka chhiar a ni. Print ka tum a, mahse ka print thei silova, a phok a tam lutuk a. Hei hi MLA te pek dan a awm lawm ni ka ti, han chhiar ila a tha lutuk si a, a strangely pawh a tha a ni. Tin, a tawp bera ka sawi duh chu tuna budget hi hei performance budget 2008-09 tunhmaa awm ngai lo work programme te min sem vek a, hei hi thil thar a ni. Tunhma pawhin a awm thin a, mahse continue a awm silova, tun atan chuan hei aia tha zawkin siam thei sela ka duh a ni. Tin, a tawp berah point 2 ka sawi duh a. Pu Speaker, budget scrutiny hi Assembly hmangin, Committee hrang hrang hmangin a tih theih a nia. Performance budget te kan insist thin a, min pe ngai lova, mahse tunah chuan min pe ta a, lawmawm ka ti a. Nakumah chuan Assembly Committee hrang hrang hmangin scrutiny thei ila, chutiang ti thei tur chuan Finance Department hi tan la se ka duh a ni.

Tin, a tawp berah chuan good budget, good beginning a that chuan engpawh a tha a ni. Result a that chuan Mizoram tan malsawmna a ni ang a, chu chu ka sawi duh a ni. Ka lawm e.

S P E A K E R : Awle, kan hun a lo tawp ta a, kan chawl rih ang a, chawhnu Dar 2-ah kan discussion kan chhonzawm leh ang a, mi parukin kan sawi tawh a. Vawiiiah hian General discussion kan zo mai thei ange maw, kan sawi that duh vak loh chuan kan zo ang a, naktuk lam kan hman dan tur chu kan rel chawp ang a. Tunge han sawi leh dawn? An awm tawh lo em ni, kan wind up tir tawh mai dawn. Pu C. Ramhluna.

Pu C. RAMHLUNA (MNF) : Hei tun tumah hian thiante sawi tawh ang khan full budget document ah kan han tel ve thei a, Maiden speech a ni a, hun tam deuh hlek nise ka va duh ve. Pu Speaker, tun tumah hian a hmasa berin kan House Leader zahawm tak hi lawmthu ka hrilh duh a. Hei budget tha tak mai an lo buatsaih a, chubakah document tha tak tak kan nei a. Statement on Salary & Employment data tih te, Performance budget tih te leh Work schedule tih te tha deuh deuh mai kan nei a; hetiang an han buatsaih hi tha ka ti a, lawmawm pawh ka ti a ni. Chuvang chuan a hmasa berin lawmthu ka hrilh duh a ni. Hei performance budget chungchang thua pawh hian nangmah ngei khan interest kha i la hlein ka hria a. Kan rules No.143-ah pawh khan i rawn lantir tawh kha a ni a, hun hmasa lamah khan. Hetiang zulzui hian budget tha deuh mai min buatsaih hi nangma bulah pawh lawmthu kan sawi a ni.

Hei performance budget chungchangah hian thil pakhat han sawi lawk ka duh a, pahnih/pathum pawh a ni ang chu. A column hrang hrang kan en hian engemaw ngaihdan han sawi ve ka duh a. Head of Account leh a scheme hi column pakhat ziah lan nghal mai nise a thain ka hria a, column-2 naah chuan name of the activity tih kha a scheme leh a work leh a target ai khan lang tase, en a nuam zawkin ka ring a. Tin, Financial column ah khan BE leh Actuals ni mai sela, a awlsam zawk hlein ka ring a. Achievement tih hmalama, number 8-ah khan achievement hi a ngai tawh lo tur a ni ang a. Tin, a column physical ah hian target leh achievement hi a lo ni mai ang a, a column tawpah khan tul riau nia ka hriatna chu, 'reason for short fall, if any' tih kha awm thei ta sela chuan, khamiah khan engvanga kan target kha achieve lo ta nge kan nih tih kha a lang ta ang a. Kha scheme ah khan awmze nei takin, nakin zelah pawh hma kan la thei turah kan ngai a, chu chu observation kha ka'n siam duh a. Tin, a hrim hrimah performance budget 2008-09 kan siam a ni si a, chumiah chuan thil pakhat ka hriat ka'n sawi ve duh chu 'achievement as on 31st May, 2009' tih lo lang ta daih a kha, column number 7 ti thleng phei ta ang ni ila, Pu Speaker, Physical leh Financial ah khan achievement as on 31st May, 2009 lo lang ta daih a kha ka hrethiam lo deuh hlek a. Kha kha min hrilhfiah theih chuan ka lawm khawp ang. Nakinah performance budget 2008-09 March 31-a tawp tawh si a kha, engtizia nge May thla teh daih kha a rawn lan tak aw, tih kha ka ngaihtuahnaah khan a awm deuh hlek a, khalai kha nakinah min hrilhfiah theih chuan a lawmawmin ka ring a. A chhan chu 31st March ah khan tawp tawh tur a nih si lai khan May a rawn lang ta daih a kha, khalai kha ka'n hre fiah duh deuh hlek a.

Tin, chubakah Work Schedule a rawn lang hi a tha khawp mai a, a lawmawm ka ti khawp mai a. Mahse observation pakhat ka'n siam duh a chu, PWD bikah phek 27-naah khan a lo lang a, tahchuan widening of approach road to New Secretariat Complex tiha estimated amount kha NIL a ni a. 'as accorded if any' tih kha a awm a, tah khan 'No' a ni a, BE for 2009-2010 ah khan 70 lakhs a ni a. Target lai taka physical ah khan 80% tih a ni leh si a kha, estimate pawh awm silo, a target a physical 80% tih leh si lai tak a kha enge a chhan ni ang aw ! tih kha ka hre lo deuh hlek a. Khatiang ai khan a sei zawng a kha interms of kilometer emaw khan rawn ziak ta ni selang chuan en kha a awl zawk duh ang a, tih kha ka ngaihdaan a ni a. Khatiang deuh hlek khan SI.No.7,8 ah te pawh khan a awm nual mai a, kha kha lo enchain deuh atan a thain ka hria a.

Tin Pu Speaker, 'Statement on salary and employment data' tih kha hei a rawn chhuak a, a tha hlein ka hria a. Demand No.36-a page 177 ah khan a lang a, kha kha min lo chhinchhiah sak theih chuan ka lawm ang a. PCCF scale a kha kan lo hriat ve deuh zawng a nih avang khan Rs.37,400 – 6700 + Grade pay tih khan a lang a, kha kha tihsual palh a ni mai awm mange aw, ka ti a. PCCF scale hi tuna scale tharah hi chuan Rs.75,500 – 80,000 a ni a. Tin, Government of India pawhin khatiang scale atan khan a rawn appoint a ni a, tunah pawh hian kha kha a enjoy lai reng a ni a. Chuvang chuan kha statement a kha correct deuh a ngai awm mange, tiin ka ngaihtuahnaah a awm deuh a, ka'n point out duh a ni.

Tin, chubakah ka'n sawi leh duh chu Pu Speaker, Summary of Financial position han en hian lawmawm viauin ka hria a, 2007-08 ah khan deficit financing-in bul kan tan a. A deficit-na pawh kha a sang viau a, 22.7 crore a nih lai khan a tawpah khan chuan kan close-na kha a sang viau a ni. 79.74 crore ah khan kan tawp, kan deficit a, tichuan 2008-09 ah pawh khan kan deficit-na kha a sang viau a. Mahse hei kuminah hian thil lawmawm tak chu khami deficit-na kha 70.44 crores a nih lai khan, hemi kumin budget hrim hrimah hi chuan surplus budget kan nei a. Nimahse, he deficit a lo awm tawh avanga deficit a tawpa kan close up-na tur kha chu a nih tho tho lai khan a lo hniamthla deuh duai kha a lawmawmin ka hria a. Kumina surplus budget kan nihna kha 1300.26 crores in kan surplus thei a, hei hi a lawmawm hlein ka hria a, chu chu kan sawi tel duh a. Tin, chutia ka sawi laiah chuan statement I of budget ah khan page 5-naah leh page -6-naah khan a lo awm dul a. Hetah hian grant tam tak kan hmu ta a. He kan grant hian kan budget hi a ti thau tha a, a lawmawm hlein ka hria. Rs. Nuai 14690.21 vel a ni a, chutilaiah chuan thil pakhat lo lang a awm ta a, Grants for Central Plan Scheme ah khan Rs.7.96 lakhs a lo lang a, a tlem viau na a. Hei Explanatory memorandum ah leh Demand for grants ah khan a lo lang ve hauh lo mai a, helai hi engtizia nge ni aw, ka ti a. Ka'n chhui ka'n chhui ve a, ka hmuchhuak thiam ta hauh lo mai a. Helai hi kan Finance Minister zahawm takin min hrilhfiah thiam chuan a lawmawm hlein ka ring.

Tin, chubakah chuan Pu Speaker, Tax Revenue hi kan en a. Land Revenue hi kan beisei danin cheng 168 lakhs a ni a, hei hi a tihsan theih em aw, tih ka

ngaihtuah deuh a. A chhan chu chhungkua nuaikhat aia tam Mizoramah kan awm a, chhungkaw pakhatin Rs.150 ang vel kha Land Revenue ah hian kan chawi dawn niin a lang. Hei hi a collection system hi a dik lo nge ni a, a rate hi a hniam hrim hrim aw, tih kha ka ngaihtuahnaah a awm deuh hlek a. Chu chu tih tam theih a nih dawn chuan a va lawmawm dawn e, ka ti a. Tin, tih tam theih a nih pawh ka beisei deuh hlek a ni.

Tin, phek 5-naa Adhoc Grants from Ministry of Finance-a Annual finance statement ah, phek 5-naa cheng nuai 28154 lo lang a kha engtia hman tur nge ? tih lai taka kha han hriat chian theih deuh ka duh a. Sixth Pay atan hian hman tur chi nge ni aw, engatana hman chi nge ni ang Adhoc grants lo awm ta hi, tih laia kha lo hriat chian ve atan khan a thain ka hria a. Tin, Central atanga Devolution of Central Taxes & Duties, hemi Annual finance statement atanga lo lang kha Taxes on income other than Corporation Tax Rs.7738 lakhs lo lang a kha nikum ai khan a tlem ta daih a. Nikum khan Rs.8,810/- a ni a, mahse kumin hian a hniam ta duai mai a. Hei hi han dil belh a harsa deuh a nih pawhin enge a chhan tih kha chu kan hriat ve hrim hrim atan a van tha em, tih kha rilruah a awm deuh a.

Tin, Taxes on Commodities and Services hnuaia Central Customs ah hian nuai 6573 kan beisei laiin nikumah khan nuai 8178 a ni a; henge pawh hi hmuh belh theih a ni ang em aw, tih kha ka rilruah a awm deuh hlek a. Tin, Union Excise duties-a Rs.4434.00 kumina kan beisei laia nikumah Rs.7133.00 kan hmu thei te kha hmuh leh theih dan kawngte a awm thei ang em ? tih te rilruah khan a awm deuh hlek a. Chungte chu kan sawi chhuak thuak thuak duh a.

Tin, Fiscal policy ah khan page 8-naah expenditure-a Treasury hi computerized a ni ang tih kha a lawmawm hlein ka hria a, hei hian nasa takin budget control ah min tanpui turah ka ngai a. Chu chu performance budget hmangin kan ti ang tih a ni a, mahse 2009-2010 atan hian performance budget kan siam ta chuang silo hian eng ang chauhin nge min puih ang tih erawhchu ka hrethiam lova. Khalai a kha min hrilhfhiah theih chuan ka lawm viau ang.

Tin, kuminah hian flagship scheme kan sawi lo thei lova, lawmawm kan ti tlang theuh a. Land Use Policy ah hian 100 crores kan dah a. Tin, kan budget pumpui a sang tha a, lawmawm em emin ka hria a, churang chuan kan House Leader pawh lawmthu ka'n hrilh duh a. Chutihrial chuan Land Use Policy a lo san tak, 100 crore kan dah tak avang hian Department dang Allied Department ho hi a effect nia hriatna ka neih lai tak hi ka concern deuh hlek a. Entiran, Demand No.31 naah chuan nuai 3579 kan dah a, kuminah 11,870 kan dah laiin 10,000 a kha NLUP tur a nih avang khan a balance a kha 1870 nikum budget chanve pawh a pha tlat lo. Crop Husbandry bik hian CSS-a a inngah thui hle a ngai dawn a, hei hian an hlawah pawh harsatna a thlen mai awm mange aw, tih kha ka inngaihtuah phah a ni. Nikuma 50% paih ang chauh kha niin ka hre si a.

Tin, Demand No.32-a Horticulture ah hian 977.86 a ni a. Pu Speaker minute khat lek 2009-2010 ah hian 734 a ni a, nuai zahnih deuh thawin a inthlau ta a. Soil & Water Conservation ah hian nuai 63 in a inthlau a, Animal Husbandry & Vety ah te pawh nuai 61 in a inthlau a, Environment & Forest ah te pawh nuai 100 dawnin a inthlau ta a ni. Khangho te te kha ka han sawi chhuak duh a, khangho khanin harsatna an tawh ang em aw, tih kha ka ngaihtuah deuh a. Tin, chungho bakah chuan pakhat chauh hemi District Council bikah hian thil lawmawm tak kan nei a, an allotment kuminah hian a sang tha hle mai a. Anmahni ngei pawh kha khutah Planning Commission ah an kal ve ni khan ka hria a, churang chuan kumina an san dan hi lawmawm ka ti a.

Tichuan, Lai-ah nikumah 1159 an hmuh lain kuminah 1400 an hmu a, Mara-ah 836 nikuma an hmuh lain 1250 kuminah pek an ni ta a, Chakma-ah hian tihsual a awm deuh em aw ! ka ti a, 671 nikumah an hmu a, tichuan Demand for grants-a pheh 5 naah khan 1910 angin a rawn lang ta daih mai a, a sang hle mai a. Mahse anmahni Demand No.27 ah erawh chuan 1150 kha a ni bawh si a, kha lai kha a in tally tlat lo mai a. Hemi an Demand No.27-a lang hi 1150 leh helai central allocation ah hian 1150 tia min pek si lai hian, hemi Demand for grants bulpuiah hian 1910 in a lang bawh si a. Khalai figure in tally lo kha kan sawi chhuak duh a. A eng zawh hi nge rin tur ni ang, tih kha kan Minister zahawm takin min hrilhfiyah theih chuan a lawmawm hlein ka ring a ni. Ka lawm e.

S P E A K E R : Hun a la rei deuh na a, heng kan lehkhahu ho hi a lo zir ngun hle a ni tih a lang a, a lawmawm khawp mai. Tunge sawi leh dawn ? In awm tawh lo maw ? Chuti chu kan ti tawp.....

Dr. R. LALTHANGLIANA (MNF): Pu Speaker ka lawm e. Kuminah a hun lo tak takte pawh kan ti dawn nge ni, kawng lehlamah India ram hmun danghte pawh a ni vek a. Budget session kan neih hun loh takah kumin chu kan nei a. Inthlan avangte a ni tih kha kan hria a. Kawng lehlamah chuan tun tuma kan pawisa sawi hi a hman hun chhung tur hi Pu Speaker, a rei tawh lo khawp mai a; thla 5 bawr vel emaw lek hun kan nei a, kan hmang mek bawh a, chu chu a kal dan niin ka hria a. Hun kan ngah loh avangin a point deuh hlekin ka sawi duh a. Pakhatnaa ka'n sawi duh chu Pu Speaker, kan House zahlohna hi niin ka hria a, sawi a nuam lo khawp mai a. Ka bul ami, kan senior Pu Duha hian a sawi chhuak tawh a. Delhi kan Regiment Commissioner, vawiin ni thlenga posting order chhuak tawh si hi kan la dal reng mai a. Post-na hmuna kan la dah thei lo hi chu he House zahlohna hi niin ka hria a. Churangin hei hi a fello khawp mai a, a nih dan tur ang dik tak kan House Leader-ina tlemlai deuha kan House-a a rawn sawi ang khan awm tawh sela, tih hi helampang chuan awm tawh sela kan duh khawp mai, tih kha ka'n sawi duh a ni. House ah ngei han sawi officer senior tehchiam pawh nilo, a tha lo a ni tih, keini pawhina kan zuk

hmuh pui ang chi hi chu sawn chhuak thei sorkar ni turah in ngai teh ang. Hei hi sawi a chakawm lo viau naa a hmathehah ka'n sawi duh hrim hrim a ni.

Tin, budget chungchang, vawiinniah kan sorkar chelhtute hian inthlan laia an sawi uar ber a kha chu NLUP cheng nuai khat (Rs.1,00,000) pek tur tih kha a ni mai a. Kha kha a lian ber niin ka hria a, an tihhlawhtlin ngei pawh han beisei dawn ta ila. Amaherawhchu, inthlan laia kan sawi ang kha thil a nilo ta deuh a ni awm e, budget bu kan han keu hian tih ka sawi duh a. Pu Speaker, a chhan chu kuminah hian vaibelchhe za chuang hlek emaw dah niin ka hria a. A bu han en hian engemaw taka hemi atana tangka hmu hi kan ang ta lo riau a ni. A chhan chu kan enkual a, PWD ah hemi Annual Plan Allocation pangngaiah hian nikumah nuai 280 a nih lain kuminah nuai 230 a ni a, nuai 50 in a tlem a. Tichuan LAD ah nuai 73 in a tlem a, ka'n sawi pawp pawp ang a. Nutrition lamah pawh nuai 250 in pawhhek sak an ni a, Horticulture ah nuai 145 pawhhek sak an ni a, Soil ah nuai 50, Animal Husbandry ah nuai 70, Forest Annual Life ah nuai 50, Rural Development ah ngat pheichuan nuai 2418 pawhpen sak a lo ni a. Tichuan Capital Amount lampang kan en hian Pu Speaker, Public Works Department ah ngat pheichuan nuai 603 in an pha lo a ni, nikum kha chuan. Sports & Youth Services ah hian nuai 762 in an pha lova, Water Supply & Sanitation ah nuai 1054, Urban Development ah pheichuan nuai 5864, Co-operation ah nuai 69, Village Small Industries ah nuai 976, a vai hian Pu Speaker, Department hrang hrang khang an pawhpen kan han belhkhawm khan nuai 12,461 a ni a. Department hrang hrang atanga pawhpen kha NLUP atan hian kan pawtpeng a ni awm mang e, tih theih tur hian a lang a. Chuvang chuan Prime Minister special pocket package kan beisei kha, vawiinniah hian a hlawhchham chiang ta viau nge ni tih hi min hrilhfiah se ka duh ngawt mai. Department tam tak hian vawiinniah hian an tuar ta a ni tih hi ka'n tarlang duh a ni. Budget tha a ni tia sawi a awm mek lai khan khalai a kha chu vawiinniah hian a sawi chhuah loh theih lovin ka hria a, budget kan khawih tur hi pawimawh ka ti a ni.

A dang ka sawi leh duh chu Pu Speaker, hei kan sorkar hi kum khat hmel a la hmu chiah lova, amaherawhchu, thil pakhat ka'n sawi duh a chu sorkar chu mipui nu leh pate kan ni a, mipui nu leh pa nih hi kan tling em tih hi kan ngaihtuah a pawimawh khawpin ka hria. Thil kan tih luat lutuk deuh hi a awmin ka hria a, kan hnuaia hnathawkte kan ban tam lutuk tlat tawh. Ka Department enkawl thin Education ah hian education volunteer ringawt hi 1350 February thla khan chawlh tir an ni a. Pawisa a awm lo tih a ni a, mahse July thla chuan a thar an la leh tho. Hindi zirtirtu Primary School ah India ramah khawiah mah kan nei lova, harsa tak chungin kan ruai tang tang a; mahse 500 chawlh tir an ni kha Department dang dangah pawh chutiang chu sawi tur tam tak kan nei a. Kan ruling party hruaitu tam takin an thusawi uar ber hi vawiinniah hian sawi tawh lo se ka duh khawp mai. Invauna ringawt mai anga tute emaw M.R. a ni emaw, work charge a ni emaw kan inti nasa lutuk hi a awm ngai ka hre lova. Pathian leh mipui zarah kum 10 kan sorkar khan Department enkawl te pawh kan nei ve a, ka hriat sual loh chuan an awm tha lai hle hle pawngpaw bana, chawlh tir

tawpa an hrawkhrui sah chah sak ang chi hi kan neih ka hre lova. Hei hi wawiinniah hian he House ah hian ka sawi duh a ni.

Chubakah engemaw harsatna sum leh paiah kan nei a nih pawhin Kristian kan nihna, ringtu kan nihna anga inkhawngaihnaa rorel ve hi a thain ka hria a. Chu chu ka rilru a nih ve thin avang hian wawiinniah hian kan ti lua deuh niin ka hria a, a nunrawng lo deuh leh tute emaw ti ralti lo zawng deuh hian sorkar hi kal sela, tih hi wawiinniah hian thain ka hria a. Invaubeh te, transfer-a invau te, bana invau te leh tin, sorkar hmasain engemawchen lo thawk tawh ang chi kan han cancel buaih buaih mai hi chu a rapthlak lutuk deuhin ka hria a. Pu Speaker, hmanni khan ralkhata ka awm laiin kan biala miten min rawn phone a, thil mak deuh mai chu – ka bial Hauruangah sawn field kan lai vek tawh a, Forest Department in Bulldozer in a lai a, sum pawh a la hmuh kim hmam tlawmngaih chhuahin a lai a. A kalkawng 1km. dawn lai laih zawh vek tawh a ni a. Pawisa lo thlen huna pek tura tlawmngaia lo lai ve ngawih ngawih kha pawisa tlem azawng a lo thleng a, kha hnathawh tawhah khan midang rawn inrawlhin an rawn pe leh hmiah mai a, a fello ka ti khawp mai a. Sawichhuah a nuam chiah lova, ama'rawhchu, hei hi em ni change kan tih chu tih hi ka question duh a ni.

A dang lehah chuan, hei kan Health Care Scheme sorkar hmasaina kan lo buaipui a kha wawiinni thleng hian chhunzawm a ni thei ta lova. He House ah hian ka hriat sual loh chuan session hmasa lawk khan, March thla khan Resolution hialte pawh kan han passed kha a ni a. Mahse wawiinni thleng hian miretheite'na kan in enkawlna tur atana he ruahmanna, sum pawh awm reng si hi chhunzawm thei lova an awm hi kan sorkar hi a in ngaihtuah chian a pawimawh hlein ka hria.

Hei Gas chungchangah te pawh hian thil ho taka lang, mahse pawimawh em em si, black Rs.650/- te leh Rs.700/-a wawiinni thlenga kan la zuar thei hi sorkarin a tihngaihna a hre tlat lo mai. Miretheite rahbeha kan awm lutuk ang chite hi enfel a ngai ka ti khawp mai. Tin, Chini ah harsatna lian tak mai kan tawh a, kan han pek dan te hi a nilo lutuk deuhin ka hria. Ka bial angah te chuan Gram 200/300 te an pe a, han lak ngaihna pawh kha a awm lo lutuk ve deuhva, kan Civil Supply Minister hian enchiang sela a tha khawp mai. A harsa a nih chuan ka hrethiam. Ama'rawhchu, tunhma khan hetiang em em maia harsatna hi kan la tawh ngai lovin ka hria a, a pawh ka ti a ni. Sorkar hmasa khanin kan Mautam denchhen khan “Mirethei harsate ngaihsak an ngai a ni” kan ti a. Sum a awm leh awm loh pawh ngaihtuah lovin theih tawpin tan kan han la a, khami hmang khan cheng singkhat (Rs.10,000/-) income ah la phalo ho tan khan buhfai a thlawna kan han pek te, thil tawp hi a tam ve tawh lutuk a. Tun sorkara chak tak maia MLA tling te hian, kan rorel danah hian a hmasa a mite thil tih cancel leh hnualsuat lutuka kan kal hi Pu Speaker, democracy ah hian a fel lovin ka hria a ni.

Amaherawhchu, chutihruah chuan lawmthu han sawi vena tur ka nei a. Kan Education Minister khan a sawi chhuak an ti a, ka awm loh lai a ni a. “Asian

Development Bank ah kan dawr a, hemi education quality kan drive na tur atan Primary leh Middle School zirtirtu, anmahni duh thlan ngeia an pension theihna tur atan voluntary retirement scheme (golden handshake scheme) kan tih, sorkar hmasain a lo ruahman tawh kha tha kan ti a, kan chhonzawm dawn a ni”, an ti kha ka lawm khawp mai a. Khatiang khan thil thenkhat a hlawhtlinna hmuh tur a awm chhoh lain thil tam takah kan sorkar hian kan rorel danah hian kan ti lutuk deuh niin ka hria.

Pu Speaker, hei NREGS hi Mizoramah chauh nilo hmun tinah a lar em em mai a. Thil nuihzatthlak deuh chu, Zuangtuiah sawn Job Card chianguang lo avangin MNF V/C te kha tunhnaiyah khan an thiat daih mai a. Vawiinniah hian document tam tak rawn theh luh tur thuneituah hian kan nei tih ka sawi duh a. A dik lo kan rawn theh lut ang a, a dik lo kan rawn theh luh a hi in hmuh hian MNF V/C chauh nilo, ruling V/C pawh in thiat ngam ang em? tih ka zawt duh che u a ni. Engvangin nge Zuangtuia MNF V/C a nih avanga kan thiah ringawt? Chuvang chuan ka rawn theh lut dawn a. (Speaker.... Ngawi rawh. Hemi chin atang hian thubuai..... nih leh nih loh ka hre lova. Amaherawhchu, heta Member zahawm takina chu chu thubuai kal mek a ni e, a rawn tih chuan ka hre ve a ni ta mai a. Chuvangin khatilai Zuangtui V/C lam kha chu i sawi kan rih ang aw.) Engpawhnisela, helaiyah hian a implement tu kha V/C te an nih avangin sawi tel a ngai a. Ka sawi tum tak chu Job Card diklo tam tak vawiinniah hian document fel tak kan nei tawh a, kan rawn theh lut dawn. Tahchuan tumah political party thliar bik nei lovin hma kan la dawn em? tih hi ka zawt duh a ni.

A dang lelah chuan hei vawiina kan sorkar chelhtute hian inthlana in intiam ang khan, kan sorkar hnathawkte an hlawh thar tur Sixth Pay hi hi engtin nge in tih dawn tih hi ka sawi duh a. Engpawhnisela, kan House Leader in min chhang thei turah ngai ila. India ram State tam takah an la tawh a, Mizoramah hian lak a la ni lova. Hei hi a pawimawhin ka hria a, ka sawi leh duh a ni.

Tin, Pu Speaker, thil tam tak lo lang hi sorkar hmasaina a tih ang chi hi sorkar tharin a ti thar ta tih ang deuh chi hi a tam ang reng khawp mai a. Tukina zawhna leh chhanna hunah pawh khan khulaia dumping ground Tuirial pawh khu MNF sorkar laia hma kan lakna kha a ni a, a tha thova, hetiang han sawi hi a nuam vein ka hria a. Sorkar hmasa khan engmah tilo ang deuha ngaih theih tur lek lek khan thil a awmin ka hria a, an tilo e, tih pheichu a sawi miah lova, ama'rawhchu, hetiang hi kan thiam riau a, a tha thove. Tin, chutihlai chuan Pu Speaker, PWD ah hian thil mak deuh mai change a thleng a. Ka bialah sawn MNF sorkar tawp lam khan sawlam pang saw PWD tena hma an lakna tur atan mumal deuh hleka office te pawh dah a ngai a ni. Tun hnaiah Pu Speaker, Cabinet Meeting ah khan thil mak deuh mai change lo thleng ta chu, Bunghmunah khan an dah ta daih mai a nih chu, a mak thei khawp mai. A ram leilung han en hrim hrim pawhin, kan dah hrim hrim duh a nih chuan Division hnih dah ila, amaherawhchu, kan Official te leh Engineer te pawhin a tha tura an ngaih kan dah a hi chu inzahtawn a tha khawp mai. Kan mamawh ve a nih

chuan sawlai deuhah te pawh dah ni ta tho sela, ka object chuang lova. Hetiang ang chi hi vawiin hian kan nei zauh zauh mai a, a pawl khawpin ka hria.

Tin, hei Model Transport kan han tih phe chu Mizoram sorkar tangka em em pawh nilo, Mizoram tan chuan thil ropui a tling dawnin ka hria a, kan sorkar laia theih tawp chhuaha kan Chief Minister hmalakna pawh a ni tel bawka a. Tin, hmanna he House-a kan han sawi, Oil laihchhuahna tur thil reng reng te, PMGSY kawngte, khang thil pakhat thil thuah hi chuan a hmasa a mite thil tih hi sawi chhuah ve deuh hi chu ching ila a tha khawp mai. Sawi in hreh ve lutuk deuh a, a tha lovin ka hria. Thenfai tih ringawt maia in buai lutuk a hi a fello deuh hlekin ka hria a, a tha tih hi a tam a nia, engatinge kha kha in sawi hreh em em? In lei a tawt tlat mai hi kan hrethiam bik lo a ni. Dik tak chuan budget session kan han neih hmasak bera kan MLA tam tak, helaia ka hnung a mite chuan kan budget te pawh an han fak a. Tichuan kan han lai deuh vak a, amaherawhchu, in vannei viau mai a, a sum lian tham erawh chu hei in hun laiin ka'n ti teh ang, arawn thleng a, 'kan hmalakna a ni' tia in sawi bawrh bawrh te kha pawl kan ti reng reng lo. (Interruption)

Tin, hei kan Aizawl khawpui lai taka Rajiv Gandhi hming chawia kan project lian tak mai, min han sawn thlak sak te hi chu keini chuan kan pawm hlei thei lo a ni, harsa kan ti khawp mai. Khatiang in thiah sak buaih buaih kha he sorkar ah hian a tam deuh a, na tilo ula, kan lo hmuh dan che u a ni ve miau si a. Pu Speaker, darkar chanve chu min pe la chuan thil tih that ang chite pawh sawi tur a awmin ka ring a, han sawi ve pawh ka duh khawp mai a, mahse hun a chep si a, duh tawka mai ang. Ka lawm e.

S P E A K E R : Demand mal te kan la sawi dawn a, chungah chuan kan la sawi zel turah ngai ila. Tunge sawi tur dang kan awm tawh lo em ni? Kan wind-up tir tawh mai dawn em ni? Pariatin kan sawi tawh a ni. E.... Pu K.S. Thanga.

Pu K.S. THANGA (INC) : Pu Speaker, ka lawm e. Ka hmaah Member zahawm takin a rawn sawi a. Budget Speech tha tak mai sawi tur a awm laiin sawi tur kha a hmu lo viau mai kha a vanduai thlak ka ti a, a khawhar hle ang tih pawh kha ka rinpui a, khawhar mai awm pawh a ni. A chhan chu mi tan lohna lamah a tang dawn niin ka hria a, chu chu ka'n sawi hmasa ve duh a.

Pu Speaker, a hmasa bera ka'n sawi duh chu vawiinnia kan budget ngaihtuah mek a hi, Mizoram kum 10 kalta chhunga budget speech ka phak ang tawka ka lo ngaihthlak ve te, budget present ka lo zir veah te tuna kan budget pharh anga tha hi ala awm lovin ka hria a, ropui ka ti a ni. Kan Chief Minister, Finance Minister ni bawka hnenah hian lawmthu ka'n sawi duh a. Ka

hmaa Member thenkhatten an sawi ang khan, a bu hrim hrim atang pawh hian kum 10 kalta vel kha chuan Independent Speech, Chief Minister ina sorkar hmalakna a sawi, infakmawina ang deuh khan hetiang figure leh achievement hmalakna tur awm ang hi a awm ngai mang lo hian ka hre deuh a. Vawiinnia budget awmze nei rawn pharh thei Chief Minister leh Finance Minister kan nei hi ropui ka ti a ni. Mithiam helaia sawi ve phalo te pawh hian kan sorkar hmel tur a lang niin an hria a, change a in tan nghalin an hria a, chu chu vawiinniah hian ka'n sawi chhuak ve duh a. A vaiin Darkar khat leh a chanve dawn sawi a nih avangin a speech a hi 10 minutes chhungin ka sawi zo hman dawn lo a ni.

Pu Speaker, ka Member pui zahawm tak ten an rawn sawi ang khan vawiin hi ka first speech a ni ve tho mai a. Budget speech hi ka vawikhat sawina tur a ni a, 10 minutes chhunga a len loh deuh pawhin min hrethiam la, vawiinniah hian thil thar change a thleng mek a, a pawimawh ka tih deuhthe ka'n sawi duh chu – Pakhatnaah chuan a budget hrim hrim, surplus budget kan han nei hi Mizoramah hian a thleng khat hle tawh mai a. Vaibelchhe 13 laiin kan budget hi kum danga deficit-a kal thin, mahse vaibelchhe 13 laia surplus kan nei tur chung chuan, hun kal tawha bat a lo tam vang erawh chuan a tawpnaah ba chu kan neilo thei dawn lova. Mahse vawiinniah hian kha surplus budget kha Mizorama thil thar change lo thleng niin ka hria a, ropui ka ti a. Kan Finance Minister hi chawimawi a phuin ka hria a, kan sawi leh duh bawk a ni.

Tin, nidanga kan la hmuh ngai loh Contingency Fund of Mizoram receipts and disburse Bank tih hi helaiah hian a lo lang a. Chumi niah chuan dan ang thlapin Finance lam ten hemi Head atang hian he contingency fund hi an rawn hmang tangkai ang a. Hei hi Mizoram tan thil ropui change a tlingin ka hria a, ropui ka ti a ni. Tah hian kan Finance Minister hi a chhuanawm hlein ka hria a ni.

Tin, kan hmaah te khan kan han ngaithla a. Budget chhungah lang lo mahsela zalenna kan in pe zau bawk a, kan ngaithla zel tho a. Helai ka'n sawi duh chu a chhung ami ni chiah lo mahse kan ngaihtlak mekah khan, sorkar hnathawkte vaubet leh action in lak ching leh mipuite vaubet sorkar anga vawiiinnia helai House-a rawn ri mai kha a paw ka ti hle a. Kei ka lo hmuh dan chuan Mizoram mipuitena vawiinni an hmuh dan hi chu lawlessness sorkar awmze neilo-a nuar huai huai leh buaina siam huai huai, mi vau nasa apiangina sorkar an khalhna atangin rule of law, Dan ina ro a relna hmunah hian he sorkar hi a inthlak mek a. Chu chu mi dik taka nung leh thahnem leh dik taka nun duhte tan hian vawiinniah hian hahdamna leh zalenna a lo thleng a. Suahsual bawl leh huaikawm bawlte tan hian he kan ram, Kristiante ramah hian zalenna a awm tawh lova, hmun an chang ve talo ni te hian vawiinniah hian Mizo mipuiin an han hria a. Chuvangin midikte an thlamuang a, mithalote vawinniah hian neksawrin, nek bo tumin an awm mek a. Chu chu he sorkarah hian change ropui tak niin ka hria a. Chuvang chuan heta kan hruiatu hetiang hun thleng thei tura mitena chutiang ngaihtuahna, dikna, rinawmna an dinpui a, chutiang ang sorkar nei nia an inhriatna hi vawiinniah hian kan ram tan hian change ropui tak a ni a. Kohhran mite, midikte tan vawiinniah hian thlamuanna hi a lo thleng ta a. Buaina

siamtute tan, diklo taka mi pawng nek chingte tan hun a awm talo a ni. Chu chu vawiinniah hian Kristianna a taka hmang chho thei tura kan Kristian nihna lo par chhuak tur hi a ropui ka ti a, khalai kha kan sawi ve duh a ni.

Pu Speaker, sawi tur a tam avangin tlem ka point chhinchhiah ka sawi ang khan, darkar khat leh a chanve chung ami pawh chu point pakhat te te pawh kha darkar khat dawn emaw sawi tham vek mai kha a nih avangin, ka theih ang angin ka ngaih pawimawh zawng zawngte ka han tar chhuak ve dawn a.

Pakhatnaah chuan kan sorkar hnathawkte hamthatna vawiina lo thleng tur hi sorkar hmasa kum 10 chhunga beidawng taka an kal tawh hnuah, tuna kan Chief Minister zahawmtak mai hi Election hmaten an han hmu a. Tichuan an duh anga 6th Pay Commission report anga Central Pay zawm tura sorkar hnathawkten an va ngenna chu vawinah hian a takin a lo thleng dawn ta a. Chu chu budget ah pawh hian chiangkung takin dah a lo ni ta a. Chuvang chuan vawiinniah hian kan sorkar hnathawk, kan rama a hnarkaitu politician te chu a changin hetah kan awm a, a changin lehlamah kan thu a. Heng ang hi budget ah a rawn lang thei ta hi kan Finance Minister hi a thil sawiah hian, opposition laia a sawi hi sorkar a nih hnuah hian a sawi a tlanchhiatsan mai mai lo a ni, tih hi vawinah hian budget ah a rawn lantir hi a ropui ka ti a. Mizoram sorkar hnathawkte tan malsawmna a niin ka hria.

Tin, hei opposition lai atanga kan programme kan party in vawinia rorelna, mawhpurhna kan kuta a lo awm hnu pawha kan kalpui zel NLUP kan tih hi a pawimawh ber Mizoramah chuan kan flagship programme kan ti a. Chu chu hei kan Chief Minister zahawm takin central lamah te zuk kalin vawinniah hian India Prime Minister te, tin, Planning Board Chairman te, central-a mithiam zawng zawngte zuk convince-in kum dang zawng zawng aiin kan budget punna pawh 25% a sangin, vaibelchhe 1000 pawh kha kum hluia budget atangin a tak takah chuan kan hmu pha lo a ni a, kum kaltaah khan. Vawiinniah hian vaibelchhe 1250 lo kalin 25% a rawn pung hi Mizoram tan malsawmna a ni a. Hei hi vawinniah hian thutiam dingte kalkawng a ni tih hi Mizo mipuiten kan hriat a pawimawhin ka hria a. Hetah hian chhungkaw nuaikhat leh singhnih atanga nuaikhat, chumi aia tam mahte pawh a lo ni mai thei a. Chhinchhiah danah chuan nuaikhat singhnih emaw vel a ni mai thei a. Chung chuan vawiinniah hian hamthatna hi an dawng dawn a ni. Hetah hian ropui ka tih em em mai chu khang sorkar hnathawk hamthatnate va chhuhsak chuang miah lova, tin, vawinnia sumdawng hausate leh eizawmna danga kalte hamthatna leh hmasawmna dal miah lova, miretheite chawikanna tur a hranpaa programme a rawn induang a hi ropui ka ti a. Thenkhat engemaw laia Chief Minister lo ni tawhte chu nita sela, kumin ringawta vaibelchhe za cheng nuai singkhat budget-a rawn langte hi Chief Minister leh Finance Minister ni bawh hian kan worker te tan contract ka thawhtir duh hrih ti ta sela, a thutiam hi nakum velah emaw, nakum kum leh velah emaw tihhlawhtlin duhin sawn kual sawn kual ching, lo ni ve hlauh sela chuan mipuite hian kuminah engmawh dawng lovin hetilaia ruling worker lo hah te tan khan sem ta sela, mi 1000 hian cheng nuai 10 zela an chan

phak a tling a ni, contract ah. Vawiinniah hian mipuite tan a rawn chhawp chhuak ta hi ropui ka ti a. Helai hi sawi hmaih phal chi a ni lova ni.

Tin, hemi ina a rawn nghawng lawmawm lehzuala chu Agriculture and Allied ah hian, Mizorama budget zawng zawnga la sang ber a nih avangin central-a RKVY vawi khatmah kan la hman tangkai ngai loh Agriculture and Allied Department tena an zuk it em em, chilputa kumtin an thlir liam a kha Cental-ina in State budget pumpui atanga 11.3% in dah hma chuan hei hi in rawn hmang ve pha lo, in dawng ve pha lo an tih a kha vawiinniah hetiang kan lo dah tak avang hian kan pawisa la hmuh ngai loh, Agriculture and Allied Department ten vaibelchhe singhnih chuang kumtina Mizoram lo thleng ve ngai lo a hi tunah hian kan dawng ve dawn tan a. Kan Agriculture mithiamten chung atan pawh chuan hma an la a, tunah hian an hlim em em a ni, tih kha vawiinah hian kan hriat tlan atan ka'n sawi duh ve hrim hrim a, lawmawm ka tih thu ka'n sawi bawka ni.

Tin, a dang leha chuan hei Sports lama a rawn tihlan hi a ropui ka ti a. Kan thalaiteah hian potential a nasa em em mai a, chu chu kan thalaite vawiinniah hian India ramah kan telnaah chuan kan lang chho zel a ni. Vawiinniah a awm lai ate a incumbent, a hmang tangkai mektu, a inhmang mek ate hnawl si lovin, a aia thiamna sang zawk hmang turin Catch them young policy sorkarin a rawn duang a. Sports Minister chak tak kan neih avangin kan ram hi vawiinah hian economy-a thanlen kan tum lai mek hian infiamnaah pawh khawvel hi kan hneh thei a ni, tih lantir turin ruahmanna a rawn siam hi ropui ka ti hle a ni.

Chubakah chuan, Human Resources Development ah te, thil tam tak ruahmanna rawn siam a ni a. Hetah hian a lang a, Pu Speaker, ka sawi tawh lo mai ang a.

Tin, hei External Aided Project (EAP) ah te, million 68 August ni 4, 2009 ah singed a ni tawh a. Chu chu vaibelchhe 326 vel India pawisa chuan a ni a. Tin, September 17, 2009 ah 100 million vaibelchhe 480 lai mai te tunah hian kan Chief Minister chak tak leh Finance Minister hmalakna angin vawiinniah hian a rawn thleng chho leh ang a. Chu chuan kan ramah Aizawl khawpui tawp cheina te chu nichina kan ngaihthlak ang khan leh thingtlang hmasawna chi hrang hrang henga kan budget baka rawn kal turte hi loan interest tlemte a ni a, hei hi kan ram tan hian malsawmna a ni dawn a ni.

Tin, hei MLA Fund nichinah kan ngaithla a. Kan development engkim mai hi duh angin a nih tur anga a awm lohna laiah MLA zawng zawngten kum danga an la hmuh ngai loh, heti khawpa sum harsa chung chung kan Chief Minister leh Finance Minister ina MLA te tana an biala hmasawna, kum dang zawng zawng aia sanga min rawn dah sak hi a lawmawm a. Vawiinah hian heng hi hun tlemte karah Pu Speaker, ka'n sawi ve a ni a. Lawmthu ka sawi a ni. Ka lawm e.

S P E A K E R : Sawi leh tur kan la awm em ? Pu K. Liantlinga i lo ko ang.

Pu K. LIANTLINGA (ZNP) : Pu Speaker, ka lawm e. Kha an sawi nasa tawh khawp mai a. Fakna thute pawh a tam viau mai a. Pu Speaker, kei pawh hi ka maiden speech a ni ve a, budget ah chuan (Speaker... minute hnih chu ka pek belh ang che) A lawmawm e. (Speaker.. I mamawh viau a i dil leh chuan kan la Ingaihtuah leh zel thei ang) A lawmawm e.

Nia, hei budget speech ah chuan a sei pawl tak pawh a ni awm e. Darkar 1:40 minutes dawn lai niin ka hria a. Chhiar ngar ngar pawh khanin a ruling lamte pawh kha in muthlu hman emaw ni chu aw, tih tur khawp kha niin ka hria a. Hetiang anga chipchiar leh famkim, budget speech han awm hi a khat viau awm e. Kan hre ve lova, kan la thu ve ngai lova. Amaherawhchu, han chhiar han chhiar hian a tam em em mai a. Kuminah hi chuan work programme tih te, work schedule tih te, fiscal lampang leh chi hrang hrangte a bu pawh hi a tam khawp mai a, chhiar fe tham a awm a. Amaherawhchu, han chhiar han chhiar chhoh hian, ngun taka zuk ngaihtuah chuan hmasawmna em em chu a langin a hriat lem lova, kalphung pangngai kha a ni mai awm mange aw, a tih theih a. Tin, budget te chu sawi tawh ang khan tlem chuan an pung chho a ni a. Hetah hian a pun chhohna pawh hi an han sawi ang khan Rs.1,250/- (vaibelchhe sangkhat zahnih sawmnga) plan fund-in a pung a ni an ti a. Amaherawhchu, speech te han en chhoh zel hi chuan nikuma hlawhah khan cheng vaibelchhe zakua sawmnga pahnih leh point sawm pali a ni a. Kuminah hian cheng vaibelchhe sangkhat zahnih sawmli leh point sawmhnih leh paruk vel kha dah an ni a. Tahchuan nikum aia a punna a chu, cheng vaibelchhe zahnih sawmriat pariat leh point zero two a ni a. Tin, khang kha salary & Wages ah te a ni a. Amaherawhchu, Land use ah te an han dah a, Agriculture Department ah an awm a, cheng vaibelchhe za leh point five a awm a. Khatianga han chhut khan, hetilaia Department hrang hrangte hian an plan fund ah hian cheng vaibelchhe sawmruk pakhat leh point nga velin a tlem zawk nikum ai khan. A chhan chu Land use pangngaia kal a, lawm em em a, ha hipa kan sawi lai khan a nihna takah chuan sorkar kalphungah Department hrang hrangte an plan fund te a tlemna, an budget tlemna hi cheng vaibelchhe 61.5 vel ni zawkin a hriat a. A chhan chu tunah hian hlawh leh thil dang atan hian an zuk sawi chhuak kan ti dawn nge, kan plan fund punna hi. Hnathawhna tak tak tur leh thil dang erawh kha chu a tlahniam a, ama'rawhchu, thil thenkhatah chuan a hniam hlei nem, tih te pawn a sawi theihna lai awm chu; cheng vaibelchhe 100 kha Agriculture Department atang khan Department hrang hrangah te pawh Land use atan semsawm tur pawh lo la ni ta sela, kha khan kan plan fund hrim hrim a hi chuti taka punga han lawmna em em tur development leh thil dangah chuan a awm lem lo a ni, tih kha a lang theiin hriat a ni.

Tin, hei kan Chief Minister khan cheng vaibelchhe 2500 New Land use policy atan hian a awm a ni. Kum 5 atan kan dah a ni, tih kha Champhaia a thusawina press statement ah khan kan lo hmu a. Khata ngun taka han thlir kha chuan cheng vaibelchhe 2500 hi awmin a lang lo. Helaia a lannaah hi chuan family nuaikhat leh singhnihte tan a family tanpuina turah hian cheng vaibelchhe 1200 dah a ni a ti a ni, kum 5 atan.

Tin, a lehlamah chuan ngun taka han thlirin hetilaia cheng vaibelchhe 1200 a dah chuan cheng 1250 dang hi chu Infrastructure development, Information Education & Communication Training leh thil dang programme Implementation atan tiin a rawn tarlang leh si a. Khalaite kha mipui hmaa a thusawite nen khan a in kalh ta mai em ni chu aw ! tih theihin helaia speech ah hian a lo lang ve leh si a. Chuvang chuan kan budget speech te pawh hi ngun taka kan ngaihtuah a, kan thlir chu ngaiin ka hria a ni. Khang ang chi a kha, tlem tlem han lawr chho ta ila. Chuvang chuan ngun taka zuk ngaihtuahin, nichina kan Member zahawm tak ten an han sawi tawh ang khan special package a ni lo a ni, tih erawh hi chu an chian a ngaiin ka hria. Tunah hian sorkar hnathawkte salaries and wages ah hian a kal ral zawk nite pawh hian a lang deuhva, mipui tak tak (VIP) te tana development kalna tur a hi thui takin a lang lem lo a ni, tih kha ka'n sawi ve duh a.

Tin, Land Revenue & Settlement tih chungchangah te pawh hian, Land ceiling leh thil dang Act hrang hrang han siam chu ruahmanna a awm pawh a ni mai thei a. Amaherawchu, hemi chungchangah pawh hian entirnan - kum 2005 November thla te pawh khan hetiang ang chi hi chu Maharashtra te chuan an lo ti tawp tawh zawk a ni a. Tin, tunah hian Goa te, Jarkhan te leh W. Bengal te pawh hian khatiang zawng khan hma an la tawh mah mah a. Hei hian Land ceiling Act han siam pawh hi State dang kalphungah te hian a tul lo mah mah tawh zawk nia hriatna te a awm a. Tunah hian State pali/panga lai chuan hma an la chho mek zawk a ni a. Hetiang chungchanga harsatna kan tawh nia lang zawk a chu, Village Council tena ram an pek vak vak te, lehlamah kan Department ten Dan anga an lo pawm leh si ah te, tin, engemaw project lian deuh compensation pek tumna lam chi ah te khan, pass insiam rum rumna ang chi te, thil tam tak a lo awm thei a. Tin, tunhmaa NLUP ah te khan ram an sem a, khang kha minimalin an hralh leh a, khalaiah khan kan sorkar hian pawh nasa tak khan a lo khawih zawk nite pawhin a lang thei a. Chuvang chuan hengte hi control a, mumal taka Dan siam hi tul zawk a ni lawm ni ? Helai budget speech kan en mai hi chuan development te pawh kalpui tak tak tum te pawh a anna lai a awm thei a. C.S.S. atanga pawisa indaih loh avanga sum awmsa lo hman lawk tur ang chi lo awm te phei kha chu thil tha pawh a ni a. A tha lai thenkhat awm leh a tha lo lai tam tak awm karah hian, a tlangpuia han thlir chuan a ngai deuh a ni mai lawm ni, tih theih a ni a. Tin, hei tuna Sixth Assembly ah phei hi chuan ruahmanna dang tam tak kan han sawi ang khan, lehkhabu tam tak chhiar tur a awm ta a, chungah chuan tuna kan Sports budget hi kan sawi leh lawk ang a. Kan Sport budget hi han thlur deuh kan duh a, hetah hian Salary and

Employment data tih kha a rawn chhuak ta a, nidangah chuan la hmuh ngai loh ni awm tak kha a ni.

Tichuan, hnathawktu 65 an awm laiin helaiah hian Salary Estimate ah khan cheng vaibelchhe 3 leh nuai 65 leh point 20 a awm laiin, heta Abstract of Demand ah khan chuan cheng vaibelchhe 2 leh point 77 a awm chauh mai a. Helaiah pawh hian nuai 91 velin a in ang lova, helai an rawn prepare-na hi an hmanhmawh lutuk vang nge, tih dik loh nge chu ka hre lova. Tin, a bikin PHE - Water Supply & Sanitation ah pawh hian hemi Salary & Employment data-a a landanah chuan cheng vaibelchhe 27 leh point 90 leh sing 55 a awm a. Tahchuan abstract of demand-a a landanin cheng nuai 2781.55 a awm a, tah hian nuai 9 in a inthlau bawk a ni. Hetiang hi Department 14 vel kha inmillo a awm a ni. Chuvang chuan helama kan budget pharhah leh Salary-ah hian thil inmillo a awm a. Tin, Sports & Youth Services ah hian mi 65 in hna an thawh laiin, mi pakhat zel per head, per month-a an pawisa lakluh Rs.38,458.33 a ni a. Peon atanga Officer thleng khan thlatin Rs.38,458 la tur angin a lang tlat mai a. Tin, hemi Water Supply & Sanitation ah phehi hi chuan mi pakhat zelin per head per month-in cheng singli sangruk za sawmli leh point zero four (Rs.46140.04) angin a lo lang ta a ni. Khatiang ang kha Department sawm chuang hetilailah hian a lang a. Khang avangte khan helai hi chu enfiah deuh chu a ngai a ni lawm maw ni chu aw ! a tih theihin ka hria a.

Tichuan, hei thil lawmawm tak a nihna lai chu a awm a. Kuminah hian kan hmalakna te leh kan MLA te hmalaknain Assembly lam atangin Dan-a lo awm sa, thil thar ang deuh chuan kan han ngai a, ama'rawhchu, Subject Committee ten an han thlir a, performance budget te siam chhuah chhoh a lo niin; helai kan hmuh theihnaah pawh work programme te, performance budget te kan han hmu a, a beithamin a kimchang lo em em a. Amaherawhchu, Sap hovina an sawi dan ang deuhin an thufingah chuan, "Thing hi a phun nan eng hun hi nge tha ber ang" an ti a, a tha ber chu 'tunhma kum 20 kha a ni a, i phun lo a nih chuan, tunah hian phun mai rawh', tih ang deuh khan, tunhma zawng zawnga performance budget leh work programme te la awm ngai lo han awm ta kha a ropuini tha ka ti a. Helaiah hian ka'n sawi duh a chu, Assembly ah budget (demand) kan pass dawn a ni a, budget pass tawh hnu hian engatinge demand-a awm tawh sa, Assembly in a pass tawh si hi, capital expenditure/revenue section te emaw kha Finance Department through a ngai leh thin ni. Department hrang hrangten harsatna an tawh thin niin ka hria a, chuta tan chuan thuneihna semsawmna deligation of financial power te hi awm thei sela a thain ka hria a. Planning ah te, Finance ah te a kalna tur atan hian dawhkan sawmnga (50) vel hi a chholam leh chhuklam hian a paltlang a ngai a. Chutah chuan quiery an siam chuan an han hawn leh a, administrative approved la tur hian thla hnih/thla thum te a duh thin a ni. Kan budget cheng vaibelchhe tam tak hmanng tur leh development chak taka kal a, hma la tur chuan kalphung thar kan siam a ngai a ni. He kan budget hmanng tur pawh hian Decentralization of Financial Power hi kan introduce a ngai a ni. Tin, Administrative Head te hian financial power nei ve thei tawh sela, chutiang a nih chuan Financial Advisor te neiin Joint

Secretary/Additional Secretary rank emaw kha lo awm ta sela, Social service, General Service, Economic service hrang hrangah khan dah ta sela, chutiang chuan ruahmanna siam thei ta sela chu a tha awm mange ka ti a. Helai point pawimawh tak mai hi kan sorkar tharah hi chuan Finance Department han approve leh hran ngai tawh chuang lovin Assembly-a pass tawh chu Administrative Head te hian thuneihna neiin an budget hi hmang zung zung thei sela, kar khat lekah Financial sanction kha an la zung zung thei tawh ang a. Chak takin hma kan sawn a rinawm a ni.

Tin, performance budget te kan hmang chho zel dawn a nih pheih chuan Finance Department hian tih tur tam tak a nei dawn a. Administrative approval la tura Finance Department kaltlang hian, awlsam zawkin dawhkan 10 vel lek kaltlang hian sanction a hmuh zung zung theih ang a. Chungah chuan directorate lampang atangin chak zawkin hma a lak theih dawn a, hengte hi han tarlan ve hrim hrim kha thain ka hria a ni. Kan House Leader te pawh hian hetiangawlsam zawka sum leh pai chak taka hman theihna kha pe ta sela. Tin, Secretary-ina a sanction theih chin kha entirnan – 100 lakhs emaw pawh lo ni sela, a bakah kha chuan Minister ten approval pein, an Ministry theuhah thuneihna tawp nei sela. Hetiang hi central ah pawh an kaldan a ni a. Central Government te pawhin budget an pass tawh chuan Ministry tinah an budget chhungah chuan engkim an ti thei vek a ni. Tin, a bakah chuan CSS, loan component te leh thil dang chi hrang hrang lo awm turah erawh kha chuan finance/planning approval te la ta sela, chak zawkin hma a lak theih lawm ni tih kha helai budget-a speech kan neih ve naah hian, kan House Leader-in a lo enzui atan ka'n rawt ve a ni e. Ka lawm e, Pu Speaker.

S P E A K E R : I hun a tawp tlat mai. Tunge sawi tur kan la awm em? Pu H. Zothangliana.

Pu H. ZOTHANGLIANA (INC) : Pu Speaker ka lawm e. Kei pawh MLA zahawm tak tak tam zawkin an sawi ang khan budget discussion hunah hian ka din vawikhatna a ni a. Chuvangin ka thiante i duhsak ang tho khan a tul a nih chuan min duhsak ve theih ka beisei a, ka ngen hmasa che a ni. (Speaker: A hma chiaha sawi anga khawpkhamlo deuha sawi i nih chuan duhsak teh reng mai) Ka lawm e, Pu Speaker.

Kan budget hi budget tha tak niin ka hria a. Zirna lamah tawite kan zir ve chhungin Economic subject zir ve thin ka ni a. College ah te pawh hun reilote lo zirtir ve tawh thin ka ni a. Budget buatsaih hi Member te hian thil namenlo tak a ni tih kan hre theuhin ka ring a. Chuti chung chuan Sixth Pay Commission Recommendation te sorkarin a hmang ve lo thei lova, harsatna tam tak awm chungin kan Finance Minister, kan Chief Minister zahawm tak ni bawh hian rilru leh ngaihtuahna nasa tak sengin; a experience tam takte hmang tangkai bawkin budget tha tak mai min rawn chhawp chhuah sak thei hi a lawmawm ka ti a ni,

tih hi ka'n sawi hmasa duh a. Thil tam tak kan Member zahawm tak takte khan an sawi tawh a. Sawi nawn ka tum lo hram ang a, thil pahnih/khat han sawilan ve duh ka nei a.

Pakhatnaah chuan, Economy thang tur tehkhawng pawimawh tak mai pakhat chu Primary sector kan tih, Agriculture sector and Allied activities te ina Gross State Domestic Product (GSDP) kan ti a, an contribution a san chhoh leh a tlakhniam a hi a ni a. Chumi kawngah chuan Mizoram hian hma kan sawn ve hlek hlek niin ka hria a, kan budget bu atang tea han thlirin. Entirnan – kum 2007-2008 chhung khan kan Primary sector, Agriculture sector than chhoh dan chu 2.86% a ni a. A kum leh 2008-2009 ah chuan 2.85% a ni a, a la ngai deuh reng. Amaherawhchu, a tlakhniam hlek a, chu chu thil lawmawm lam a ni, economic zirna lam atanga teh chuan. Chutih rualin 2009-2010 ah hian 3% contribute tura beisei a nih tarlan a ni a, chu chu engemawti zawnga ngaihtuah chuan a fuh chiah lo mange aw, tih theih a ni. Mahse helai hi han sawi chian deuh hlek thain ka hria a, lo zir chiang duhte an awm takin Primary sector-in Gross State Domestic Product-a a contribution a tlakhniam hian sector dangah a thang a, economy pumpuiaah thanna a thleng tlangpui a ni tih zirna lama teh dan a nih thin rualin, Mizoram tan hian thil lawmawm a ni fan fan a ni tih ka'n sawi chiang duh a. A chhan chu he sorkar tharin flagship programme pawimawh bera a neih chu NLUP a ni a, a kaihhnawih leh a awmzia te hotuten an sawi tam tawh a, ka sawi nawn vak lo ang a. Chumi avang chuan Agriculture ah hian kan thang dawn a ni tih a beisei awm em em a. Chutihrual chuan, chumi belhchhah chuan kan sector dang Industry sector kan tih te, Service sector kan tih te pawh Agriculture a than ang thovin a thang chho mek zel a ni tih kan hmu thei a. 2007, 2008, 2009-a a than chhoh dan aiin 2009-2010-a a than chhoh dan tura ruahman leh beisei chu a sang zawk em em a ni. Chumi awmzia ta chu Primary sector a than rualin Secondary leh Tertiary sector te pawh nasa takin a thang chho dawn niin a beisei awm tihna a lo ni ta a. Chumi ina a tarlan chian em em chu budget tha tak, inbuatsaihna tha tak kan hotute hian min rawn chhawpchhuah sak a ni tihna niin ka hria a, chuvangin a lawmawm ka ti. Hei hi 'a sign of good progress and development' a ni tak meuhin ka hria a. Chu chu ka'n tarlang hmasa zawk duh a ni.

Tin, a tir lama ka sawi ang khan 6th Pay Recommendation sorkarin hman chho ve tura budget te pawh a buatsaih mek lai hian, Ram tana ro tling tur thil awmze nei capital assets kan tih ang tak tak 'create' na tur, siam chhuahna turin capital outlay lamah pawh sum a dah thahnem thei viau zel mai te pawh hi a fakawmna lai niin ka hria a. Capital outlay tur atan hian chu chu creation of assets atan bik liau liau tihna a ni a. Hemi atan bik hian cheng vaibelchhe 393.88 ruahman a ni a, a tha tawk viau a ni, kan State sum dihhmun ngaihtuah chuan. Chu mai bakah ka lawmna tibelhchhahtu chu kan Revenue Account atangte pawhin (kan Non-plan Revenue Account atangte pawh hian) development expenditure tura kan hotutena an han ruahman thei a hi cheng vaibelchhe 896.40 a la ni fan fan mai a. Heng ang zawng zawng belhkhawm phei chu a tam tham viau a. Chumi awmzia chu he sorkar thar hian a ngaih pawimawh a sawi tam em

em thin, development, ram hmasawna tak tak tur atan hian ngaihtuahna a seng tak meuhin ruahmanna tha, ram leh mipuite tan hian a rawn chhawp chhuak mek tih a tarlang hi a lawmawm ka ti a ni.

Tin, sorkar hmasate ang lo takin he budget ah hian hma thlir thui tak a inphum tel tih hi a Chiang Tih ka'n sawi tel duh zawk bawk a. A chhan chu Mizoram pumina kan thawhchhuah ve GSDP kan tih atanga chhuta kan leiba tlingkhawm chho zel kan debt stock hi a pung lam zel a ni a, a mangan thlak em em a. Engtia kan tih thu loah, an huatthu nilo se, keini aia la mawlmang ve leh chhawng zawka kan ngaihte pawhin khawlaiah pawh an manganpui thu an sawi tam em em a ni. Naupiinghlim pawhin chutiang, chutizat chu a ba a ni, a ba-in kan piang a ni, Zoramah hian tih te pawh a nih hial thin kha. Chutiang karah chuan kan hotupa ber mai Finance Minister leh Chief Minister ni bawk hian hmalthlir thui tak neiin ruahmanna tha tak a rawn chhawp chhuak a. Kan GSDP atanga teha za zela kan leiba tlingkhawm hi a tlakhniam hret hret theih hi a pawimawh em em a, chu chu central sorkar pawhin min phut tlat bawk a ni tih hriain chumi kawng chu a buatsaih a. Chutiang ang chuan ADB (Asian Development Bank) te nena agreement sorkar tharin pahnih a han sign atanga pakhat zawk, structural adjustment loan kan han tiha sum tam tham tak mai te kha tun leh tun atana duhthawh taka hmalam ngaihtuah lova hmang mai tur ni lovin, kan leiba tlingkhawm zel hi a manganthlak tulh tulh lohna turin kan intih thawl ve deuh a ngai a. Hmakhua kan ngaih thiam a ngai a ni tih hriain kan loan leh leiba dang te, a interest sang zual chi ho 9% leh a chunglama pung neihote kha lo rulh lawk hialna tur atan, pre-payment of loans atan cheng tam tham tak mai a han ruahman te hi a huaisen thlak a, a fin thlak bawk ka ti a ni. Mi tam tak chu nise, tlachawp sorkar kan hrawn thin ang kha chu nise, kan sum hmuh theih ang ang kan ADB lian leh thil dang angte hi vawiina chawpchilha mipui lawmna siamna atan hman an tum ngei ang tih ka ring a. Kan sorkar thar erawh hi chuan chu ngawta chu ram leh hnam dinchhuahna tak tak a ni lova, a tlo lo tih hriain hma thlir thui tak neia ruahmanna tha tak mai a lo siam hi lawmawm ka ti em em a ni. Pu Speaker, sawi tur tam tak a awm a. Amaherawhchu, hun a tight deuh si a, chuvangin a tawi zawnga sawi ka'n tum ang a.

Sports & Youth Services chungchangah kan thianten an sawi thuak thuak tawh nain han sawi ve leh ka duh a awm a. Sorkar hmasaah khan pawisa a awm hma hauha contract sem a lar em em mai a. Entirnan – ka bial Lawngtlai East huam chhungah ngei pawh pawisa awm hma hauhin contract an rawn sem vak mai a, gallery siamna tur te, field siam thatna tur te, improvement atan te, a thuin cheng tam tak an rawn pe a. Contractor an rawn tir lut ruih ruih a, NBCC te pawh an rawn thawh tir hial a. Amaherawhchu, min tihchhiat sak tawk vel chiahin min letsan leh thei tawk a, a pawl em em a ni. Engvangin nge kan tih chuan, pawisa awm silova beiseinaa contract in pek lawk kan hotu hmasate khan an chin vang a ni a, a pawl hle a ni, tih ka'n sawi tel zawk duh a. Chutitea kan lo kal thin avang chuan sorkarin leiba tam tak min hnutchhiah a, kan hotute an mangang em em a ni. Chutiang chu kan dinhmun a nih mek laiin kan Sports

Minister zahawm tak hian theihtawpin hma a la a; central sorkar atangin One time additional central assistance hnuaih cheng vaibelchhe 11 leh nuai 91 zet mai a zuk sawi chhuak a. Chu chu kan sorkar hmasaina a kihhnawk thenfaina atan te, leiba min hnutchhiah rulhna atan te, a tul anga an hmang dawn te hi a lawmawm ve hrim hrim ka ti a. Kan hotu hmasate an lo chhuak then leh tawh nangi'n a lawmawm chhun ang ang ate khan min lawmpui ve pawhin ka ring a, ka'n sawi lang tel duh bawk a ni.

Tin, thalaite tana lawmawm em em mai turin 'catch them young policy' chu he Ministry formed-tuin a Ministry a formed chhoh dawn laia a lo sawi uar ang tak khan, a tak taka kal chhoh pui mek a nita te hi, lawmawm ka ti a. Hemia sorkar hmalakna thalai tam tak leh naupang zawkten an hlawkpui chhoh zia chu a hretute kan ni hlawm a, ka sawi nawn lovang a. Chutihruual chuan Sports Complex tha tak te pawh kan mamawh a ni tih hriain, kan hotuten theihtawp an chhuah a. Twelfth Finance Commission chuan Rs.4,00,60,000/- vel zet mai min han pe te hi a lawmawm ka ti.

Awle, ka pu, nichina ka han sawi tawh ang khan, Ministry hmasa lamah khan sum awm uk lova contract inpek an sam luat avang khan, nichinah khan kan Member zahawm tak pakhat khan thil hrethiam zo lovin (an sorkarna tlak tawh hnu chuan a kelh kelh zuk hriat a har nite pawhin ka ring a, chuvangte pawh chu a ni awm e), tuna sorkar dinglai hi a nilo baksak khan a rawn puh chiam mai a, pawi ka ti a. La awm se, a hrihfhiahnate hi ngaithla ngam law law se a that dawn tehluul nen, min lo chhuahsan hman a, a pawi ka ti khawp mai. Engpawhnise, tlem ka'n sawi tho tho ang e. A bikin ka hriatchian ve (hei Minister zahawm tak Pu S.Hiato-a Department enkawlah te ka tanpui ve a, kan hotuten min ruat angin, chung ang) ah te chuan pawisa awm miah hmaa contract an lo inpekte kha kan hotuten an zah sak hram hram a, cancel sak mai lovin, vawiinni thleng hian an la thawh tir a, running bill te, intanpui theihna remchang ang zawng zawngah duhsakna an hlan hram hram tih hi Pu Speaker, ka han sawi chhuak ve duh a.

Ministry hmasaina 'by hook or by crook'-in sorkarna hi i form leh pawt mai teh ang, tih policy-a hmathlir tel miah lova, naktuk hun tur ngaihtuah miah lova School 300 chuang zet mai, an hlawh pek tur a awm lo tih hre chung a lo up-grade vak mai te; khawvel ram hausa ber pawhina tih tina a tin ngai loh Health Care Scheme, mipui vote leina tur atan liau liaua duan chhuah ang chi te, anmahni ngei hi sorkar leh pawh nise engtikawng mahin an kalpui dawn lo tih an hriat chian em em te, vawiinniah hian mipui bumna atana "kalpui ni rawh se, chuti khati.. thil tha kan tih an tawpsan" ti a, an auchhuahpui hi chu sim tawh sela, an zahawmin Mizoram hian hmasawna kawng a zawh mumal thei zawng ang, tih hi ka ngaihdan a ni a. He budget tha tak mai hi a tha ka ti a, fak a phu em em a ni ka tih rualin min rawn present-tu kan Chief Minister leh Finance Minister ni bawk chungah lawmthu ka sawi a ni. Ka lawm e, Pu Speaker.

Pu LALDUHAWMA (ZNP) : Pu Speaker, a wind-up-tu tur pawh a awm silova, kan sawi mai loh chuan. Pu Speaker, inrinni khan kan House Leader ho hian Zoram damna cassettes release naah kan kal a, chutah chuan kan House Leader zahawm tak hian “Inthlan hmaa ni 40 leh zan 40 chawngheia tawngtaitute tawngtai chhanna kha keini hi kan ni e, an tawngtai chhuahte kha kan ni e”, a ti a. Kha kha a lo nih pawhin keini opposition MLA te pawh hi thil in tihsual luih emaw, tihsual palh emaw, in tih hmaih palh emaw te venga rawn hailang thin tur atana tawngtai chhuahte kan ni ve tho a ni, tih kha kan pawm tlan a thain ka hria a. Tichuan, kan budget chungchangah chuan thudik tak chu, ‘A pung tih hi’ a ni a, amaherawhchu, punna hi sorkar hnathawk hlawh atan a ni ber tih kha a dik leh mai bawh a. Kan chhuan ber chu NLUP a ni tih hi a dik leh a, chuta sum kan dah chuan Department dangte a hrek cher hle tih kha a dik leh bawh a. Comment tel lova a dik tak kan sawi dawn chuan tikhan a zo deuh maiin ka hria.

Ka ngaih pawimawh zawk erawh chu dan hi a pawimawh a, Mizoram Fiscal Responsibility and Budget Management Act, 2006 ah khan kan passed a. Khami hma khan he dan hi a awm loh avangin budget hi duh ang angin ruling party hian a kalpui nawk nawk a. He dan kan neih theihna tura House-a hmalatu hmasa ber kan party kan ni ve kha lawmawm ka ti hle a. A tirah min hnawl sak mahsela central sorkar lamin tul an tih avangin he dan hi kan lo nei ta a. Tichuan he dan hi budget kan khel apiangin kan chhiarin kan zawm em, tih hi kan in enna tur darthlalang a ni tur a ni. Chutah chuan section 9-naah khan Finance Minister-in thlaruk dan zelah monthly review a theh lut zel ang tih a ni a. He review hi Parliament ah chuan quarterly-in Finance Minister-in Parliament ah a theh lut thin a, an sawiho a, an delete thin a ni. Budget pass ang khan sorkar chelhtute khan an hmang ta em? Deviation te a awm em? Sum puk belh a awm em? Deficit a awm em? A lo awm a nih chuan chhan leh vang (justification) nen House ah a pulut a, mipuiin kha debate kha an lo thlir thei thin a, sorkar a khalh ngil thin a ni. Chutianga House-a debate tur ang chi a, he dan hi a tir atanga kan siam loh avangin hmanni lawkah pawh khan, ‘i siam tha leh ang u’ tih kha ka rawt a ni a. Amaherawhchu, kan la siam tha chuang lo a, a that tur angin a tha lo, he dan hi.

Chubakah tuna a nih ang pawh hi kan la hmang ta lo cheu a. Khata a inziah danah khan “Minister in-charge of Finance shall, review after every six months” a ti a ni. Chu six monthly review ah chuan ‘any deviation or likely deviation’ a awm chuan a remedy turte nen Finance Minister khan thlaruk dan zelah kha review kha a rawn siam tur a ni tih a ni a. Tunah hian he review kan han hmuh hi 2008 April – September 2008 inkar kan dawng chauh a ni. He review bu kan Finance Minister zahawm takin a rawn thehluh hi chhiar pawh ka chhiar peih lo, chhiar mah ila a sawt tawh lo, 2008 April leh September inkar MNF sorkar laia mi rawn review khan tunah sawngsawhlawtna a nei vak tawh lo. Chuvang chuan hei hi engatinge kan tih upto date theih loh? Kumin kum chanve review te kha tunah hian thlir ta ila, current financial year chhungah hian, tahchuan sawi tur a tam khawp ang. Chu ngei chu kan ram hian a tangkaipui

ang. Chu chu theih hram se chuan budget lo kal leh turah hian six monthly review tura hi, 'after every six month' a tih ang chiah hian a current financial year chhunga discuss theih tur hian ka'n ngen ngawih ngawih duh a ni.

Tin, a dawt lehah chuan hmanni lawkah he dan hi Pu Speaker, nangma hovin kan amend a, kan amend chhan chu central sorkarin amend tura min phut hrih vang a ni a. 'Budget statement rual hian Assets statement Finance Minister-in a siam tel thin ang a, a thehltut tel thin tur a ni' tih a nih kha. Chu chu Gazette ah pawh notified a ni tawh a, July thlaah khan. Vawiinniah hian chu dan chu kan pass zo te te a, he kan budget present ah hian chu dan chu kan palzut nghal chu a ni leh ta mai a. Asset document chu Budget statement ah hian kan zawng kan zawng thin, khawiah mah ka hmu lo. Kan sorkar hian rotling engte nge a siam tih budget statement ah hian kan hmu duh a ni. Chutianga tunhnai tea dan kan siam te pawh a siamtu/rawttute ngei pawhin kan zawm lo tan leh mai dawn a nih chuan a felin ka ring lova, kan sorkar hian thil tha a duh niin ka la hre fan a. Chuvangin hengte hi tih leh hunah rawn tih hram ni tawh sela, hetiang sawi tura tawngtai chhuah kan ni ve ka tih kha. Chuvangin ram tan theuh kan thawk a ni.

Tin, chuloah chuan, "Mizoram Transparency in Public Procurement Act" kha 2008 ah khan kan pass a, he dan hi kan nei tawh a ni. Eng Department pawhin thil a procure dawn chuan a tih dan tur tunhma kalphung ang nilovin he dan hnuaiah hian thil an procure tur a ni. Tahchuan State tender Bulletin Officer, Dy. Secretary aia hniam lo a awm ang a, District tender Bulletin Officer a awm bawk ang a, tender invitation zawng zawngte chu pawm a lo nih chuan an pawm dan detail nen. Tin, a malin an reject emaw, a vaiin an hnawl a ni emaw, khang zawng zawng kha an publish tur a ni. State tender Bulletin a awm ang a, District tender Bulletin a awm ang a, chutah chuan chhiar theihin a awm ang a, lei theihin a awm bawk tur a ni tih a ni. Dan zawm lo chu kum 3 lungin tan thlengin a hrem theih a ni. Heng dante hi kan nei a, hengte hi kan hmang em? Chutiang officer te chu appoint an ni tawh em? Chutiang a nih loh chuan tuna kan budget pass tur hi kan han hmang leh ang a, a langtlang lo laiah ven sen loh te pawh an lo awm thei, Official level ah te pawh a ni thei vek a. Chung angah chuan heng dan te hi an zawm loh chuan tul lo leh mamawh loh lei nghek nghek te kha a awm leh ang tih hi a hlauhthawn awmin ka hria a, chu chu kan tarlang duh bawk a.

Tin, 'Mizoram Local Fund (Accounts & Audit) Act' hi 2006 ah kan pass tawh bawk a ni. He dan hmang hian Village Council sum te, Local Fund kan tih chi reng reng, kum khuua vawite khatmah la Audit loh ho hi Audit ve tawh tur a ni. Chutianga audit an nih ngai loh avangin an ngampa em em hlawm a, a bik takin ruling V/C te ngat phei chu chhantu nei tih an in hria a, an corrupt zual bik thin. Opposition V/C te an corrupt tak tak ngam ngai lo. Hei hi thudik a ni. Chung chuan diklo taka advantage an lak loh nan an fund hi audit ve tawh ila tih thila he dan hi lo piang a ni a. Kan hmang tangkai tawh em hengte hi? Heng kan sum pass leh tur zozate hi audit mumal lova a kal leh dawn a nih si

chuan engnge awmzia a neih ? Tunah pawh hian NREGS ah job card chuang engzat nge awm kha ? V/C khatah za chuang chuang a ni lawm ni an neih ? Heng khawih nan te hian kan hmang dawn em ? Chuvangin a implementation ah hian kan chan leh dawn a nih si chuan heng sum hi a hmangral leh ang tih hi kei chu ka hlau a ni.

Tin, Pu Speaker, sawi hrehawm deuh mai chu, sorkar hmasa hun laia MIP sum sem bang kha a awm a, chu chu kan tlakral nasa khawp mai tun sorkar hian. NLUP hnuai ah an dah a, vawk vulh tanpui nan a nuai telin Congress Party Worker te kutah dahin an sem a ni. West-I ah pawh nuai tel, a zat ka sawi hrih lovang a, MPCC G.S kutah dah a ni. A pawisa faiin a ipteah a ak a ni. A duh duh a sem. Actual Payee Receipt (APR) a ak sa a, tahchuan a sign tir mai a ni. Chutiang chuan Aizawl khawpui chhungah an ti a ni. RTI hmangin zuk dil kan tum a, NLUP Cell chuan “Agriculture hnuai ami kan nilo” an ti a, min pe duh lo. RTI Act ina a huam loh Department emaw, Cell emaw, Board emaw hi Mizoramah a awm thianga em ni ? Agriculture Minister hnuai a awm vek a ni lawm ni ? Khatiang mai maia information kan dil hmuh theih loh, langtlang thei lo tur kha Mizoram hian a mamawh lo. A Minister te, a Chairman te mumal taka ka mirin em em te an ni. Kan House Leader hian a hriatpui ang em aw! ka ti hial a ni. Corruption hi kan phoro ang em le ? Ram thuvawn te hi kan la tar zui zel dawn em ? A tenawm lutuk. Term hmasaah MNF worker ten sum sorkar atangin an la chhuak a, an sem a, khawkheng tanpuina angte kha, khatiang thil duh lo tute kha kan ni tlang a ni lawm ni ? Tunah engatinge party worker ten hetiang sorkar sum an lak a, duh duha an sem leh tak si ? Cheng 8120/-a sem tur a ni a, 5000/- ten an sem a, an la hlep leh chhawng leh nghal. Chuvang chuan sum hmanna umzuina lamah hian kan chak a ngai ka ti a, chu chu ka’n sawi duh a ni.

Tin, NLUP ah hian kum 5 chhungin family atana kan sem tur vaibelchhee 1200, infrastructure atan vaibelchhe 1250 ruahman hi kan sawi ve phak a awm a nih chuan mimalin an dawn tur aia infrastructure, education, training tih vela kal ral tur a tam zawk hi ka ui khawp mai. Dik takin helai hi chu engemawti hian a kal ral duh thin khawp mai a. Chuvang chuan mimalin an dawn tur lam a hi tam thei sela, thil dang a kha chu Department awmsa te a ni a, tlemin siam belh a ngai a ni mai a. Chuti em ema tam a ngaiin ka ring lova, chuvangin chhungkaw mal chan tur hi tih tam zawk a tha lawm ni, tih kan sawi duh a ni. Tin, NLUP hnuai Item kan thlan tur hi contract farming ah engzatnge tel dawn ? Khalai kha a pawimawh ka ti hle mai.

Tin, National Agricultural Insurance Scheme te pawh introduce a lo ni tawh a, NLUP hnuai item te hi insurance in engzatnge a cover dawn kan va hre lo ve! MLA te pawhin. Andhra Pradesh-a an Agriculture Minister chuan insurance scheme awmzia hrilhfiyah turin mi 5000 a ruai a, mipui hrilhfiyah turin a campaign tir a ni. Vawiinniah hian eng thlai nge kan chin, chhiatna lo tawk ta ila engzatnge kan dawn theih ang, dawng turin eng form nge kan fill-up ngai, enge tih tul, mipuiin an hre lo lutuk te hi, hengte hi siam that a thain ka hria a,

thahnemngaih thilah. Heng item tam ber hi insurance te hian cover theiin contract farming ang hian kal thei se a hlawk leh zual ang, tih ka'n ring a.

Tin, infrastructure vela sum tam tak a lut kha uihawm ka tih rualin, a marketing atan te hian engzatnge ruahman a nih ang aw, tih hi ka ngaihtuah a. Tunah hian sum an dawng ang a, an lawm ang a, mahse an han thar chhuak chiah ang a, an han hralh dawn ang a, an tihtawih leh vaih chuan chumi niah chuan an tap leh dawn a ni. Chuvangin a pawimawh ber chu a marketing hi a ni. Chumi atan chuan sum hi ruahman tam nise a va tha dawn em ka ti a.

Tin, LIC atang hian 20 crore kan puk dawn a ni a. Heta tang hian LAD Housing atan hian 5.05 crore chauh dah a ni a. A dang zawng chu Police Housing, Government Housing, PWD etc. atana dah a ni a. Mimal In sakna loan lak tur hi kan indaih lo nasa thin si a. Hei aia sang deuh hian a allocation hi siam nise mipui chhawr tur zawng hian, puk belh ni bawk se, loan latuten an rulh leh tho tur a ni bawk si a.

Tin, NABARD atang hian 30 crore kan puk a ni a. Heta 22 crore hi Rural Road construction atan a ni a. PMGSY te leh thil dang tam tak kawng laihna tur hi chu source dang kan ngah a. Hengte hi thlai thar lei nan te hman ni ta zawk sela a tha awm mang e, ka ti a ni. Chutiang bawkin 8 crore hi drinking water atana dah a ni a. Hei pawh hi a Department kan nei sa reng a, chuvangin heng sum te hi chu tangkai zawkin mipui iptea lut tur zawnga dah atan ka it hle mai. A market atan mai nilovin, market building sak nana dah atan te pawh a tul zawkin ka hria. Hei Inrinniah chuan kal ngaihna awm lo khawpin thlai thar zuartuten thui tak tak kawng an aw h tawh a ni a, a zahthlakin a mualpho thlak a ni. Keimahni ram thlai thar ngei hralhna tur building tha pawh vawiin thlenga kan la neih loh lai hian, heng kan loan lak tur te hi chung atana hman zawk chu a tul mang e, ka ti a ni.

Tin, contingency fund kan neih 20 crore lai mai a hi hmanna mumal awm lo ta se, advance-a kan lo hmang a nih pawhin nakinah in recover leh zel tur a nih hmel si a, kum tawp lamah te chuan mipui tana hmasawna rotling tham siam nan rilruah neih nise, tha ka ti a.

Tin, kan ADB loan lak hi chi hnih a ni a. North Eastern Region Capital, Cities Development Investment Programme kan tih ah hian, August thlaa agreement signed ah khan dollar million 68 kum 6 atan kan han puk dawn a ni a. Kumin atan Rs.239 crore a ni a. JNURM ah Rs.50 crore vel a lo awm a. Tichuan Rs. 290 crore el-awl Aizawl khawpui tan kan nei dawn niin ka hria a, a lawmawm hle mai a. Hengte pawh hi a hnathawh a kha a pawimawh ber lai tur chu a ni a. Tin, Mizoram Public Resource Management Programme atan hian September thla agreement ah khan U.S. Dollar Million 100 kan puk dawn a ni a. Heng atana agreement te pawh hi a copy hmuh ve a chakawm hle mai.

Nia, hun a chep tawh a, Pu Speaker, ka ngaih pawimawh em em ka'n sawi duh chu cooking gas hi a ni. A tawp nan tawite, tlar hnih/khat lek – cooking gas ah hian kan quota kan lift theih zat hi a tlem lutuk. Pu Speaker, tun sorkar hian sorkar hmasa tluk lo tak a ni, hetah na na na hi chuan. Chuvangin tan la teh se. Kohhrante pawh commercial cylinder hmang turin min tilui tawh a, a buaithlak em em a ni. Chuvangin hetah hian kan sorkar hian theihtawpin tan la sela, hnianghnar zawkin sorkar hmasa tih theih angte kha chu ti thei ngei turah kan ngai a ni si a; tan la hle turin ka'n chah duh bawh a ni.

Tichuan, heng rawtna hrang hrangte hi min hriat sak reng beisei chungin kan budget hi pass ila, tih kei pawhin ka remti e.

S P E A K E R : Sawi tur kan awm hmel tawh lova...
E... Pu T.T. Zothansanga.

Pu T.T. ZOTHANSANGA (INC) : Pu Speaker ka lawm e. Hei kei pawh ka vawikhat sawi vena a ni dawn a, tlemin hun ka lo la deuh a nih pawhin min lo hrethiam ula.

Nichinah khan Lunglei West MLA zahawm tak khan a rawn sawi kha tlem han sawi hmasak ka duh a. (Speaker.. In sawi duham..... zel rawh) Chini chungchangah khan MNF sorkar chung khan, nikum April – October thla chung khan chini kha vawikhatmah an sem lova, kha kha mipuiin an hria a ni. Kuminah hian April & May ah central allocation kan hmuh loh avangin kan sem thei lova, July thla atang khan kan hmu leh a, mumal takin tunah hian kan sem ta a ni. Tin, Aizawl W-I bialtuin a'n sawi zawk, cooking gas kha tun dinhmuna tlemin harsatna a awm deuh pawh a ni thei a, amaherawhchu, nikum January – September thlaa gas lo kal zawng zawng leh kumin January – September thla chungga lo kal zawng zawng kan compare chuan, bur singkhat leh sangthumin kuminah hian a tam zawk a ni, kha kha ka'n sawi lang tel deuh hram duh a.

Hei waviinah hian kan pu hi experience ngah tak mai a ni a, budget la siam ve ngailoten kan han sawisel deuh chu a ni mai a. Keiina ka han hmuh mai danah chuan, kan budget hi a thluk siam ila, a sak mai theih lawm maw ni le, ka lo ti deuh a ni.

Sawi tur a tam khawp mai. Tun hnaia khawvel pumpuiah Global economy-in tlakhniam lam a pan avang khan engemaw hun chung kha kan hniam deuh sat sat reng a. USA leh ram changkang dangten an tuar nasa a, India leh China in kan tuar nep deuh a ni. Kan tuar nasa viau lo nain, tlak chu kan tlakhniam ve a ni. Chuvangin GSDP kan han tih chiah pawh hian – 2006-2007 ah 9.7% kan nih laiin 2007-2008 ah 9% a ni a, 2008-2009 ah chuan 6.7% ah a tla dawrh mai a ni. Chu chu Central Statistic Organisation ina an rawn chhutna a ni a. Mizoram

Directorate in a chhut venaah chuan 2006-2007 ah khan 8.95% a ni a, 2007-2008 ah 7.13%, 2008-2009 ah 7%. Kan dinhmun chu kan hria, kum 3 chhungin kan tlahniam sat sat reng a, chutih lai karah chuan, hei congress party-in sorkarna mipui duhsakna dawngin an siam a, Finance Minister-in budget an rawn buatsaih hi tha ka ti khawp mai. India ramah economy dinhmun a tlahniam zel a, hmun hrang hrangah ralkhel dar an vua a, chutih lai kara 25% zet maia budget sang theia kan awm hi lawmawm ka ti a. “Keinni zawng kan chang bik hi kan vannei hle” ti awm tak pawh kan ni. Kan pute thawhrimna leh central hotuten an duhsakna hi he kan budget ah hian a lo lang a, a lawmawm ka ti khawp mai.

Nichina Opposition hruaitu zahawm tak, Pu Thangtea thusawi kha han sawi zui deuh ka chak tehlu nen, amah a lo awm ta lova. “MNF sorkar hun lai khan hnathawh ban kan neih ka hre lo”, kha a ti a. Champhai district ah chuan CM bialte pawh a lo ni a, kan lo kal khawng deuh pawh a ni mahna, thlahnih vel chhungin M/R zawng zawng kha min ban fai deuh phiar a ni. Hmun thenkhatah chuan party-a in enroll luih tira an ban tak loh te, block hotute hnena pawisa an pek vanga ban loh te an awm a. V/C an chanlohna hmun thenkhatah phei chuan Village Welfare Committee an din a, sorkar thil pawimawh tak takah an hmatheh a, Opposition V/C te loh theihloha MNF-a inleh tir te an awm a, sawi tur chu a tam mai.

GM High School pheiah khian Congress pain a thawk a, tun thlengin bill lak loh a la awm a ni. Tin, ka bial chhung Khuangphahah Subhash Chandra Bose a lim hung a ni a, chumi bill chanve aia tlem chu pek tawh a ni a. Chutih chhungin MNF kha an lo Lal ta thut mai si a, tahchuan a bill lak bang zawng chu a chang ta lo reng reng a, Contractor kha a hawihai ta ringawt mai a ni. Khatiang kha a ni ve a, a hriatloh lampang khanah hian a lo fuh vak bik lo ni te pawhin ka hria.

NLUP chungchang kha - “Inthlan zawh veleh kan sem ang in ti a, in sem leh si lova” ti ang deuh khan ka lo ngaithla a. Congress hi kan thahnem a, kan chhangchhia a, khatiang khan hmun thenkhatah lo ti an awm a ni mai thei a, a hruaitu level, keini helai thute zingah hian sawi kan awm chu ka ring lova. MLA level ah emaw, block level ah emaw hian inthlan zawh veleh nuaikhat kan sem ang, tih kha a awm lova. “A policy azirin cheng nuaikhat pawh a tling thei ang” tih kha kan manifesto-a a inziah dan chu a ni. ‘Inthlan zawh veleh’ tih kha chuan inbeihna lam rawng a kai deuhvin ka hria. Opposition ten in han sawi ang ngau ngau leh khatiang anga min han puhna kha chu khawilai bawm ak thu deuh hlek atanga in lo dawn, phuahkhawm dawn a ni ang, tih kha ka ring a ni.

Hei tun tum kan detail plan outlay pawh hi han en ila. Nikum khan vaibelchhe 1000 a ni a, tunah vaibelchhe 1250 a ni a, central plan ah hian helai a rawn sawi thlak danah hi chuan a in tam hleih khawp mai. A in tarlang Chiang a, central pool kan tih, CSS, CPS, NEC, NLCPR kan han tihte nen hi chuan kumin chhunga kan plan hi cheng vaibelchhe 3687.39 zet mai a ni a, a chhe hran lo hle a ni. Pu Speaker, i veilam amite hi chuan an sawisel ngawr ngawr turah

mipuite pawhin an ngaiin ka hria. A chhan chu helaiah hian a dik emaw, diklo emaw kalphung a lo ni tawh a, chutih lai karah Opposition tam zawkin min rawn fak ve avang khan kan plan hi a chhe lo a ni ang. “A khai, a mam teh purh em mai”, tiin an rawn ching pawr ve hrim hrim niin ka hria.

Huan neituin thlai thar a tum a, ruahmanna hrang hrangte a siam a, pawn lam atanga “E khai, i tihdan hi”, ti anga lo va sawi lo va sawi kan ang deuh. Chuvang chuan kan hotute hian an tisial lovang tih kha ring ila, kan election manifesto-a ziahlan ang khan hma lak chhoh mek zel a ni. Commission hrang hrangte din a ni a, pawisa te pawh an han earmark thliah thliah a, tha ka ti a ni.

Tin, Mizoramah hian sorkar hnathawkten tunhma deuh khan, a thei theiin sorkar kan vau kha a ni deuh mai a. Sorkar vau lo a ram kha kan awm lo a ni. An lungawilohna chhan ber chu Pay chungchangah a ni. Arpui mei anga han lungruual thap hi chu thil harsa tak a ni ve a, sorkar hnathawk tan pawh hian. Tuna kan han tinzawn deuh danah hi chuan 6th pay commission te pawh tunah hian rem hre tak maia kan hotuten an rawn chhawp chhuak hi lawmawm ka ti khawp mai.

Kum danga la awm ngai lo Contingency Fund cheng vaibelchhe 200 zet, a tul apianga hman mai theih tur a awm hi thil thar a ni. Khawi laiah nge chhiatna lo thleng ang a, khawilaiah nge harsatna lo thleng thut ang, tih tuman kan hre lo. Khalai kara a tul anga han pawhpen lawk mai tur kan hotuten rem hre taka an han siam hi a lawmawm ka ti hle a ni.

Tin, MLA Fund te pawh hi – Sorkar sum hi a kalna tur ang angah a han kal ve thin a, chutih rualin mipui nawlpuiina a huhova kan hman nasat ber chu MLA Fund hi a ni. Kum dang aia a han sang ta hi a lawmawm khawp mai, hmasawna pawimawh leh langsar tak a ni. Kan Chief Minister, Finance Minister ni bawh hian tunhma atanga a lo experience kha a takin Zoram mipuite tan a hmang niin ka hria a, he a ruahmannaah hian theihtawpin keini Legislator te leh sorkar hnathawkte kan tangruual ang a, Zoramah hian duhthusam chu kan thleng chiah lo a nih pawhin kan budget hian chu lam hawi zawng chuan min hruai Chiang a ni. Felfai leh tha taka rawn pharhtu kan Chief Minister, Finance Minister ni bawh chungah lawmthu ka sawi mawlh mawlh a, a thawhpuite pawh hian theihtawpin kan ram siamthatnaah hian i tawiawm bawh ang u. Ka lawm e.

S P E A K E R : Tunge sawi leh dawn ? Pu John Siamkunga. Hun a chep hnai tawh naa, minute 10 aia tlema i khung theih loh chuan dil belh i ngai ang aw. He House i dil belh a ngai ang.

Pu JOHN SIAMKUNGA (INC) : Pu Speaker, ka lawm e. Hei tuna kan budget 2009-2010 ami hi budget ropui tak a ni a. A budget kalphung han en hian remhre taka duan a ni a, tunah hian global economy revision kan tawh mek lai a ni a. Chumi avang chuan central atanga kan chan ve tur Tax tam tak hi kan chang pha lo a ni. Kan chan phak lohna hi nikum leh kumin chhung atang hian vaibelchhe 34 leh point 41 lai a tling a ni. Hetiang khawpa chhiah lakna chungchanga kan tawrh laia budget ropui tak rawn duang chhuak thei Finance Minister kan nei hi a lawmawm a. Chutihlai karah Demand Plan sum atangin vaibelchhe 1250 lai a rawn rek chhuak thei hi kan Chief Minister thawhrimna leh central lama a tlaktlum zia tilangtu niin ka hria a ni.

Tin, kan budget-a a landan hian Agriculture lama kan thanna hi thanna duhawm tak a ni dawn a, National level ah hian zaa pali (4%) thankin a ni a, amaherawhchu, tuna project dahah hian zaa pathum (3%) in kan thang dawn a ni. He thanna hi thanna duhawm tak, nikum lam atanga teh phei chuan a ni a, hei hi budget kalphung tilangtu leh primary sector-a thanna ropui tak siamtu a ni chho dawn tih a ti lang a ni. Tin, kan per capita income hi national level ah hian cheng singthum sangsarih zali sawmkua a ni a. Nikum lama kan per capita income kha cheng 30292 a ni. He budget ina a project dan chuan cheng 32634 in kan per capita income hi a chho dawn ta a, chumi awmzia chu cheng 2342 in nikum aiin kan per capita hi a pung dawn tihna a ni. Chu chuan hmasawwna a rawn thlen dawn a ni, chulaiah pawh chuan chiang tawk ka hria a ni. Tin, service sector lamah pawh hian kan than dan tur a pawh hi 8.07 in kan thang dawn a. Hetiang anga kan budget a kal chhoh zel chuan nakum lama a pun chhoh dan tur nena khaikhin phei chuan he budget hi chenpakawm tak a ni dawn tih a lang chiang a ni. Tin, Industry lama kan than dan tur a hi 7.48 lai a ni a, Industry lama kan than thin dan kum hmalamte en chuan he thanna hi a duhawm khawp mai. Industry lama thanna hian helai primary sector ami, Agriculture lama thanna nen khan kal dun thei thin a ni a. Chuvangin helai Industry lama kan thanna hi fak tlak niin ka hria.

Awle, kan plan budget, tuna kan hman turah hian heng hi a rawn kaww thui ta viau a ni, tuna ka'n sawi tawh ang khan. Developmental expenditure kan tih develop hna lampanga kan thawhna tur atan hian he budget ah hian cheng vaibelchhe 1984.41 lai hman tur a ni. Chutih laiin non-developmental works ah khan vaibelchhe 997.28 hman tur a ni. Chumiin a kawh chu he budget hian hmasawwna ruhrel lian tak tak a duang dawn tih a rawn tilang chho hlein ka hria. Tin, remhre tak maia kan Finance Minister ina contingency fund atana cheng vaibelchhe 200 lai mai a dah hi chhuan tlak a ni, remhre thil tih niin ka hria a. Tin, chutihlaiin guarantee redemption fund atana cheng nuai sawmnga lai mai tun May, 2009 atanga riruut a rawn neite hi, hengho kan invest-na tur sum lo lut tur a kha a zuk kaww tel a. Hei hian sum harsatna tur leh kan mamawh lak belh zelna tur atana hmahruaitu lian tham tak a tling a. Chuvangin he budget tiphuisuitu leh timawitu lian tak niin ka hria.

Tin, kan State sum bat hi cheng vaibelchhe 3276.09 lai a ni a, a tam khawp mai, sang ler lawr tak a ni. Amaherawhchu, he budget-a a lan ang hian GSDP atanga chhut hian a pawt thla zawngin a kal dawn a ni, he budget hian. Chumi awmzia chu tun kan budget kal chho mekah hian a hmaa 80% chuang lai ni a kha GSDP tehkhawnga hmangin 78.95% ah a pawt thla tawh dawn a. Chumi awmzia chu kan GSDP behchhan hian helaia kan sum bat a hi te zawk hian a kalpui dawn a ni, thiam takin. Tichuan, kum 2012 ah phei chuan 69.32% of GSDP ah a tla thla dawn a ni. Hetiang anga remhre taka he budget pharh a ni leh he budget duan a ni hi Zoram mipui tan a ropui tak zetin ka hria a.

Tin, Loan pung tam chi 9% aia pung chi reng reng a kha rulh vat vat tumna a lo lang bawk a. Hei hian fiscal management lamah kan Finance Minister hian thiamna sang tak a nei a ni tih a tilang hlein ka hria. Tin, chumai bakah nasa takin kan sum bat hi a rawn pawt thla hniam dawn a. Tin, structural adjustment loan ADB atanga vaibelchhe 252.12 kan lak tur nen hian hei hian nasa fein kan sum bat te, sum lama kan lo harsat thinnate kha a rawn sukiang tawh dawn a. Kan over draft-in nasa takin hei hian a pawt hniam thla dawn a ni. Tin, budget lama lawmawm em em lo lang leh chu power lama thahnemngai taka hmalak tumna hi a ni a. Mega-watt 25 chin chunglam chu public private partnership hmangin a tih theih tawh dawn a ni. Tunhmaa Mega-watt 3 ni thin kha Mega-watt 25 chin hetiang a tih a nih chuan, kan lo ruat lawk leh kan lo beisei lawk ang hian power lamah kan thang chak dawn a ni.

Tin, budget bua a lan dan hian kum 7 atanga kum 8 lo awm turah phei chuan power lamah hian kan hnianghnar mai nilovin, hralhchhuah tham kan nei tawh dawn niin a lang a. Hei hian mipui leh ram hmakhaw ngaiin budget hi kalpui a ni tih a tilangin ka hria a.

S P E A K E R : Pu John lo ngawi lawk rawh aw. Kan hun a zo tlat mai a. House ngaihdan lak a ngai tlat. Kan sawi zawh tir dawn nge ni? Minute 10 chu a hmang lo deuh a ni a. A hun kha a tlai deuh a ni mai a. Minute 3 vel a la nei a ni. I sawi zawh tir mai ang aw.

Pu JOHN SIAMKUNGA (INC) : Awle, Pu Speaker, ka lawm e. Tin, JNNURM hnuuia vaibelchhe 50.33 lo kal tur te, RKVY atanga vaibelchhe 4.15 lo kal tur te, AIBP atanga vaibelchhe 5.55 lo kal tur budget-a langte hi investment ropui tak Mizoramah heng hmanga rawn nei tur a ni hi a lawmawm a. Hetiang investment drive siam theitu kan Finance Minister hi a fak tlak hlein ka hria a. Hetiang investment neih tum hian India sorkar pawn ram dangah campaign a bei nasa thei hle a ni. Chuvangin helaia budget-a lo lang hi kan budget ropui zia tilangu niin ka hria a.

Tin, Asian Development Fund atang te, NABARD leh Financial Institution atangtea investment lian tham tak takte Mizoram ina kan hmu hi a ropui a. Hetiang tihtheihna atana budget a lo lang hi a hrawva hlawm hle a ni. Hei hian he budget ropui zia leh he budget ina Zoram hruai a tumna hi chiang taka hre sain min kalpui a tum a ni tih a tilang.

Tin, ADBA atanga kan loan lak tur 68 million dollars hi thil lawmawm tak a ni. Nichinah kan chai tawh a, bawlhhlawh singsak hi. Tawih thei lo bawlhhlawh a tam si a. Aizawl khawpui chung atang ringawt pawha kan la buaipui em em, bawlhhlawh lampang singsakna tur kan budget-a lo langte hi kan Finance Minister hian remhre takin Aizawl khawpui singsak hna hi he investment lian tak hman hian a ti dawn a ni, tih a tichiang a. Hei hi kan budget tiropuitu tak a ni.

Tin, Asian Development Bank Loan tho, Mizoram Public Resource Management Programme hnuai 100 million dollars kan la tur hi a ropui khawp mai. Hei hi Social Economic Fronts lama hman tur a ni a. A nihna ang takin kan han hman chho ang a, a detail-in budget ah a lang a. H un ka neih rei loh avangin ka sawi tam lo ang a, hei hian nasa takin thanna minrawn siam dawn a ni. Chuvangin he budget hi budget theuneu lo tak a ni tih arawn tilang a ni.

Tunah hian State Own Tax kan chhiah lak hi a thang vak lova, kum 3/4 vel chung kha chu 24.67% a ding a ni. Hei hi tih that tumin he budget hian nasa takin hma a la tih kan hria a. Tin, VAT atanga sum kan lakluhte pawh hei aia tihsan hi a tum a, khami avang khan theihtawpin hma a la a. Tin, VAT Audit Manual siam tumna avang hian VAT atanga kan chhiah lakluh pawh hi a tam dawn a, fiscal management chungchangah pawh hian nasa takin hna a thawk dawn a ni. Tin, chhiah thar lakna tur awm lo hi mipui tan a thlamuanthlak a, tunah hian chhiah thar lak tum lo mahsela chhiah lakluh chu sorkar hian nasa takin a tum a, Zoram mipui tan sum tuak a tum a ni. Tax lak dan felfai zawka siam tum a ni hi a lawmawm a, Revenue lama Ram chhiah awl tam lutuk pawh hi tikhiana chhiah nasa taka lakluh a tum bawk a ni.

Tin, chuchang nilovin, vehicles lam atang pawhin Road Tax kum khat chauh kan pe a, kum tam tak Road Tax awl thin te hi kan budget atang hian huikhawmin nasa takin Zoram mipui tan sum a thawk chhuak dawn a ni, tih a tilang bawk a ni. Tin, consolidated sinking fund atana cheng vaibelchhe 15.50 dah tur hi a ropui a, a awmsa 63.25% a belhchhah dawn a, hei sum thlaveng a ni a, a ropui tak zet a ni.

Tin performance budget a tha a, chubakah work programme hi a tha ka ti bawk a. A tha ka tih rual rualin performance budget-a Department pakua laiin an perform dan, hna an thawh dan an han submit lo erawh hi chu a pawl riau ka hria a. Tin, work programmes 4, Department 4-in an submit lo hi a pawl a. Amaherawhchu, kum dang thlir erawh chuan he budget ropui zia leh changtlun zia tilangtu a ni a, he budget hi a fak tlak tak meuhin ka hria a. NLUP-a sum

dah a ropui a, hei hian Zoram mipui harsatna ata min chhanchhuak tur hi a ropui a ni. Hei hi Zoram nghahfak a nih angin he budget chhenfakawm tak kaltlang hian Mizoram mipui hi min khaichhuak dawn a ni.

Pu Speaker, ka lawm e.

S P E A K E R : A lawmawm e, i tawp thei chu. A tawp thei dawn tawh lo emaw ka ti a, ka lo lungngai deuh hlek a. Hon'ble Member pawhthut em kha chu ka hreh deuh si a.

Ruling party lampang kha in sawi duh dawn lo emaw ka ti a, Opposition ho kha an ding zo deuh vek tawh mai si a. Vawiinniah kan zawh mai theih dawn hi ka lo ti a, mawng kham lo deuhin, naktuk mawng kham kher a ngai dawn lova, ka ti a. Mahse kha a tawp lamah in tlailam umpawngpar leh deuh a, a tha tho e.

Chuvangin vawiin atan chuan kan duh tawk ang a, naktukah sawi tur a awm pawhin, sawi tur an la awm tho ang a. Tin, kan business dang a kha naktuk kan chawlh vaih chuan, in question kha a thi ruih thei a ni. Zawhna hun kha kan tui tak mai subject hun kha a ni si a. Chuvang chuan vawiin atan chuan kan duh tawk rih ang a. Naktukah Dar 10:30 ah kan chhonzawm leh ang a.

Sitting is adjourned.

4:10 p.m.